

# IMONG PINANSYAL NGA KAUSABAN

Ang Gahum sa Estratehiya

GARY KEESEE

Akong Minahal nga Higala kang Cristo,

Ang among pagampo nga mahimong panalangin kini nga mga pagtulon-an og usa ka pagdasig kanimo! Ikalipay namo nga imo kining ipaambit sa imong mga higala, pamilya ug mga membro sa imong simbahan. Makahimo usab ka pag-adto sa [FLNFree.com](http://FLNFree.com) sa pag-dowload sa dugang pang mga kopya ug daghan pang mga pagtulon-an nga nahubad sa imong lingguwahi.

Gimahal ka sa Dios ug aduna Siya maanindto nga plano sa imong kinabuhi! Ang pagtuon kon sa unsang paagi nga ang gingharian sa Dios nagapamuhat nakpausab sa among kinabuhi sa mas hilabihan ka maayo, ug nagsalig kami nga mao pod kini ang mahitabo kanimo!

Uban sa Pagmahal ni Cristo,

Gary og Drenda Keesee



P.S. Ayaw kalimot sa libreng pagdownload sa among website nga [FLNFree.com](http://FLNFree.com) alang sa daghan pang mga libreng pagpanudlo nga nahubad na sa imong lingguwahi.

K A U

# IMONG PINANSYAL NGA KAUSABAN

Ang Gahom sa Estratehiya

S A B

GARY KEESEE

A N

***Your Financial Revolution:*** The Power of Strategy

Copyright© 2025 by Gary Keesee.

Originally published in English Copyright © 2015 by Gary Keesee

Printed in the Philippines

ISBN: 978-1-945930-14-0  
Gary Keesee Ministries  
P.O. Box 979, New Albany  
OH 43054, USA

GaryKeesee.com

This book is a FREE GIFT from Gary Keesee Ministries and is  
NOT FOR SALE

***Ang Imong Pinansyal nga Kausaban:*** Ang Gahom sa Estratehiya

Copyright© 2025 ni Gary Keesee.

Ang orihinal nga pag-imprinta sa Ininglis Copyright © 2015 ni Gary Keesee

ISBN: 978-1-945930-14-0  
Gary Keesee Ministries  
P.O. Box 979, New Albany  
OH 43054, USA

GaryKeesee.com

Kini nga libro usa ka LIBRENG GASA gikan sa from Gary Keesee Ministries ug  
DILI BALIGYA

# PAGHALAD

Buot ko nga ihalad kini nga libro sa akong asawa, nga si Drenda, kay ang iyang pagdasig, ang iyang kainiton sa mga butang sa Dios, og ang iyang gogma sa pamilya og kanako nga maoy nakadasig kanako sa nanlabay nga mga katuigan. Sa among panaghiusa, among napamatud-an nga ang mga damgo tinuod nga mahitabo!

Gary Keesee



# ANG SULOD

PASIUNA .....	9
KAPITULO 1: Gusto Mo Kaming Maghimo’g Unsa? .....	23
KAPITULO 2: Ang Gingharian .....	39
KAPITULO 3: Natingala .....	49
KAPITULO 4: Ang Sukaranan Butang: Ayaw Pagbiya sa Balay nga Wala Ka Niini .....	69
KAPITULO 5: Ebidensya sa Kasulatan .....	89
KAPITULO 6: Tanang Magtotoo ba Naga-ampo sa Lahi nga Pinulongan? .....	101
KAPITULO 7: Ang Kaha sa Bahandi .....	115
KAPITULO 8: Ang Lisod nga Dapitsa Promosyon .....	135
KAPITULO 9: Ang Mahinay nga Gamay nga Tingog .....	147
KAPITULO 10: Mga Panan-Awon ug Mga Damgo .....	163
KAPITULO 11: Ang Balaang Espiritu, Murag Akong Amo .....	179
KAPITULO 12: Unsaon Pag-Ampo Ug Pagdawat Sa Bautismo Sa Espiritu Santo .....	197
MGA TALA .....	201



# PASIUNA

*Ang Imong Pinansyal nga Kausaban: Ang Gahum sa Estratehiya* mao ang ikatulong libro sa seryeng Pinansyal nga Kausaban. Sa dihang mahuman na kini, mahimong lima ka libro, ug kining tanan usa ka gipalapdan nga bersyon sa usa ka kumperensya nga akong gihimo sa Albania niadtong 2005. Sa maong kumperensya, nagbag-o pag-ayo ang direksyon sa akong kinabuhi. Kon nakadungog ka na niining sugilanona, mahimo kang mobiya sa Pasiuna ug direkta nga moambak sa Kapitulo 1. Apan kon wala pa, tugoti ako nga mag-istorya bahin sa asul nga aso. “Asul nga aso?” tingali imong pangutana, “unsa man kana?” Kasabot ko sa imong pangutana. Sa dihang akong nakita kini, wala usab ko kahibalo kon unsa kini, apan ang gahum sa Dios lig-on kayo, nasayod ko nga kini nagagikan Kaniya. Tugoti ako nga isaysay ang maong sugilanon.

Sa pagsugod sa among kaminyoon, ang akong asawa ug ako nalubong na sa utang, ug napadayon kini sulod sa siyam ka tuig. Dili lang basta utang, apan nakaantos usab mi og grabe nga tensyon ug kahadlok tungod sa problema sa kwarta. Wala gyud namo tuyoa nga madaot among kahimtang sa pinansyal, apan mao gyud ang nahitabo. Nagsugod lang kami sa usa ka simpleng credit card alang sa gasolina, dayon nakuha namo ang usa ka Visa card, hangtod nga nahimong

napulo ka Visa cards. Sa dihang dili na namo mabayran ang mga utang sa among mga credit card, nangutang na usab mi sa mga financing companies nga adunay grabe ka taas nga interes—28% hangtod 33%—aron lang makapundok sa among pambayad. Apan human namo makuha ang loan, gigamit napud namo pag-usab ang among mga card, ug nagkadako lang ug nagkadako ang among utang! Sa katapusan, napuno ug naputol ang among napulo ka credit cards, naa mi tulo ka financing loans, ug dagkong utang sa buhis nga miabot og sobra libo ka dolyar. Dugang pa, naa pay ubang gagmay nga utang—sa among dentista, sa tiglimpyo sa among sanina, sa among ginikanan nga liboan pud ang utang, sa duha namong sakyanan, sa abang sa among balay, ug daghan pa. Nabuhi ra mi sa komisyon niadtong panahona, ug ang tensyon halos mipatay kanako. Nakasinati ko og panic attacks ug giresetahan og antidepressants, apan wala kini nakatabang.

Halos tanang butang nga among gipang-iya nadaot na. Ang among mga sakyanan nanagan na og sobra sa 200,000 ka milya. Ang among gamay ug karaang balay nga gitukod pa niadtong 1856, nga giabangan namo sa kantidad nga \$300 matag bulan, daghan og problema. Daghan sa karaang mga bintana ang nabali, ug tungod kay wala kami kwarta aron ipatrabaho, among gipapilitan lang og duct tape ang mga liki. Apan dili gihapon kini igo. Ang mga balagon gikan sa gawas misugod og tubo sulod sa mga liki sa bintana. Ang akong asawa, si Drenda, nagaputol na lang niini sama sa usa ka dekorasyon sa balay. Ang karpit sa kwarto sa among mga anak nga lalaki, nakit-an lang namo tupad sa dalan, nga gilabay sa basurahan. Ang ilang mga kutson, gikan sa mga gipanglabay nga gamit sa usa ka balay-alagaan sa mga tigulang. Ang tanang kasangkapan sa among balay gikan ra sa garage sale o sa mga gipanglabay sa ubang balay.

Dili lingaw ang kinabuhi kon matag buntag imong hunahunaon kon unsaon nimo pagpakaon ang imong pamilya. Ang kahadlok mikipot sa akong kinabuhi, ug ang kalipay ug paglaom nawala tungod sa kagubot sa among panginabuhi. Ingon ana ang among kahimtang ni

Drenda sulod sa siyam ka dugay nga katuigan! Siyam ka tuig! Masabtan pa unta nako kon usa lang ka bulan, o kon grabe na gyud, usa ka tuig, apan siyam ka tuig? Pagkahuman sa siyam ka tuig nga ingon ana nga tensyon, ang imong pagbati nahilis na, ug ang pagpailob nawala na gyud.

Sulod sa siyam ka tuig, Kristiyano kami nga kanunay nagsimba sa usa ka maayong iglesia nga nagtudlo nga ang kakabos dili kabubut-on sa Dios alang sa Iyang katawhan. Nagahatag kami sa among ikapulo ug kanunay ming nagahalad, apan bisan pa niana, ang among pinansyal nga kahimtang wala magpakita sa pagkamatinud-anon sa Dios ug sa mga saad sa Iyang Pulong. Aduna koy degree sa Daang Tugon ug nakatambong usab ko og kapin sa usa ka tuig sa Bible School. Nasayod ko nga adunay sayop, apan naglaum lang gihapon ko nga sa ulahi, mausab ra ang among kahimtang. Apan wala—siyam ka tuig nga nagpaabot, apan walay kausaban. Halos adlaw-adlaw, tawagan mi sa mga maniningil sa utang, ug halos nawad-an na gyud kami og paglaum ni Drenda.

Gawas pa niana, ang mga doktor nagsulti nga naa na koy tanang timailhan sa diabetes samtang nag-atubang ko og dagkong problema sa akong panglawas. Walay kwarta, giputol na ang tanang credit cards, ug wala nay pagkaon sa balay. Ang kahadlok naghasol pag-ayo sa akong kinabuhi hangtod nga nahadlok na gyud ko mogawas sa among balay. Ang akong asawa, si Drenda, nagsugod na og hunahuna kon unsaon nila sa mga bata pagbalik sa balay sa iyang ginikanan, kay nagtuo siya nga mawala na ko sa ilang kinabuhi. Apan sa pinakalawom ug pinakalisod nga bahin sa akong kinabuhi, dinhi nagsugod ang kausaban.

Usa ka abogado ang kanunay nagatawag kanako, ug kanunay usab akong magsaad nga mobayad, naglaum nga makahatag ko og bayad, apan wala gayud miabot ang kwarta. Unya niadtong usa ka buntag, sa dihang mitawag siya pag-usab, wala na siyay pagpailob. “Kinahanglan nga naa na ang imong bayad sulod sa tulo ka adlaw, kon dili, ipasaka

nako ang kaso batok kanimo alang sa kantidad nga imong gikautangan sa akong kliyente.” Niadtong higayona, nakamatngon ko nga human na ang pagpakaaron-ingnon. Wala na koy kwarta, ug bisan ang akong pamilya dili na mopahulam kanamo og bisan usa ka sentimo. Sa dakong kawad-on ug kabalaka, misaka ko sa among hagdan paingon sa among kwarto sa gamay nga balay, mihapa sa among higdaanan, ug migula ang akong tingog sa Dios. Apan sa kahibulongang paagi, sa sulod sa akong espiritu, mitubag Siya diha-diha dayon. Una, Iyang gihatod sa akong hunahuna ang usa ka bersikulo nga kanunay nakong madunggan ug mabasa—Filipos 4:19:

***“Ug ang akong Dios magsangkap sa tanan ninyong gikinahanglan sumala sa naghingapin niyang bahandi diha ni Cristo Jesus.”***

“Siyempre, kahibalo ko niana nga bersikulo,” akong ingon sa Ginoo, “apan wala man kini nahitabo sa akong kinabuhi. Wala man matubag ang tanang panginahanglan nako.”

Mitubag ang Ginoo, “Wala koy labot sa kagubot nga imong nasudlan. Naa ka sa imong kahimtang karon tungod kay wala ka pa makakat-on kon giunsa paglihok sa Akong Gingharian.” Dayon, Iyang gisulti kanako ang pipila ka butang pa, apan nakasabot ko sa mensahe: Ang utang dili kabubut-on sa Dios para sa akong kinabuhi. Bisan pa sa akong kalipay nga nakadungog ko sa Ginoo, kinahanglang dawaton nako nga wala ko kasabot sa iyang gipasabot nga “Gingharian.” Aduna ko’y degree sa Bibliya ug nagtuo nga nasabtan ko kini pag-ayo, apan sayop diay ko. Ang unang butang nga akong gibuhathuman ko makadungog sa Ginoo mao ang pagpangita kang Drenda ug pagpangayo og pasaylo kaniya sa kagubot nga akong gidala sa among pamilya. Human niana, nag-ampo kaming duha sa Dios ug nangayo og panudlo kon unsaon pagpanlihok sa Iyang Gingharian. Naghinulsol usab kami sa pagsalig sa utang ug nakadesisyon nga dili na magdepende

sa utang isip pamaagi sa among kinabuhi. Apan, sa tinuod lang, bisan pa og nakahuman ko og eskwela sa Bibliya, misteryo gihapon kanako ang Gingharian niadtong panahona. Ang bugtong higayon nga akong nahinumduman nga gigamit ang pulong “Gingharian” sa Bag-ong Tugon mao ra sa Pag-ampo sa Ginoo.

***“Maghari ka kanamo, ug tumanon ang imong pagbuot dinhi sa yuta sama nga gituman kini didto sa langit” (Mateo 6:10).***

Wala gyud namo masabti pag-ayo kon unsa ang gustong ipasabot sa Dios, apan samtang nagsugod kami sa pagpangita Kaniya, nagsugod usab Siya sa pagtudlo kanamo. Ang unang butang nga among gikinahanglang masabtan mao kon unsa gyud ang usa ka gingharian ug ngano nga gigamit sa Dios kini nga termino. Unsay gusto Niyang ipasabot? Sa among pagpangita og tubag, nakakat-on ko nga ang gingharian dili lang grupo sa mga tawo. Kini usa ka grupo sa mga tawo nga nagapuyo ilawom sa hurisdiksyon sa usa ka gobyerno ug hari. Sa tinuod, ang pulong “gingharian” nagpasabot sa “dominyon sa hari.” Ang dominyon sa hari—ang iyang awtoridad ug mga balaod—ginadaladala sa tanang lumulupyo sa iyang gingharian pinaagi sa iyang gobyerno. Ug dinhi nako nakaplagan ang usa ka dakong susi: Ang Gingharian sa Dios usa ka gobyerno.

Ug ang mga gobyerno adunay mga balaod!

Kita nimo, sama sa kadaghanang Kristiyano, akong gitan-aw ang Dios nga may sayop nga pagsabot kon unsa ang Iyang mahimo. Nagtuo ko nga tungod kay Siya mao ang Dios, mahimo Niyang buhaton bisan unsay gusto Niya, bisan kanus-a Niya gusto. Tingali, sa pagbasa nimo niini, imong hunahunaon nga sayop ko, apan tugoti ko nga ipadayon kini. Tungod kay nagtuo ko nga mahimo sa Dios ang bisan unsa kon gusto Niya, akong gitan-aw ang mga wala matubag nga pag-ampo isip butang nga Iyang gidumili. Kini nga kawalay kasiguruhan sa pag-

ampo nakapahimo kanakong maglaum lang nga matubag kini. Busa, ang dagan sa akong pag-ampo kasagaran usa lang ka pagpangayo ug pagpakiluoy—nanghinaut nga ang akong kahimtang paminawon nga seryoso ug makakuha sa atensyon sa Dios. Apan sa dihang gisugdan sa Dios ang pagtudlo kanako nga ang Iyang tibuok Gingharian usa ka gobyerno nga may mga balaod nga atong makat-onan ug magamit, nalipay gyud ko! Nakakat-on ko nga sa dihang moduol ko kang Cristo, nahimo akong manununod ug lungsuranon sa Iyang daku ug mahimayaong Gingharian!

***“Busa kamong mga dili Judio dili na mga langyaw o mga dumuduong kondili mga kauban na sa katawhan sa Dios ug mga sakop na sa iyang banay”***(Efeso 2:19).

Nahinumdom ko sa pagbasa atong bersikulo ug nakahunahuna, *Aduna diay koy legal nga katungod sa Iyang Gingharian! Tinuod ba nga ing-ana ra kadali? Isip lungsoranon sa Estados Unidos, dili ko kinahanglang mangayo o magpakiluoy sa butang nga daan nang akoa isip lungsoranon. Dili ko kinahanglang makabati og pagtindog sa balhibo aron mapamatud-an nga lungsoranon ko. Natawo ko dinhi. Ug sa dihang natawo ko pag-usab sa Gingharian sa Dios, nahimo kong lungsoranon sa Iyang Gingharian. Nangahulugan kini nga aduna koy legal nga katungod sa tanang balaod ug mga benepisyo nga nasulat diha sa Iyang Gingharian. Nausab pag-ayo ang akong panan-aw sa kalibutan sa dihang gisugdan sa Dios pagpahibalo niini kanako. Kami ni Drenda, sama sa kadaghanang mga Kristiyano, wala gayud makasabot sa Gingharian ug sa mga balaod niini.*

Sa tinuod lang, kasagaran sa mga Kristiyano mosulti og mga butang sama sa, “Gitugotan kini sa Dios, Mas nakahibalo ang Dios, Kontrolado sa Dios ang tanan, o Soberano ang Dios” kon adunay usa ka lisod nga sitwasyon. Kini nga mga komento nagpakita nga ang ilang pagtuo mao

nga adunay gahum ang Dios sa paghatag sa tubag, apan dili Siya buot motabang o wala pa Siya magdesisyon nga mamuhat. Kining sayop nga panghunahuna mahitungod sa Dios resulta sa kakulang sa pagsabot sa Iyang kinaiya ug sa paagi sa paglihok sa Gingharian sa Dios.

Ipasabot ko ang akong gisulti. Kon naa kay usa ka bilyon nga dolyar sa bangko, makaingon ka, “Naa koy usa ka bilyon.” Pero sa tinuod, wala man na sa imong bulsa karon. Ang kwarta anaa sa usa ka institusyon, ug aron makuha nimo kini, kinahanglang mosunod ka sa hustong proseso aron makuha kini. Mao pud ang sa Gingharian sa Dios. Isip mga lumulupyo ug sakop sa iyang panimalay, kita mga manununod sa tanang anaa sa Dios. Apan, adunay mga balaod ug proseso nga atong sundon aron atong makuha ang mga panalangin nga daan nang gitagana para kanato.

Tungod kay kadaghanan wala makasabot sa Gingharian sa Dios ug sa mga proseso ug balaod nga nagapanlihok niini, kon adunay butang nga wala mahitabo sumala sa gisulti sa Pulong sa Dios, kasagaran magtuo ang mga tawo nga ang sayop anaa sa Dios, ug wala sa ilaha.

Ani-a ang akong nasayran: Pananglitan, nakahukom ka nga molukso gikan sa Empire State Building nga walay parachute o bisan unsa, apan nagtuo ka nga kon mokapa-kapa lang kag kusog sa imong mga bukton, makalupad ka nga luwas paubos. Sigurado ko nga nasayod ka sa resulta sa maong binuang nga buhat. Ang rason nga nahibaw-an nimo ang resulta kay nasabtan nimo ang balaod sa grabidad. Nahibaw-an nimo nga ang balaod sa grabidad walay pinalabi, walay pabor-pabor, ug molihok kini sa parehas nga paagi matag higayon, busa sigurado ka sa padulngan. Sa susama nga paagi, kon imong i-on ang switch sa suga, nagdahum ka nga mosiga kini tungod kay nakasabot ka sa mga balaod sa elektrisidad. Kon mosakay ko og eroplano, nagpaabot ko nga molupad kini tungod kay nasabtan nako ang balaod sa pag-alsa. Ang mga eroplano ug suga nagalihok matag higayon tungod kay ang ilang operasyon gibase sa mga balaod nga mahimong tun-an ug sundon aron

makuha ang susamang resulta matag higayon. Sa ingon usab nga paagi, ang Gingharian sa Dios nagalihok nga may parehas nga kasiguruhan.

*Ug makasalig kita sa Dios nga bisag unsay atong pangayoon kaniya sumala sa iyang kabubut-on, dunggon gayod kita niya. Ug kay nasayod man kita nga mamati siya kanato, masiguro usab nato nga iya nang gihatag kanato ang atong gipangayo kaniya.*

—1 Juan 5:14-15

Mao kini ang atong gisaligan. Kon mangayo kita og bisan unsa sumala sa kabubut-on sa Dios, nasayod kita nga Siya nagapaminaw kanato. Ug kon nasayod kita nga Siya nagapaminaw, nasayod usab kita nga atong madawat ang atong gipangayo. Nakita ba nimo? Masaligon ako sa resulta tungod kay ang Hari mismo maoy naghimo sa balaod. Siya usab ang magasuporta sa iyang kaugalingong balaod. Kon miingon ang Kasulatan nga Siya nagapaminaw kanato, wala kini nagpasabot sa pisikal nga pagpaminaw sa atong mga pulong, apan naghisgot kini sa paagi nga ang usa ka hukom maminaw sa usa ka kaso aron magpasiugda og hustisya. Ang hukom wala maghukom base sa iyang kaugalingong pagbati, kondili, anaa siya aron masiguro nga ang balaod matuman alang sa kaayohan sa mga lumulupyo sa gingharian. Busa, daan ko nang nahibaw-an ang resulta sa kaso sa hukmanan bisan wala pa kini nagsugod.

Si Drenda ug ako nakasinati og katingalahang mga butang sa among kinabuhi sa dihang gisugdan namo pag-aplikar ang mga balaod sa Gingharian sa among pang-adlaw-adlaw nga kinabuhi. Sulod lang sa duha ug tunga ka tuig, nahimong hingpit nga gawasnon kami sa utang. Gikan sa pagtungang og usa ka Happy Meal alang sa tulo namong anak, nahimo namong nabayran sa salapi ang bag-ong mga sakyanan ug nakapatukod sa among pangandoy nga balay sa 55 acres nga luna—nga

hingpit usab nga nabayran na. Nagsugod kami og mga negosyo nga hangtod karon nagapadayon sa pagkita og gatusan ka libo nga dolyar matag tuig. Dayon, nagtukod kami og iglesia sa akong lungsod aron ipaambit sa uban ang among nadiskubre mahitungod sa Gingharian sa Dios. Ug nasayran namo nga daghang mga tao ang gustong masayran ug masinati ang maayong kinabuhi nga gitanyag sa Gingharian sa Dios. Tungod sa maayong balita sa Gingharian, ang iglesia sukad niadto mitubo ug nahimong liboan ang miyembro.

Bisan tuod nga halos adlaw-adlaw ko nagtudlo mahitungod sa Gingharian sa bisan kinsa nga maminaw, nagtinguha ko nga makaabot sa usa ka grupo nga wala pa gayod makadungog niini—isip usa ka eksperimento. Nasayran nako nga aron makita ang kausaban sa panghuna-huna sa usa ka tawo bahin sa Gingharian, dili igo ang usa ra ka sesyon; kinahanglan nga masabtan nila ang sukaranan niini. Ang akong ideya nakuha gikan sa akong kasinatian sa pagtubo sa usa ka Methodist nga simbahan. Sa akong pagkabatan-on, adunay semanang pagkapukaw sa kagabhion. Tungod niini, akong damgo nga magtukod og usa ka semana nga pinansyal na pagkapukaw, kon mahimo. Naglaraw ako og lima ka gabii nga sesyon. Wala pa nako matudlo ang Gingharian nga punto por punto sa ingon nga pamaagi, ug naghunahuna ako kon unsaon kini paghan-ay. Apan interesado ko kon unsa ang epekto sa padayon nga pagtudlo sulod sa lima ka sesyon. Tungod niini, nagsugod ko sa pag-ampo nga makaabot sa ingon nga higayon ug nangayo ko sa Dios og oportunidad nga makahimo niini. Ang akong kinahanglanon: ang pagtudlo niini sa usa ka grupo nga wala pa gayod makadungog sa maong mensahe.

Usa ka hapon, nakasugat ko sa akong higala nga usa ka misyonaryo sa Albania. Nag-istorya mi mahitungod sa iglesia ug ministeryo, ug sa kadugayan, niabot among panag-istoryahan sa mga butang nga gipadayag sa Ginoo kanako. Si Larry nagplano sa iyang tinuig nga nasudnong ministeryo nga komperensya sa Albania atong tuiga sa

tinglagas ug giimbitar ko niya isip usa sa mga mamumulong. Wala ko magsulti kaniya mahitungod sa akong tinguha nga magtudlo og lima ka sesyon, apan nalipay ko nga gitugotan ko niya sa paghimo og tulo ka sesyon didto. Siya nag-ingon nga ako ang mogasto sa akong pagbiyahe, apil na ang gasto sa daghang mga pastor nga gustong motambong kay ang Albania niadtong panahona pobre kaayo. Midawat ko sa hagit ug nagsugod sa pagplano sa akong pag-adto sa Albania sa tinglagas sa 2005.

Naabot na gyod ang akong biyahe, ug dako akong kalipay nga makatudlo mahitungod sa Gingharian sa usa ka grupo nga bag-ohay pa lang nakakat-on unsa gayod ang tinuod nga pagka-Kristohanon. Pag-abot nako sa Albania, gisugat ko ni Larry sa airport ug giingnan nga usa sa iyang mga mamumulong mi-cancel, mao nga ako na ang magtudlo sa lima ka sesyon. Nakahibalo ko nga kini usa gayod ka pagpangandam sa Balaang Espiritu! Naa koy mga talaan para sa tulo ka sesyon, apan dali ko nga nag-ampo ug nag-andam sa duha pa ka dugang nga sesyon. Medyo nabalaka ko kon unsa ang ilang reaksiyon kay grabe ang ilang kapobrehon ug daghan kaayong korapsyon sa nasod.

Sa unang sesyon, nabantayan nako nga medyo nagduha-duha pa sila, apan samtang nagpadayon ko sa pagtudlo sa mga butang nga gitudlo sa Dios kanako, uban sa mga sugilanon nga nagpalig-on sa akong giwali, nagmalipayon ug naghinamhinam ang mga tawo. Pag-abot sa akong ikaupat nga sesyon, nagkatawa na sila ug nalipay sa ilang nadungog, ug ang uban gani nagsinggit sa kalipay. Katingad-an lang, nakabati ko sa pagpahinumdom sa Ginoo nga magkuha ko ug halad sa ikalimang sesyon. Murag katingad-an kini kay ako man ang nagbayad para sa daghan kanila aron makaapil sa miting, ug nahibalo ko nga lisod kaayo ang ilang kahimtang sa pinansyal. Apan samtang naghunahuna ko niini, nasabtan nako nga kinahanglan nila mobuhat sa ilang nadungog. Medyo nabalaka ko sa pagsulti kang Larry bahin niini, apan dali ra siyang miingon nga ipadayon lang ang pagkuha sa

halad. Syempre, dili kini para kanako; ang halad magpabilin sa Albania aron makatabang sa mga iglesia didto.

Ning-abot na ang kataposang sesyon, ug nagtudlo ko mahitungod sa paglakang sa imong pagtuo, ug nagpasabot sa pipila ka mga balaod nga akong gipangtudlo. Sa kataposang bahin sa serbisyo, sa dihang nagkuha ko og halad, kalit lang nga nausab ang kahimtang! Ang mga tawo nagsugod og shagit ug sayaw samtang ang presensya sa Dios mipuno sa tibuok awditoryum. Upat ka mga tawo ang nagbarog sa atubangan nga may dala nga mga basket, apan halos dili na sila makatindog. Sila naghilak ug nagkurog tungod sa kusog nga presensya sa Dios samtang ang mga tawo nagdala sa ilang mga halad. Wala pa ko kakita og ingon ana nga panghitabo, ilabi na nga naghisgot kini mahitungod sa paghatag og kuwarta!

Sa among paglakaw gikan sa tigom, naghisgot mi ni Larry kon unsa kami nahingangha sa kusog nga dihog ug sa mainiton nga reaksyon sa mga tawo nianang gabhiona. Pag-abot namo sa balay ni Larry, nahinumdom siya nga wala pa siya nakadawat og duha ka puno nga bag sa paghalad; kasagaran, usa lang ka bahin sa usa ka bag ang iyang makolekta. Tungod sa iyang kahibulong, iyang giablihan ang mga bag ug gipang-ihap ang kuwarta. Sa dihang iyang gibubo ang sulod sa lamesa, kalit lang nga usa ka hayag nga asul nga aso ang mipuno sa kwarto, ug ang dihog sa Dios nga wala pa namo nasinati kaniadto mikunsad kanamo. Wala kami mabuhat gawas sa paglingkod ug pagbati sa presensya sa Dios. Sa akong pagtan-aw sa kwarta sa atubangan namo, akong nabantayan nga may singsing sa kaminyoon nga naa sa tunga sa pundok. Nasayod ko nga ang tag-iya sa singsing usa ka tawo nga walay kuwarta apan naghatag sa tanang iyang mahimo. Sa dihang nakita ko ang singsing, misulti ang Ginoo kanako.

“Gitawag ko ikaw sa mga nasud aron pagtudlo sa Akong kasabutan sa pinansyal nga panalangin, ug bisan asa tika ipadala, Ako ang mobayad sa tanan.”

Naapektohan gyud ko pag-ayo. Sulod sa tulo ka adlaw, dili ko makatulog. Ang dihog nagpabilin kanako sulod sa daghang semana. Sa matag higayon nga makatagbo ko og tawo nga gikan sa laing nasud, akong mabati usab ang maong dihog. Bisan tuod nga ang halad nga nakolekta nabilin para sa mga iglesia sa Albania, pagkahuman sa akong pag-uli, mitawag si Larry kanako ug miingon nga gisugo siya sa Ginoo nga ipadala ang singsing kanako. Nalipay gyud ko pag-ayo. Wala ko magsulti bisan unsa kang Larry bahin sa akong tinguha nga makuha ang maong singsing, apan nakadungog siya sa Dios ug iyang gihatag kini kanako. Gusto ko himoon kining singsing nga usa ka handumanan sa gisulti sa Ginoo kanako, ug karon, kini nakabutang sa akong dingding isip timaan sa maong panawagan.

Pagkahuman nako og uli sa Ohio, adunay usa ka pastor nga higala ni Larry nga nagpastor sa usa ka gamay nga iglesia sa Utah. Nakadungog siya sa nahitabo sa Albania ug mipahibalo kanako kon pwede ba ko moanhi. Ang iyang iglesia anaa sa usa ka Indian reservation, ug iyang giingon nga ang mga tawo didto pobre kaayo. Miingon siya nga ang ilang iglesia aduna lang mga 60 ka miyembro, apan akong gitubag nga walay problema, moanha ako.

Gitudlo nako ang parehas nga lima ka sesyon nga akong gitudlo sa Albania. Wala ko makakita og asul nga kahayag didto, apan ang dihog kusog gihapon kaayo.

Ang halad niining higayona alang man sa akong kaugalingong ministryo, busa akong gisilyohan ang bag sa salapi ug gidala kini pabalik sa Ohio. Pag-abot nako sa akong opisina, akong gihatag ang bag sa akong sekretarya aron iyang ihapon ug idiposito alang kanako, dayon nani-udto ko. Samtang nagkaon ko, mitunog akong cellphone ug nakita nako nga ang numero sa akong sekretarya ang mipakita. Sa dihang akong gitubag kini, wala koy nadungog bisan kinsa sa linya. Samtang hapit na ko mopalong sa tawag, nadunggan nako ang murag paghilak. “Tracy?” akong giingon. Si Tracy mitubag, nagpaningkamot

pagpugong sa iyang emosyon. “Pastor,” miingon siya, “unsa may nahitabo didto sa Utah bahin sa kwarta?” “Unsay imong pasabot nga unsa nahitabo sa kwarta?” “Pastor,” miingon siya, “sa dihang akong giablihan ang bag ug gibubo ang kwarta sa akong lamesa aron ihapon, kalit lang nga nabati ko ang kusog kaayong presensya sa Dios. Nalagpot ko sa salog! Ang usa pa namong sekretarya nakadungog sa kasaba ug nigawas sa iyang opisina aron tan-awon kon unsa’y nahitabo, ug didto dayon siya napuno sa gahum sa Dios! Pastor, unsa man gyud ning kwartaha?” Gipatin-aw nako kaniya kon unsay nahitabo sa Utah ug kon giunsa ko pagdawit sa halad sulod sa kusog nga presensya sa Dios, apan gawas niana, wala nay laing hitabo. Dili ko makapanghimakak nga nadasig ko pag-ayo sa nahitabo, kay wala pa gyud ko makasaksi og ingon ani sa akong kinabuhi. Bisan tuod wala ko makasabot sa tanan, klaro kaayo nga ang presensya sa Dios anaa sa maong kwarta! Tinuod gyud!

Nagsugod kami sa pagdumala og mga komperensya nga gitawag namog Financial Revolution Conferences sa tibuok nasud—sa dagkong iglesia, sa gagmay nga iglesia, bisan asa nga adunay mga taong andam maminaw. Bisan tuod nga panagsa ra namo makita ang asul nga aso, ang presensya sa Dios kanunay nga kusog kaayo. Sama sa nahitabo sa Albania ug sa Indian church sa Utah, ang gahum sa Dios nagpabilin mismo sa halad. Nakapansin ko nga human sa tigom, kon ang kwarta sa halad ihapon na, mahimo nimong gunitan ang usa ka sensilyo gikan sa maong halad ug kalit lang nga magsugod ka og kurog tungod sa gahum sa Balaang Espiritu. Usa pa ka butang nga among *nabantayan mao nga ang matag piraso* sa kwarta o tseke lahi-lahi ang gibug-aton sa presensya sa Dios. Dili sila parehas og kusog sa dihog. Nakakat-on ko sa ulahi nga kini tungod sa pagtuo nga gipagawas sa matag naghalad. Katingalahang butang!

Ang Imong Pinansyal nga Kausaban nga serye sa lima ka libro naglangkob sa lima ka sesyon nga akong gipaabot sa akong unang tigom

sa Albania. Siyempre, mas gipalapdan ang sulod sa mga libro kumpara sa *unang komperensya*. Naglaom ako nga samtang magtuon ka sa Ginghamlan sa Dios, sama sa gibuhat namo ni Drenda, mausab usab ang imong panglantaw sa tanang butang—sama sa among nasinati. Kining maong libro, ang ikatulo sa serye, unang gitawag og Bahandi Pinaagi sa Balaang Espiritu sa Albania. Nagtuo gihapon ko nga kini nga pamahayag tinuod hangtod karon. Ang Balaang Espiritu magahatag kanimo og mga estratehiya nga makapadato kanimo. Ang akong tinguha mao nga pinaagi niining libro, imong masabtan kon giunsa paglihok sa Balaang Espiritu dinhi sa kalibutan aron matuman ang maong mga estratehiya.

## KAPITULO 1

# GUSTO MO KAMING MAGHIMO'G UNSA?

Sa una nakong pag-uli gikan Albania, gubot kaayo akong kinabuhi. Ang epekto sa gibuhay sa Ginoo sa among kinabuhi ug sa giunsa Niya ako pagsulti nga dad-on ko kini ngadto sa kanasuran, medyo bug-at kini. Mga nasud? Ako ang tawo nga misulti kang Drenda sa una namong kasal nga dili gyud ko mobiyahe, ug dili ko gusto nga magmisyon ngadto sa ubang mga nasud. Apan siyempre, ang Dios adunay laing mga plano. Moadto ako sa kanasoran, apan unsaon? Aduna koy negosyo nga ang kadaghanan naglangkob sa Estados Unidos, iglesia nga dumalahan, pamilya nga atimanon, ug daghan pang mga responsibilidad. Wala ko lang makita kon sa unsang paagi ako makaadto sa mga kanasoran. Apan ang Dios adunay plano, usa ka plano nga wala nagkinahanglan kanako nga mobiyahe, usa ka plano nga wala gyud nako mahunahunaan, o gusto nako nga hunahunaon—ang telebisyon.

Wala gayud kami nahibal-an ni Drenda mahitungod sa telebisyon. Niadtong panahona, wala pa gani kami ga-video record sa among mga serbisyo. Apan ang Dios nagsugod sa pagpakita kanamo kon unsa ang moabut ug kon unsaon kini pagbuhay, ug gibati namo ang pagdani sa

pagsulay sa TV. Ang unang butang nga akong nakat-unan mao nga kini nagkinahanglan og salapi, daghang salapi, aron maabot sa TV. Sa dihang gikwenta namo ang tanan, mokabat diay og \$300,000 ang kinahanglanon para sa paglusad sa TV sa unang tuig. Moangkon ko nga medyo nakurat ko sa kamahal sa telebisyon. Ang dako nga problema mao nga ang simbahan aduna nay daghan nga gastohan, labi na sa pagtukod sa Now Center, ang among campus para sa ministeryo, ug wala nay dugang kwarta nga magamit para sa TV. Mao nga miingon ko sa Ginoo, “Wala na gyud mi kwarta para ilansad ang TV karon.” Nahinumdom ko nga murag miuyon Siya kanako ug miingon, “Tinuod, kay kamo bitaw ni Drenda ang magbayad niini!”

Nabalaka kaayo kami kay kami anaa sa usa ka proyekto nga nagkantidad og unom hangtod pito ka milyon ka dolyares para sa pagtukod ug simbahan. Ingnan ta ka, ang proyekto sa Now Center ra daan usa na ka dako nga buluhaton sa pagtuo ug nakagamit sa tanan namong kapanguhaan nga nagaabot. Dugang pa, si Drenda ug ako mipasalig og \$250,000 sa maong proyekto, ug niadtong panahona, ang tanang kwarta wala pa misulod. Unya dugangan pa og \$300,000 sa samang tuig imposible na gyud kayo kini.

Nasayod ko nga ang panaw nga akong giagian mao gayud ang giandam sa Ginoo, ug ang Iyang saad nga magahatag og salapi sa unsa mang paasgi nga Iyang ipadala kanako nagapadayon gihapon sa pagbati sa akong

**NASAYOD KO NGA ANG DIOS  
MATINUD-ANON SA IYANG  
MGA SAAD, UG KABALO  
KO NGA KINAHANGLAN  
KONG MOLAKANG UBAN  
ANG PAGTUA UG MOSALIG  
KANIYA ARON IPAKITA  
KANAKO KON UNSAON KINI.**

espiritu. Pero, sa natural nga panan-aw, bisan unsaon nako pagtan-aw sa mga numero, wala gyud ko makakita og paagi nga kami ni Drenda makabayad nianang \$300,000 nga gidugang sa tanan namong gibuhat. Nasayod ko nga ang Dios matinud-anon sa Iyang mga saad, ug kabalo ko nga kinahanglan kong molakang uban ang pagtuo ug mosalig Kaniya aron

ipakita kanako kon unsaon kini. Unta makasulti ko nga masaligon ko ug wala ko nabalaka bahin niining desisyona, pero dili gyud ingon niana ang akong gibati. Ang iglesia naggamit sa matag sentimo nga mosulod alang sa pagpatukod sa bilding. Ang tanan nakong personal nga kwarta gigamit sa pagbayad sa \$250,000 nga akong gikomita, ug daghan pa kaayong bahin sa akong negosyo ang kinahanglan pondohan nianang tuiga. Wala gayuy bisan unsang salapi nga magamit para sa \$300,000 nga gasto sa pagsugod ug telebisyon!

Si Drenda ug ako adunay gieskedyul nga duha ka semana nga bakasyon sa Hawaii. Pagpauli nako, kinahanglan nakong mopirma sa mga kontrata aron magsugod na sa TV. Nalingaw gyud ko didto, pero sa tinuod lang, lisod ang hingpit nga pagpahayahay tungod kay ang gibug-aton sa desisyon nga akong atubangon inig-abot namo sa balay dili gayud mawala sa akong hunahuna. Gawas pa sa aspeto sa kwarta sa pagsulod sa TV, dili gayud ko andam mobuhat niini tungod kay mura'g kulba kaayo mag-estorya atubangan sa kamera. Makasulti ko sa liboan ka mga tawo sa usa ka miting, pero kon sa atubangan na sa TV camera, mura'g matarantar na ko. Tungod sa tanan nga anaa sa akong hunahuna ug sa akong espiritu, nakigbisog gayud ako batok sa espiritu sa kahadlok nga nagapugong kanako sa paghimo niana nga desisyon.

Bisan pa nga sigurado kaayo ko nga nakadungog ko gikan sa Ginoo, nag-atubang gihapon ko sa kamatuoran nga wala gyud koy kwarta. Ang akong negosyo nahutdan na og pundo alang sa tuig, ug dili nako makita kon unsaon kini mahimong posible. Oo, kahadlok to, ug oo, pagkulang sa pagtuo usab kadto. Kabalo ko ana. Nagmatinud-anon lang ko diri. Nahibal-an nako nga kinahanglan kong huptan ang Pulong sa Ginoo, ipunting ang akong panan-aw sa Iyang mga saad, ug magpadayon nga magtan-awsa posibilidad. Siya mismo ang miingon nga Siya ang mobayad niini! Atol niining panahona, usa ka bulawan nga sensilyo ang nasulod sa among halad. Sa tinuod lang, wa pa gyud ko kakita og bulawan nga sensilyo sa wala pa nako kini mahuptan. Samtang gihuptan nako kini nga

sensilyo, ang Ginoo misulti kanako, “Sama sa akong gipakita kang Pedro kon asa siya makakita og sensilyo aron ibayad sa iyang buhis, ipakita usab nako kanimo kon asa ka makakita og kwarta aron makabayad para sa TV.”

Gidala nako ang bulawan nga sensilyo sa among bakasyon sa Hawaii. Sa dihang naglakaw ko sa baybayon, nag-ampo ko ug nagkupot niana nga sensilyo aron ipahinumdom kanako nga ang Dios nagsulbad sa gasto sa TV. Ang akong mga pag-ampo didto baybayon kasagaran ingon niini: human ko mag-ampo sa Espiritu sa pipila ka minuto, makabaton ko og kalinaw bahin sa pagpirma sa kontrata ug magsugod sa paglakaw balik paingon sa balay. Apan kasagaran, mosaka ra ko og mga 20 ngadto sa 50 ka piye sa bungtod, unya ang akong hunahuna magsugod napud ug singgit kanako, nga daw imposible kaayo. Ang tinuod mao nga wala kamiy kwarta, wala kami kahibalo kon unsaon pagpamuhat sa TV, wala kami’y kagamitan, ug nagpadayon ang listahan sa mga kakulangan. Apan sa akong espiritu, kanunay nakong madungog ang gisulti sa Ginoo kanako didto sa Albania: nga bisan asa Niya ako ipadala, Iya kining bayran. Kana ang akong gisaligan. Ug, tinuod, kinahanglan nakong makab-ot ang \$300,000 sa katapusan sa tuig aron kini mahimong posible, nga naghimo niini nga usa ka dako kaayo nga bukid nga akong kinahanglan tungason pinaagi sa pagtuo.

Ang espiritu sa kahadlok nakigsulti usab kanako, nagsulay sa akong determinasyon nga magpabilin sa gisulti sa Dios kanako. “Nagtudlo ka og pinansyal nga integridad, apan unsa man ang hitsura niini kon dili ka makabayad sa imong mga bayronon?” Busa motalikod ko, molakaw balik sa baybayon, mag-ampo, ug magbag-o sa akong hunahuna pinaagi sa Pulong sa Dios hangtod nga makabaton ko og kalinaw bahin niini. Nagbalik-balik kini, nga nakigbisog ko sa akong hunahuna ug espiritu bahin sa maong kontrata sulod sa usa ka semana. Sa katapusan, nahibal-an nako nga ang tanan mamaayo ra, ug ang kahadlok dili na makadani kanako ngadto sa negatibo nga mga hunahuna. Si Drenda ug ako walay ideya kon asa gikan ang kwarta, apan nahibalo mi nga

nakadungog mi sa Dios. Mao nga sa akong pagpauli, gipirmahan nako ang kontrata ug naglakaw kami uban ang pagtuo aron mahibal-an karon kon unsaon pagpamuhat sa TV.

Mahitungod sa bahin sa kwarta, katingalahan, nakadawat ko og tawag gikan sa usa ka tawo sa Atlanta nga wala nako mailhi, pipila ka bulan sa wala pa ang among bakasyon sa Hawaii. Siya miingon nga nakabasa siya sa akong libro bahin sa panalapi ug giganahan gyud siya niini. Niadtong panahona, ako-ako pa lang ang nagimprenta niini sa akong libro ug wala pa kini gibaligya bisan asa gawas sa among siyudad. Apan mora'g usa sa akong mga empleyado mibakasyon sa Atlanta ug nakig-istorya niining tawhana, nga wala niya tuyo-a mahimamat sa airport. Nahitabo nga gidala sa akong empleyado ang akong libro ug gihatag kini kaniya.

Busa, pagkahuman niya pagbasa sa libro, miingon siya nga interesado gyud kaayo siya ug gusto gyud makigsulti nako. Nagkaistorya mi og dugay, ug iyang gisulti nga siya usa ka nagabiyahe-biyahe nga ebangelista nga nagpunting sa pag-abot sa langyaw nga mga nasud isip iyang pangunang sa listahan nga kab-uton. Nangutana siya kon puwede ba ming magkita, ug akong giingnan siya nga anaa koy plano nga moagi sa Atlanta airport sulod sa usa ka bulan, sa dihang padulong ko sa usa ka miting human sa among bakasyon. Nagkasinabot mi nga magkita. Pag-abot sa among panagkita, nindot kaayo ang among panaghisgot. Nalipay gyud ko sa pagpaminaw sa iyang mga istorya bahin sa mga milagro ug mga kapeligrohan nga iyang nasinatian sa iyang mga pagbiyahe. Apan ang hilisgutan nga nakapaduol namo mao ang panalapi. Mora'g nadani siya sa akong libro ug sa akong istorya kon giunsa nako paglingkawas gikan sa utang.

Atol sa among panag-istoryahanay, giingnan ko niya nga bag-o lang siyang mibalik gikan sa Charlotte, diin siya nahimong usa ka bisita sa usa ka salida sa telebisyon, ug gibati nga ang akong pinansyal nga istorya usa ka maayo nga hilisgotan alang sa samang nga pasundayag. Siya

miingon nga iyang ipasa ang akong libro ngadto kanila ug pahibaloon sila mahitungod kanako. Medyo nakurat ko sa tanan.

Wala pa gani ko makadungog bahin sa programa sa TV nga iyang gihisgotan, apan, tuod man, paglabay sa pipila ka semana, nakadawat ko og tawag gikan sa direktor sa maong programa nga nangutana kon gusto ba ko nga moapil. Usa sa mga kinahanglanon aron makaapil sa maong show mao ang paghatag og produkto nga ilang ipakita sa programa. Busa, giingnan nako sila nga anaa koy lima ka CD nga rekording sa akong pagtudlo sa Pinansyal nga Kagawasan. Miingon sila nga sakto kaayo kana, ug nagkasinabot mi sa presyo sa mga CD nga akong ihatag kanila. Gihatagan ko sila sa serye sa pakyawan nga presyo, siyempre, apan bisan pa sa pakyawan nga presyo, naghatag gihapon ko og gamay nga ginansya alang sa among ministeryo. Katingad-an, ang pasundayag malampuson kaayo, ug nakabaligya kami og liboan ka mga set sa CD. Ang mga halin nagdala og liboan nga kwarta ngadto sa among TV budget, gikan sa usa ka tinubdan nga wala nako mahibal-an sa dihang gipirmahan nako ang kontrata.

Unya, laing makapakurat, usa ka tawo nga gikan sa akong simbahan nga sa una nag-antos sa pinansyal nga bahin ug hapit na mawala sa simbahan pipila ka tuig ang milabay, miadto kanako ug gusto motabang sa pagpondo sa among TV ministry. *Gipraktis niya ang* iyang nadungog nga gisangyaw bahin sa Gingharian ug dili na siya kabos. Gihatagan niya ako og \$120,000 para sa among ministeryo sa TV!

Sa pagkwenta nabaligya nga mga CD, apil ang regalo nga gikan sa akong amigo sa iglesia, ug sa uban pang mga gasa nga miabot, si Drenda ug ako wala na magkinahanglang mogasto pa og bisan unsa gikan sa among kaugalingong kwarta niadtong unang tuig sa TV! Matinud-anon ang Dios sa Iyang pulong. Miingon Siya nga Iyang bayran kini, ug Iya kining gibuhat. Okay, katunga sa problema nasulbad, apan anaa

pa koy laing dakong problema nga kinahanglan husayon. Sama sa akong giingon sa sayo pa, wala akoy kahibalo sa pagsibya sa TV!

Niadlong tinghunlak, si Drenda mitambong sa usa ka dakong komperensiya sa Kristohanong mga babaye, ug giimbitar siya balik sa berdeng lawak diin ang tanang mga bisita nagtapok kaniya taliwala sa mga gihimong panagtigom. Dakong dungog alang kang Drenda ang pagdapit, ug nalipay siya sa pag-adto. Human sa usa sa mga sesyon, samtang naglingkod siya aron maniudto, usa ka babaye nga wala pa niya mahimamat kaniadto milingkod tupad niya. Human sa pagbayloay og gamay nga impormasyon bahin sa usa'g usa, ang babaye kalit nga nangutana, "Sa ato pa, nag-TV na ka?" Si Drenda medyo nahingangha, apan miingon, "Wala pa, apan kami naghunahuna bahin niini." Ang babaye dayon miingon, "Aw kon buhaton nimo, tawga kining tawhana, ug siya makatabang nimo." Gisulat ni Drenda ang numero ug email nga gihatag sa babaye ug gisulod sa iyang pitaka.

Pipila ka semana ang milabay, ug nakalimtan na niya ang papel nga gisulod niya sa iyang pitaka. Apan usa ka gabii, pagkakita niya niini, nakahukom siya nga i-email ang lalaki aron makita kon unsay iyang isulti. Mora'g interesado siya ug nangayo nga ipadala kaniya ang akong Pinansyal nga Kagawasan nga CD set nga among gihimo. Paglabay sa usa o duha ka semana, gitawgan kami sa iyang kauban ug miingon nga interesado kaayo ang tawo ug gusto niyang makigkita sa amo sa umaabot nga tinuig nga komperensiya sa National Religious Broadcasters, nga pipila na lang ka semana mahitabo. Giingnan namo siya nga moadto mi.

Nag-drive mi ni Drenda paingon sa komperensiya ug medyo nagkurog ko sa wala pa ang miting. Nakapalit ko og bag-ong suit nga itom para sa miting ug wala gayud ko kabalo kon unsay mahitabo. Gihangyo kami niya nga magkita sa iyang VIP nga kwarto sa hotel aron hisgutan ang TV. Sa among pagsaka sa kwarto, nahinumdom ko nga naglakaw kami pasaka dayon paubos sa hall sa makadaghan usa pa

mi nituktok sa doble nga pultahan nga kwarto, aron lang makapahulay og gamay. Pag-abot namo sa kwarto, nasurprisa mi kay ang tibuok grupo sa mga tawo naghulat aron makig-istorya kanamo. Ang mga lingkoranan gihan-ay sa porma nga semicircle, ug kami ni Drenda nanglingkod nga nag-atubang sa mga lingkuranan. Wala pa mi makaila sa mga tawo nga anaa didto, pero tanan sila nagsinina nga propesyonal.

Nagsugod mi sa gamay nga panagsultihanay, apan nagsugod sila og pangutana bahin sa among plano sa pagsibya sa TV. Nahinumdom pa ko sa unang pangutana, “Nganong gusto ka mag-TV?” Bisan pa og wala ko kahibalo niadtong panahona, ang mga tawo sa lawak kay mga top level executives gikan sa lain-laing aspeto sa TV production. Ang lalaki nga among kaistorya anaa didto, siyempre, pero anaa usab ang mga tawo gikan sa production, sales, ug uban pa nga nangutana sa mga lisod nga mga pangutana. Sa kinatibuk-an, gibati nako nga maayo ang dagan sa miting. Nahimo lang kaming tinuod, wala magtinguha nga ibayaw ang among kaugalingon, nagpaambit lang sa among istorya bahin sa kon unsa ang gibuhit sa Ginoo kanamo. Silang tanan ingon nga nalipay sa among panan-awon ug gugma, ug sila miingon nga motawag sila kanamo balik sa pipila ka semana aron maghisgot pa og dugang mga detalye.

Busa, sa pipila ka semana, nag-istorya mi pag-usab; ug niining higayona, nagdesisyon kami nga maghimo og aktuwal nga sesyon sa pagplano para sa among TV show. Sa una, nagtuo kami nga mahimo ra ang among show gikan sa among balay, busa ang lalaki nga ginkontak ni Drenda nangutana kon makahimo ba kami magkita sa among balay para sa sunod nga meeting. Gusto niya tan-awon ang among balay aron makita kon pwede ba kini magamit.

Busa, miabot ang adlaw nga miadto siya sa among balay, ug kaming tanan nanglingkod aron mag-istorya. Hangtod niining panahona, wala gyud ko mahibalo kon unsay iyang kasinatian sa TV, gawas sa babaye nga nakatambong sa meeting ni Drenda nga naghatag sa iyang numero.

Apan samtang nanglingkod kami, gisugdan niya pag-istorya ang tanan niyang mga TV shows nga iyang nahimo ug karon ginahimo pa. Ang mga pangalan sa mga shows, mga sikat nga pangalan! Milingkod ko didto sa kahingangha, “O Dios, giunsa nimo pagdala kining tawhana gikan sa Los Angeles, paingon sa akong balay dinhi sa gamay ug hugaw nga dalan sa nasod, sa tunga sa awaaw nga dapit?” Miuyon siya nga buhaton ang tibuok show alang kanamo, mag-shoot, mag-edit, ug maghimo niini sa usa ka patas nga presyo. Nagkasabot sab ming tanan nga ang shooting sa show himuon sa among balay, sa among sala, aron sa pagsugod.

Niabot ang unang adlaw sa taping, ug moangkon ko nga gikulbaan ko niini. Sa ako nang giingon, wala koy kasinatian sa TV. Wala ako kahibalo kon unsaon pagpahimutang sa usa ka programa sa TV, wala gyud ako nakigsulti sa usa ka camera kaniadto; bag-o kini tanan kanako. Naghinam-hinam ko nga ipagawas ang akong istorya sa Ginghamarian, apan ang TV maoy laing makahahadlok nga sukdanan sa akong kinabuhi nga kinahanglan nakong daogon.

Ang nakapait pa jud, adunay usa ka makasubo kaayo nga nahitabo sa adlaw sa taping, nga nakapalisod pag-ayo nianang adlaw. Ang producer nga gipadala aron mag-film sa tibuok semana nga taping, kalit nga mibiya sa tungang gabii. Subo kaayo, ang iyang gamay nga anak naligsa ug napatay sa sakyanan sa ilang silingan samtang nag-atras kini. Gipatin-aw sa katabang kon unsa ang nahitabo, ug nagdesisyon kami nga dili isulti kini kang bisan kinsa hangtod matapos ang taping. Apan sa unsang paagi, nakaya ra gihapon namo. Nakahuman mi og tulo ka episodes nianang adlaw, ug opisyal na mi nga maka-TV. Wow!

Sa dihang nagsugod mi sa among programa sa TV, wala gyud mi kabalo kon unsaon pagpadayon sa pagbayad sa airtime human kini magsugod. Apan, gisugdan sa Dios ang pagtudlo kanamo nga dili lang Siya mohatag ug \$300,000 nga among gikinahanglan aron makasugod, apan Siya mismo magpadayon sa paghatag alang sa among airtime.

Daghan kaayo mig nakat-unan. Kabalo ka, wala gyud namo damha nga adunay mga tawo nga gusto nga mosuporta sa among ministryo sa TV—pirti gyud namo ka inosente.

Nahinumdom ko nga mitawag si Tracy, ang akong sekretarya, gikan sa opisina sa dihang nagsugod na ang among programa sa TV. Pagtubag nako, mura'g naulaw siya ug medyo nagkurog ang iyang tingog. “Pastor,” ingon niya, “adunay usa ka tawo nga nakakita sa programa ug nagpadala kanato og tseke nga \$500. Pastor, sa dihang gikuha

**“ADUNA BAY USA  
KANINYO NGA ANAA  
SA KASAMOK?  
KINAHANGLAN NGA  
MAG-AMPO SIYA”**

**—SANTIAGO 5:13**

nako ang tseke, gibati nako ang parehas nga pagdihog sa kwarta nga imong gibalik gikan sa Indian Reservation.” Nakurat ko ug miingon, “Seryoso ka? Aduna diay nagpadala kanato og kwarta?” Wala gyud nako damha nga adunay mga tawo nga mosuporta sa sibya pinaagi sa pagpadala og kwarta hangtod nga nakita nako ang tseke. Apan, himaya sa Dios, sukad niadto nagpadala na ang mga tawo. Karon, ang among programa makita sa tibuok kalibutan matag adlaw ug sa tanang time zone! Bisan pa nga ang among bayronon mitubo ngadto sa minilyon matag tuig, ang Dios kanunay nagtuman sa Iyang saad. Kanunay gayud Niyang gibayran ang balayronon.

Kini nga libro mahitungod sa pagpaminaw ug paggiya sa kinabuhi pinaagi sa Espiritu sa Dios. Ang among kasinatian sa TV usa ka maayong pananglitan kon giunsa sa Balaang Espiritu paggiya sa mga tawo aron makabuhat og dagkong butang nga ilang gihandom nga mahitabo. Ang tanan nga nahimo sa Dios sa among kinabuhi naggikan sa among abilidad nga dili lang masabtan kon giunsa paglihok sa Iyang Gingharian, apan usab sa among pagkat-on sa pagpaminaw sa Iyang direksyon, kaalam, ug mga tubag nga atong gikinahanglan. Ang istorya nga akong gisulti kanimo dili unta mahitabo kon wala ko makakat-on sa pagpaminaw sa Balaang Espiritu. Usahay, kitang tanan moabot

sa lisod nga mga kahimtang nga daw walay paglaom. Apan ang Dios kanunay adunay tubag.

*“Aduna bay usa kaninyo nga anaa sa kasamok? Kinahanglan nga mag-ampo siya” (Santiago 5:13).*

Nganong mag-ampo man? Kay kinahanglan nimo madungog ang tubag, direksyon, ug solusyon sa imong mga problema. Sama sa among nasinati ni Drenda, sa daghang higayon na, ang Dios makahimo og labaw pa sa atong mahunahunaan kon nag-atubang kita og kalisod. Siya mohatag kanimo og talagsaon ug usahay katingad-an nga mga solusyon ug estratehiya aron imong mabuntog ang mga sitwasyon nga daw imposible sulbaron. Sa daghang higayon, ang imong abilidad sa pagpaminaw sa tubag mahimong kalainan tali sa kalampusan ug kapakyasan, kinabuhi ug kamatayon. Niini nga libro, maghisgot ako og daghang butang mahitungod sa pagpaminaw sa tingog sa Balaang Espiritu, apan usa kana, tugoti ako nga mohatag kanimo og laing pananglitan kon unsaon sa Balaang Espiritu ang pagtabang kanimo sa lisud nga mga panahon.

Sa dihang among gilusad ang proyekto sa pagtukod sa Now Center—usa ka proyekto nga nagkantidad og \$6.5 milyon—nakatigom kami og \$2.5 milyon nga cash sa sinugdanan ug nakakuha usab og pautang sa bangko. Dugang pa niana, nagpadayon ang pag-abot sa pundo sulod sa 18 ka bulan nga gitukod ang proyekto. Kini usa ka dako nga hagit alang sa usa ka iglesia nga adunay 550 ka mimbro. Nagsugod kami sa pagkonstruksyon niadtong tinglarag sa tuig 2007, ug maayo ang dagan hangtod sa tingpamulak sa tuig 2008. Kon mahinumduman nimo, usa kadto ka lisod nga panahon sa ekonomiya. Aw, mao nang panahona mi nagtukod sa tunga-tunga sa krisis! Misaka pag-ayo ang presyo sa tanang materyales! Ang among gasto sa asero misaka og kapin sa \$300,000 nga labaw pa sa orihinal nga presyo. Usa lang kana nga pananglitan! Tungod sa pagsaka sa presyo sa panaliton, milapas sa budget ang tibuok proyekto nianang tuiga.

Sa pagtapos sa tuig 2008, ang mga bangko sa among lugar, ug sa tibuok nasud, nagbitad sa ilang mga linya sa pautang ug nanawagan sa mga utang samtang nagkalawom ang krisis sa ekonomiya. Usa ka adlaw niining panahona, ang among magtutukod mianhinamo aron mangayo og bayad nga giaprobahan na unta daan sa among bangko. Kinahanglan niya nga mabayran ang iyang mga subcontractor ug uban pang mga utang nga giabaga na niya. Ang tseke nga nagkantidad og usa ka milyon ka dolyares maoy gikinahanglan aron masakop ang panalapi nga giandam na unta sa bangko, tungod kay nahurot na ang among pondo niadtong panahona. Apan, sa kalit lang, walay tseke nga magamit! Nakurat mi pag-ayo sa pagkahibalo nga gi-withdraw sa bangko ang ilang tanyag ug gisirado ang ilang linya sa pautang. Ug dili lang kini sa among bangko—tanang bangko sa among lungsod nahimong parehasang sitwasyon. Nianang semanahona, ang mga headlines sa lokal nga pamantalaan nagpakita sa among bangko sa atubangan nga panid. Bag-ohay lang nila gitangtang ang 550 ka mga empleyado ug nakigbisog aron maluwas gikan sa pinansyal nga krisis.

Sa makausap, ang isyu mao nga ang among magtutukod kinahanglan mobayad sa iyang mga subcontractor ug mobayad sa mga materyalis nga iyang nagamit na. Kining usa ka milyon ka dolyares nga tseke dili alang sa usa ka butang nga iyang gikinahanglan pa sa umaabot. Nagasto na niya ang maong milyon! Karon, adunay ubang mga kompanya ug mga pamilya nga nanginahanglan kanamo nga mobayad sa among tigtukod aron siya makabayad kanila. Sama kanamo, nagtuo siya nga ang bangko magpadayon sa pagsuporta sa ilang gipasalig. Karon na unsa naman? Unsay imong buhaton kon moabot ka sa panahon nga ingon niini? Wala koy usa ka milyon ka dolyares, ug dili ko gusto nga magpakilimos sa mga tawo sa among simbahan alang sa kwarta. Gawas pa niana, nagkamahal ang gasto sa TV kay mipalapad kami sa daghang mga network; ang among airtime karon nagkantidad na og \$50,000 kada bulan. Unsa pa may atong mahimo gawas sa pagbuhat sa giingon sa Santiago 5:13—mag-ampo!

Nahitabo nga nakadaog mi'g laing biyahe paingon sa Hawaii pinaagi

sa akong negosyo niadtong panahona. Akong nahibaw-an nga gibira na sa bangko ang pautang pipila lang ka adlaw sa wala pa mi mobiya. Sa akong pag-agi sa airport aron makasakay sa among flight paingon sa Maui nga sa tinuod lang, medyo nakurat pa ako. Ang akong hunahuna nagdagan og usa ka milyon ka milya matag oras. Apan samtang naglakaw ko sa airport, samtang gitintal nga maluoy sa akong kaugalingon, nakadungog ko sa tingog sa Ginoo. Miingon siya, “Ipataas ang imong Sungkod!” Samtang mihunong ko ug namalandong sa gustong isulti sa Ginoo kanako, kalit kong nasabtan.

Mao gyud ni ang gisulti sa Dios kang Moises sa dihang ang Israel walay dalan maadtoan ug ang kasundalohan ni Paraon nagasunod kanila padulong sa Pulang Dagat. Gisultihan sa Dios si Moises nga ipataas ang iyang sungkod ibabaw sa dagat, ug sa dihang iyang gibuhat kini, ang dagat nabahin ug nakahatag ug dalan para sa Israel aron makagawas ug makalabay. Ang sungkod nga gihawiran ni Moises nagpasabot sa mga saad nga gihatag sa Dios kaniya, ug usab sa gahum nga gihatag sa Dios aron tapuson ang trabaho.

Nakabalo ko kon unsa ang gisulti sa Dios kanako niadtong panahona. Ako ang pangulo, ang pastor sa among iglesia; Gihatagan ko og awtoridad sa pag-atubanganing asitwasyon. Kinahanglan nakong gamiton ang akong awtoridad, magbarog, ug mangita og solusyon. Pag-abot namo sa Hawaii, ang akong mahimo lang mao ang pag-ampo. Dili ko makatulog sa gabii. Ang akong espiritu naglisod, ug kabalo ko nga nagpakigbisog kosa Espiritu aron makuha ang tubag nga akong gikinahanglan. Sakataposan, si Drenda nakahuna-huna og usaka ideyang iyang gituohang ikansa Ginoo. Salamat sa Ginoos akong asawa! Gigamit siya sa daghang higayon sa pagpangita og mga plano ug direksyon nga akong gikinahanglan sa tanang sitwasyon. Dili nako masulti kon unsa siya ka bililhon ug kon unsa ko siya ka mahal. Wala gayod siya miundang!

Yano pero lawom ang plano Niya. Walay klaro nga indikasyon nga mosalir kini, pero nagsugod mi sa pagtrabaho niini dayon. Ang plano

mao ang paghimo og presentasyon nga ihatag namo sa bangko sa among magtutukod, dili sa among bangko, aron mangayo og loan. Ang among presentasyon magpakita sa bangko kon kinsakami ug nganong ang loan ang pinakamaayo alang kanamo. Usa kini ka dako nga hagit, kay sama sa akong giingon, ang tanan nga bangko sa lungsod nagsira na sa ilang mga pautang. Ang anaa sa among huna-huna mao nga kon dili mabayran ang among magtutukod, siya mismo ang mahimong magdeklarar sa pagkabangkarote, nga magbutang sa tanan niyang utang sa pagkapeligro. Sigurado kami nga kini usa ka mahal nga negosyo para sa iyang bangko, nga sigurado kami nga dili nila gusto. Ug usab, dili kini among bangko, ug wala silay kasaysayan o relasyon kanamo.

Mao nga naghimo kami og usa ka flip chart nga nagpakita sa mga demograpiko sa among lugar ug kon unsa ka paspas ang pagtubo niini. Gipakita namo sa bangko ang among kasaysayan ug ang mga plano para sa umaabot nga pagtubo. Gi-apil usab namo ang mga paagi nga ang among biding mokita gawas sa among mga serbisyo sa simbahan, sama sa kon unsa ka paspas ang pagtaas sa among kita sa TV ug uban pang mga butang nga among gihunahuna nga makapainteres kanila. Gusto namong masiguro nilang kami usaka dakong oportunidad nga makapaganansya sa bangko, bisan pa man sa kalisod sa mga panahon. Gusto usab namo ipakita nga kon dili mabayran ang nagtukod, mahimo nga magka-problema sila sa mga kapildihan nga gusto namo nga malikayan. Naghangyo kami nga makigkita sa bise-presidente sa bangko nga nagdumala sa commercial loan division. Nag-ampo kami ug milakaw padulong sa iyang opisina, masaligon nga kabalo kami nga kini ang plano nga gihatag sa Espiritu Santo, ug nag-apila kami.

Katingad-an, human sa among presentasyon, gihangyo sa opisyal ang iyang sekretaryo nga maghimo og tseke para sa simbahan nga \$500,000 aron among madala. Miingon siya nga ang iyang gibuhad dili ordinaryo ug dili parehas sa kasagaran nga buluhaton. Wala siya maggamit og underwriting, walay mga dokumenta, usa ka tseke nga \$500,000. Miingon siya nga ang

laing \$500,000 kinahanglan pa og underwriting, apan mipasalig siya nga mulampos kini kay siya ang nagdesisyon, ug nahuman gayud. Gibayran namo ang among magtutukod og usa ka milyon nga dolyares ug nahuman ang bilding.

Lisod isulti kanimo kon unsa ang gibati namo ni Drenda sa usa ka oras nga biyahe pauli sa among balay nga adunay \$500,000 nga tseke sa among bulsa. Kami nalipay kaayo ug mibati nga maayo! Wala'y pulong nga tukma nga makahulagway sa among gibati niadtong higayona, apan kami nahingangha sa bag-o lang nabuhat sa Balaang Espiritu. Ang unang tawo nga among gitawagan mao ang among magtutukod. Mabatian ko gihapon ang kalipay sa iyang tingog samtang gisugid namo ang maayong balita. “Unsay inyong gibuhat?” siya miingon. “Gihatagan kamo nila dayon og tseke?” Kaming duha nahibalo nga ang Dios kini.

Giunsa kini pagkahitabo? Ang Balaang Espiritu! Ang Dios adunay mga tubag nga imong gikinahanglan, higala. Kon gusto nimo nga makuha angkatingad-an ngapotensyal sa Gingharian sa Dios, kinahanglan nimong makat-onan kon unsaon sa pagpaminaw sa Balaang Espiritu. Ug mao kana ang bahin niini nga libro.

Ang paglakaw uban sa Balaang Espiritu sa mga sitwasyon mas makapahinam kay sa bisan unsang James Bond nga salida nga imong nakita! Ugsamasa salida, nahibal-an nimo kanunay kon kinsa ang moda og sakatapusan, bisan kon pilapaka tensiyonadong mgahigayon ang muabot.

**KON GUSTO NIMO NGA  
MAKUHA ANG KATINGAD-  
AN NGA POTENSIAL SA  
GINGHARIAN SA DIOS,  
KINAHANGLAN NIMONG  
MAKAT-ONAN KON  
UNSAON SA PAGPAMINAW  
SA BALANG ESPIRITU.**



## KAPITULO 2

# ANG GINGHARIAN

Sigurado ko nga nakadungog ka sa daghang mga walay pulos nga kaso nga gisampa nga dayon gibasura sa korte. Ania ang usa ka pananglitan.

Usa ka preso sa usa ka prisohan sa Colorado ang nagsampa og kaso alang sa kapin \$88 bilyon (oo, bilyon) batok sa National Football League. Ang kaso naggikan sa usa ka desisyon nga gihimo sa mga opisyal atol sa usa ka play-off nga dula tali sa Dallas Cowboys ug Green Bay Packers. Ang mga opisyal nagpanghimatuod nga ang usa ka pagsalo nga gihimo ni Dez Bryant (sa Cowboys) dili kumpleto. Ang preso wala miuyon. Ang iyang kaso nag-angkon nga ang mga opisyal sa NFL naglihok nga walay pagtagad ug nakalapas sa ilang fiduciary duty. Ngano nga ang preso nagsampa og kaso alang sa \$88 bilyon? Ang numero sa jersey ni Mr. Bryant kay 88. <sup>1</sup>

Grabi kaayo, diba? Sa akong hunahuna, ang tanan makasabot nga ang kaso walay kapadulngan. Apan unsa man ang magdeterminar kon ang usa ka kaso balido o dili? Bueno, sumala sa law.com, ang duha ka pinakarason nga ang usa ka kaso mabasura gikan sa korte mao kon adunay isyu sa hurisdiksyon o wala kini'y legal nga basehan nga masandigan sumala sa balaod. Ngano man nga naghisgot ko og mga legal nga isyu sa usa ka libro bahin sa Espiritu Santo? Tungod kay

kon gusto nimo nga makita ang paglihok sa Espiritu Santo sa imong sitwasyon, kinahanglan nimong masabtan kon unsay giingon sa balaod. Ang Gingharian sa Dios sama niana, usa ka gingharian, nga naglihok sulod sa mga utlanan sa mga balaod sa Gingharian. Sa akong duha ka naunang mga libro niini nga serye, *Ang Imong Pinansyal nga Kagawasan: Ang Gahum sa Pakigsaad* ug *Ang Imong Pinansyal nga Kagawasan: Ang Gahum sa Kapahulayan*, akong gipakita ang mga sukaranang prinsipyo kon giunsa paglihok sa Gingharian sa Dios bahin sa hurisdiksyon ug balaod. Apan aron masabtan ang akong ginasulti bahin sa Espiritu Santo, maayo nga mobalik kita ug pahinumduman ang atong mga kaugalingon niini nga mga prinsipyo. Sugdan nato sa usa ka quiz.

*Miingon si Jesus kanila, “Ang propeta tinahod bisan asa gawas sa iyang kaugalingon nga lungsod ug sa iyang mga paryente ug panimalay.” Dili siya makabuhat og mga milagro didto, pagtapion sa Iyang mga kamot sa pipila ka mga masakiton ug pag-ayo kanila. Ug nahibulong Siya tungod sa ilang pagkawalay pagtoo.*

—Marcos 6:4-6

Mahimo ba nimong isulti kanako kon ngano nga si Jesus dili makapaayo sa mga tawo niini nga bahin sa kasulatan? Ang kasagaran nga tubag sa relihiyon mao nga tingali kabubut-on sa Dios nga dili sila ayohon. Sa katapusan, ang Dios maoy labing nasayod, ug kon gusto Niya nga ayohon sila, mahimo kini Niya, di ba? Ang akong pasabot, Siya man Dios. Di ba adunay mga tawo didto nga nagkinahanglan sa kaayuhan apan wala makadawat sa ilang milagro? Sa akong hunahuna, klaro usab kini sa teksto nga atong gibasa. Ang paghibalo sa tubag kon ngano nga si Jesus dili makapaayo sa mga tawo usa ka mahinungdanon nga pangutana, butang nga kinahanglan tubagon. Kon atong basahon ang konklusyon sa istorya, makita nato nga giingon ni Jesus nga ang

kakulang sa pagtuo sa mga tawo ang nakapugong kanila sa pagdawat. Aron masabtan ang obserbasyon ug konklusyon ni Jesus kon ngano nga ang mga tawo wala makadawat, kinahanglan nato nga adunay maayong pagsabot kon unsa ang pagtuo ug ngano kini gikinahanglan sa yuta aron ang langit makaangkon og legal nga hurisdiksyon dinhi.

Tugoti akong sumahon ang isyu niini nga kaso. Dili kini tungod sa kakulang sa gahum, o kon kabubut-on ba kini ni Jesus. Ang isyu mahitungod sa hurisdiksyon. Sa tinuod lang, ang langit walay legal nga basehan aron molihok sa maong sitwasyon alang sa kadaghanan sa mga tawo didto. Karon, sa dili pa nimo ilabay kini nga libro sa kwarto nga nag-ingon nga wala kay ideya sa akong ginasulti, hatagi ko og usa ka minuto aron ipasabot kini.

Sa dihang gibutang si Adan ug si Eba sa yuta, sila adunay hingpit ug bug-os nga awtoridad sa kalibutan. Sa akong hunahuna, ang mosunod nga teksto klarong nagpalig-on sa akong pahayag.

*Gihimo mo siya nga mas ubos sa mga anghel; gikoronahan mo siya sa himaya ug dungog ug gibutang ang tanan sa ilawom sa iyang mga tiil. Sa pagbutang sa tanan sa ilawom niya, wala magbilin ang Dios og bisan unsa nga dili ilalom kaniya.*

—Hebreohanon 2:7-8

Hibaloi nga ang Bibliya nag-ingon nga si Adan gikoronahan sa himaya ug dungog. Ang termino nga gikoronahan dinhi nagpasabot sa usa ka lugar sa awtoridad diin si Adan nagdumala, dili siya aktwal nga nagsul-ob og korona sa Tanaman. Apan mahimo natong hunahunaon nga adunay posibleng hayag o lignin nga puti nga daw suga kaniya. Si Adan adunay himaya (dihog ug kadunggan sa Ginghamarian) ug dungog (posisyon sa awtoridad) sa Ginghamarian sa Dios. Ug gikan niining duha ka butang, siya nagdumala sa yuta, uban sa gihatag nga awtoridad, alang sa Ginghamarian sa Dios. Si Satanas, nga anaa na sa

yuta sa dihang gihimo ang tawo, nagdumot sa tawo ug nagtinguha sa awtoridad nga iyang nadawat. Nahibalo siya nga dili niya makuha ang korona sa awtoridad ni Adan, tungod kay si Adan adunay hingpit nga awtoridad ibabaw kaniya, kinahanglan niyang maghimo og usa ka pagpanikas aron si Adan boluntaryong itugyan ang korona (awtoridad) kaniya.

Busa, gilimbongan ni Satanas si Eba, ug si Adan misunod, nagrebelde batok sa Dios, hinungdan sa pagkawala sa ilang posisyon sa Gingharian sa Dios. Sa pagsunod kang Satanas, sila karon nahulog sa hurisdiksyon sa iyang gingharian. Tingali mangutana ka, “Ngano nga gitugotan sa Dios si Satanas nga mosulod sa Tanaman sa Eden?” Tungod kay gikinahanglan. Nasayod ko nga basin makurat ka gamay sa maong tubag, apan makita nimo nga tinuod kini. Tan-awon ta kadiyot ang Genesis 2:8-9.

*Karon ang Ginoo nga Dios nagtukod og usa ka tanaman sa sidllakan, sa Eden; ug didto niya gibutang ang tawo nga iyang gihimo. Ang Ginoo nga Dios naghimo sa tanang klase sa mga kahoy nga motubo gikan sa yuta—mga kahoy nga makapahimuot sa mata ug maayo alang sa pagkaon. Sa tunga sa tanaman anaa ang kahoy sa kinabuhi ug ang kahoy sa kahibalo sa maayo ug dautan.*

Sa pagbasa niini nga bahin, mahimo kitang maghunahuna nganong gibutang sa Dios ang Kahoy sa Kahibalo sa Maayo ug Dautan sa tunga-tunga sa Tanaman nga tupad sa Kahoy sa Kinabuhi. Sa kinatibuk-an, aron mahimong legal alang sa Dios nga mosulod sa teritoryo ni Satanas, kinahanglan nga hatagan sa Dios ang tawo og kapilian nga magsilbi kaniya o ni Satanas. Ang Ginoo dili basta lang makasulod sa hurisdiksyon ni Satanas sa legal ug ibutang dayon ang tawo didto. Aron mahimong legal, kinahanglan nga adunay kapilian ang tawo kon kang

kinsa siya gustong mopasakop. Hangtod nga ang tawo mopili sa Dios, sa Kahoy sa Kinabuhi, ang tawo magahari ibabaw ni Satanas. Busa ang Kahoy sa Kaalam sa Maayo ug Dautan kinahanglan ibutang tupad sa Kahoy sa Kinabuhi. Ania ang usa ka importante nga obserbasyon nga kinahanglan natong buhaton. Dili mahimo nga ang tawo ibutang sa yuta nga walay kagawasan sa pagbuot. Nasayud ko, kadaghanan sa mga Kristohanon nag-ingon nga gihimo kita nga adunay kagawasan sa pagpili aron makita sa Dios kon kinsa ang nahigugma kaniya. Siguro, mahimo kong mouyon nga adunay gamay nga kamatuoran ang maong pahayag. Apan, sa kinatibuk-an, kini mahimong ilegal kon walay katungod sa pagpili. Kon ang tawo wala gihatagan og kagawasan sa pagbuot, dili siya mahimong ibutang dinhi. Daghan pa ang akong maapil niini nga diskusyon, apan kini nahisgutan na sa akong duha ka naunang mga libro.

Busa gipili ni Adan ang limbong ni Satanas, nawala sa Ginghamarian sa Dios, ug gisaway sa Dios ang tawo sa Genesis 3:17-19:

*Tinunglo ang yuta tungod kanimo; pinaagi sa malisod nga paghago, magakaon ka gikan niini sa tanang mga adlaw sa imong kinabuhi. Kini magapaturuk usab kanimo ug mga sampinit ug mga kadyapa; ug magakaon ka sa mga hilamon sa kapatagan. Pinaagi sa singot sa imong agtang magakaon ka sa imong pagkaon hangtod nga mobalik ka sa yuta.*

Sa kinatibuk-an, gisulti sa Dios kang Adan nga siya, si Adan, ang nakapadapat og tunglo sa yuta. Tungod kay si Adan adunay hingpit nga pagdumala ibabaw sa yuta, siya mao ang nagbukas sa pultahan alang sa pagmando ni Satanas ug sa maong paagi, iyang gipahawa ang Dios. Napugngan na karon ang mga kamot sa Dios, ug si Adan nabuhi na pinaagi sa iyang malisod nga pagpaningkamot ug pagpatulo ug singot. Apan, adunay usa ka gamayng detalye nga nalimtan ni Satanas isulti

kang Eba samtang gitintal siya ni Satanas. Ug nahukman na sa Dios si Satanas niadtong panahona, gipapahawa na siya sa langit, ug gipahayag nga ang iyang walay katapusang puloy-anan mao ang usa ka dapit nga gitawag og imperno. Importante nga masabtan nimo kini. Daghang mga tawo ang mosulti, “Unsaon man sa usa ka mahigugmaong Dios nga itambog ang mga tawo sa usa ka dapit nga gitawag og impiyerno?” Dili siya, si Adan ang nakahimo niini. Sama sa atong makita sa mosunod nga teksto, ang imperno wala gayud gihimo para sa tawo.

*“Unya siya mag-ingon ngadto kanila nga anaa sa iyang wala, Pahawa gikan kanako, kamong mga tinunglo, ngadto sa walay katapusan nga kalayo nga giandam alang sa yawa ug sa iyang mga anghel”* (Mateo 25:41).

Sa dihang si Adan ug si Eba nahulog sa hurisdiksyon ni Satanas, sila usab karon nahulog sa paghukom ni Satanas. Ang tibuok kaliwatan sa mga tawo nahiagom sa dominyon ni Satanas pinaagi kang Adan. Hunahuna-a ang pag-atiman og baka. Kon ang usa sa imong mga baka manganak, ang maong anak nga baka patikan sa imong tatak kay ikaw ang tag-iya niini tungod kay ang tibuok kawan sa mga baka imong gipanag-iya. Busa ang tanan nga mga kaliwat ni Adan awtomatikong nahulog sa hurisdiksyon ni Satanas. Ang kasagaran nga pagsabot sa anaa sa relihiyon, o mas maayo siguro akong ingnon nga ang anaa sa kakulang sa pagsabot, nga ang kapalaran sa usa ka tawo, kon langit ba o impiyerno, nakabase sa ilang kaayo o pagkadautan, kini usa ka sayop nga konsepto. Ang tinuod niini, ang hukom kanila natakda na. Silang tanan paingon sa impiyerno. Dili tungod sa bisan unsang butang nga ilang gibuhathat nga sayop kon dili tungod sa gibuhathat ni Adan. Karon, tungod sa gugma sa Dios alang sa mga lalaki ug mga babaye nga iyang gihimo, nagbutang siya og plano sa pagluwas pinaagi ni Jesu Cristo

nga nagtugot sa mga lalaki ug mga babaye nga makalikay sa maong paghukom ug mauuli balik sa hurisdiksyon sa Ginghamarian sa Dios.

*“Siya mao ang nagluwas kanato gikan sa kagahum sa kangitngit ug nagdala kanato ngadto sa ginghamarian sa iyang Anak nga pinalangga” (Colosas 1:13).*

Kinahanglan nga atong mahibal-an nga ang Dios nakahimo og usa ka legal nga paagi sa pag-ikyap gikan sa hurisdiksyon ug paghukom ni Satan. Apan aron mapuslan kini, ang matag lalaki, babaye, ug bata kinahanglan nga personal nga angkunon kini pinaagi sa pagtawag sa ngalan ni Jesus. Mga Kristohanon, paminawa ko sa usa ka higayon. Kanang maayon nga babaye nga ana sa dalan mosantop kana siya sa impierno gawas kon adunay mosulti kaniya nga tawagon niya ang ngalan ni Jesus sa dili pa siya mamatay. Daghan ang mga maayong tawo sa impierno. Kini ang bakak ni Satan nga naghunahuna ang mga tawo nga makalikay sila sa impierno tungod sa pagbuhat og maayong mga butang. Ang ngalan ni Jesus mao ra ang ngalan nga gihatag sa mga lalaki ug mga babaye alang sa kaluwasan ug aron makalikay sa paghukom ni Satan. Gusto usab nako nga ipasabot nga sa dihang nahulog si Adan, siya namatay sa espirituhanon ug nahimulag gikan sa Dios; bisan pa, nagpadayon gihapon siya sa iyang legal nga trabaho sa yuta mismo. Tungod kay mao kini ang kahimtang karon, kinahanglan ni Satan nga gamiton ang mga tawo nga gipangulohan sa mga demonyo, ug kinahanglan nga gamiton sa Dios ang mga tawo nga napuno sa Espiritu aron magbuhat sa mga butang sa ginghamarian sa mga tawo. Balikan ta sa pagsabot, nasabtan nato nga ang pag-adto sa langit o impierno usa ka legal nga isyu ug dili nakabase sa kon unsa kita ka maayo, apan nakabase sa legal nga kadaugan nga naangkon ni Jesus batok kang Satan sa Krus. Bisan pa nga gihimo ni Jesus nga legal alang sa tawo nga mogawas sa hurisdiksyon ni Satan, usab, ang

matag tawo kinahanglan nga motawag sa ngalan ni Jesus sa pagtuo aron maangkon kini.

Nasayod ko nga gibyaan nato kini nga diskusyon ganina, apan karon balikan ta ang pangutana nga atong gipangutana kaniadto, “Ngano nga dili makapaayo si Jesus sa mga tawo sa Marcos 6?” Gisulti nako nga kini usa ka isyu sa hurisdiksyon, ug mao kana. Sukad nga gihatag ni Adan ang espirituhanong hurisdiksyon sa gingharian sa mga tawo ngadto kang Satanas, dili makasulod ang Dios dinhi bisan kanus-a nga gusto siya kay kini ilegal. Karon, ayaw paglibog sa akong gisulti bahin sa kon kinsa ang tag-iya sa yuta mismo. Klaro sa Bibliya nga ang Dios ang tag-iya sa yuta ug sa tanan nga anaa niini. Apan, bahin sa gingharian sa mga tawo, walay legal nga hurisdiksyon ang Dios kanila. Mahimo natong makita kini sa Lucas 4:5–7.

*“Gidala Siya sa yawa ngadto sa usa ka hataas nga lugar ug gipakita Kaniya sa usa ka higayon ang tanan nga mga gingharian sa kalibutan. Ug miingon siya Kaniya, “Thatag ko Kanimo ang tanan nilang awtoridad ug himaya, kay gihatag na kini kanako, ug mahimo ko nga ihatag kini kang bisan kinsa nga akong gusto. Kon mosimba Ka kanako, kini tanan mahimong imo.”*

Makita nato dinhi nga gihatag ni Adan kang Satanas ang legal nga hurisdiksyon sa mga gingharian sa kalibutan. Tungod niini, dili dayun makabuhat ang Dios sa gusto niya sa yuta bahin sa mga lalaki ug mga babaye. Apan kon makakaplag ang Dios og usa ka lalaki o babaye nga nagtuo kaniya, ug hingpit nga nagtuo sa awtoridad sa langit, makagamit dayon ang Dios sa iyang awtoridad pinaagi sa maong tawo. Mao pod kini ang samang paagi nga nakasulod si Satanas sa yuta sa sinugdanan, pinaagi sa usa nga adunay legal nga okupasyon sa yuta, si Adan. Sa dihang nawala si Adan sa pagdumala sa Dios, kinahanglan

Niyang makakaplag og laing agianan pabalik sa yuta aron ibutang ang Iyang plano sa pagluwas, ug ang ngalan sa maong tawo mao si Abram.

*Ang Ginoo miingon kang Abram, “Biyai ang imong nasud, ang imong katawhan ug ang panimalay sa imong amahan ug adto sa yuta nga akong ipakita kanimo. Himoon Ta ka nga usa ka dako nga nasud ug Akong kang panalanginan; himoon Ko nga dako ang imong ngalan, ug ikaw mahimong usa ka panalangin. pagapanalanginan Ko ang mga magapanalangin kanimo, ug ang mga magapanghimaraut kanimo, pagapanghimarauton Ko; ug ang tanang mga katawhan sa yuta pagapanalanginan pinaagi kanimo.”*

—Genesis 12:1-3

Si Abram, o Abraham, mao ang pultahan nga gigamit sa Dios aron makasulod pag-usab sa yuta ug dalhon ang Iyang plano sa kaluwasan sa katawhan. Naghimo ang Dios og kasabutan uban ni Abraham ug sa iyang mga kaliwat, ug pinaagi niini nga legal nga kasabutan, adunay nay agi-anan ang Dios aron dalhon si Jesu-Cristo sa kalibutan, apan pinaagi lang sa kaliwat ni Abraham. Mao kini ang rason nganong kinahanglan nga si Jesus dapat kaliwat ni Abraham ug nganong ang Israel wala gitugotan nga magminyo sa mga silingan nga nasud. Kini usab ang rason nganong ang unang libro sa Bag-ong Tugon naghisgot lang mahitungod sa linya sa kaliwatan. Nagapamatood kini nga si Jesus, sa tinuod lang, usa ka legal nga kaliwat ni Abraham, nga nagpamatood kang Satanas nga legal alang kang Jesus nga moanhi ug magbayad sa kantidad sa sala.

Tungod kay ang mga lalaki ug mga babaye adunay legal nga pagkontrola sa yuta, ayaw ikalibog ang espirituhanong pagkontrola, ang Dios ug si Satanas nagkinahanglan ug mga tawo aron adunay mahimo sa kalibotan. Sa yano nga pagkasulti, ang mga lalaki ug mga

babaye ra ang mga legal nga lumolupyo sa yuta. Apan sama nga si Satanas naka kontekta pinaagi ni Adan ug Eba nga mituo sa iyang pulong, kinahanglan usab nga makapangita ang Dios og mga tawo nga motuo sa Iyang pulong aron makahimo ug mga butang sa yuta. Kon ang usa ka lalaki o babaye hingpit nga nagtuo sa ilang kasingkasing sa kon unsay gisulti sa langit imbes sa kon unsay gisulti sa gingharian ni Satanas, kini gitawag nga pagtuo, ug naghatag kini og legal nga hurisdiksyon sa langit aron molihok pinaagi niining tawo ngadto sa yuta ug dalhon ang kabubut-on sa Dios batok sa gingharian ni Satanas. Daghan pa ang angay isulti, apan ako nang nahisgutan kini sa dakong detalye sa akong unang duha ka mga libro.

Ang tinuod nga susi mao kini. Tungod kay si Satanas ania sa yuta, kanunay siyang nagdependa sa iyang gingharian ug kanunay nga nagtinguha nga malabwan ang mga plano sa Dios. Tungod niini, ang Dios nagtrabaho nga tago aron makuha ang iyang mga plano ug estratehiya ngadto sa kalibutan. Ug sa pagkahibalo kon giunsa sa Dios ang pagpamuhat sa sekreto, imong makaplagaan ang labing dakong nga susi sa imong kalampusan ug kadaugan sa kinabuhi. Gitawag ko kini nga Gahum sa Estratehiya!

## KAPITULO 3

# NATINGALA

Nakadawat ko og tawag sa telepono gikan sa usa ka lalaki nga wala pa nako nahimamat. Nagpa-ilaila siya sa iyang kaugalingon ug miingon nga siya ug uban ang pang mga lalaki nalingaw sa akong libro nga *Faith Hunt* ug sa akong pagtudlo bahin sa Gingharian sa Dios. Nangutana siya kon interesado ba ako nga motungas sa Montana aron magtudlo sa ilang grupo nga may 70 ka mga lalaki— sa Biyernes sa gabii ug Sabado sa buntag. Sa wala pa ko makatubag, miingon siya, “Pagkahuman sa imong pagtudlo sa Sabado sa buntag, gusto namong dad-on ka sa pagpangayam og antelope kay tingpanahon na.” Dali ra kaayong tubagon kana nga pangutana. Ingon siya nga imbitado pod ang akong mga anak nga lalaki ko buot sila. Sa misunod nga mga bulan sa ting-init, gitabangan ako nila sa pagkuha sa lisensya alang sa pagpangayam. Ang akong anak nga si Tim nakadesisyon nga moapil, ug nakakuha usab siya ug lisensya.

Nasayran nako nga kini usa ka grupo sa Promise Keepers, ug nadani sila sa mga istorya sa pagpangayam nga akong gisulti sa akong mga pagtudlo—labi na kon giunsa nako pagdawat ang akong binaw pinaagi sa pagtuo. Gusto nila nga makapaminaw pa kon giunsa nako nga kanunay makakuha sa akong binaw sulod sa 30 o 40 minutos ug kon giunsa ko gitudloan sa Dios nga mahimong espesipiko bahin sa klase

sa hayop nga akong madawat—gikan sa matang, gidak-on, hangtod sa kalapad sa mga sungay. Mouyon ako nga ang mga kasinatian nga akong nasaksihan mura’g lisod tuohan. Kon wala pa nako kini nakita nga tinuod nga nahitabo, tingali ako usab mahimong ingon ka masusihon sama nila.

Sa kataposan, miabot na ang semana sa among pag-adto sa Montana. Si Tim ug ako milupad ug nakahimamat sa pipila ka mga lider sa grupo—mga bantugan nga lalaki nga tinuod nga nahigugma sa Ginoo. Gidala nila kami sa pagpangisda og trout ug sa shooting range aron ipakita ang mga pusil nga ilang giandam alang kanamo. Tungod kay nagdako ko sa Ohio, wala ko maanad sa paggamit og rifle sa layo nga distansya. Ang among balaod nagdumili sa paggamit og rifle para sa pagpangayam og binaw—shotgun lang ang gitugotan, ug kasagaran, ang target dili moabot ug 100 ka yarda, usahay dili moabot ug 50 ka yarda. Busa, sa dihang ilang gibutang ang target sa 200 ka yarda, usa kana ka dako nga kusapban para kanako. Apan human lang sa pipila ka praktis, ako nang naigo ang bakal nga targetanan ug mipahayag nga andam na ko sa pagpangayam.

Nianang gabhiona, nagtudlo ko sa mga lalaki sa lokal nga awditoryum sa eskwelahan, ug sa pagkabuntag, nagpadayon ang pagtulun-an. Naghinam-hinam sila nga makadungog ug makakat-on bahin sa Gingharian sa Dios, labi na kon giunsa pagtudlo sa Dios kanako ang mga balaod sa Gingharian pinaagi sa pagpangayam. Human sa paniudto, miingon sila, “Sige, atong hantingon ang antelope.” Wala pa ko ka suway og pagpangayam og antelope, ug sa akong hunahuna, wala ko kasabot sa pamaagi. Sa akong kasinatian sa pagpangayam, kasagaran, duha o tulo lang ka tawo ang mag-uban. Apan niadtong higayona, upat ka sakyanan nga puno sa mga tawo ang miuban. Nahinumdom ko nga sa gabii, sa wala pa mangutana si Tim, siya miingon, “Pa, wala ka ba makulbaan sa pagpangayam og antelope? Imo silang gitudlo-an bahin sa Gingharian sa Dios ug giingon nga kini makapanlihok sa

tanang panahon, apan kon dili ka makakuha ug usa ka antelope ug silang tanan nagtan-aw, unsa may imong buhaton?” Giingnan nako siya nga wala ko gikulbaan sa pagkuha sa antelope. Si Drenda ug ako nakatanom na sa among liso ug nagkasinabot alang niadtong antelope; moabot gyud ni.

Samtang nagdrayb kami paingon sa ranso diin sila gitugotan sa pagpangayam, ilang gipatin-aw nga ang antelope mao ang labing paspas nga mananap sa Amihanang Amerika ug ang ikaduhang labing paspas sa tibuok kalibutan, sunod lang sa cheetah. Gipasabut nila nga ang antelope adunay hait nga panan-aw, ug ang ilang pangunang depensa mao ang pagdagan. Busa, kon makita ka nila, dali ra silang mokalagiw sulod lang sa usa ka segundo. Ang akong tag alang sa usa ka lalaking antelope, samtang si Tim ang iyang tag alang sa babayeng antelope.

Ang among plano mao ang pagdrayb paingon sa ranso, mosaka sa taas nga bahin sa yuta, ug magbaktas, paghuman, tan-awon kon adunay mga mabaw nga mga walog basi makakita kami og mga mananap. Samtang nagbaktas kami sa ibabaw, nakakita kami og grupo sa mga antelope sa layo. Tungod sa dagan sa yuta, nabati namo nga makaduol kami aron makapamusil pinaagi sa pagpabilin sa ubos nga bung-aw samtang magkaduol kami. Kinahanglan namong mag-amping sa pagsaka sa kataposang bungtod, unya hinayhinay nga dalaon among kaugalingon ngadto sa tumoy aron tan-awon kon anaa pa ba ang mga antelope pag-abot namo didto. Pag-abot sa tumoy, tugotan nila kami sa usa ka tira sa gilay-on nga mga 200 hangtod 250 ka yarda kon kami anaa na sa husto nga posisyon.

Si Tim ug ako hinayhinay nga mikamang gamit among mga tiyan aron makaduol sa ngilit nga dapit sa bungtod nga nagtan-aw sa bung-aw diin among makita ang mga antelope. Hinay-hinay kong mikamang paingon sa daplin ug mitan-aw. Sigurado ako, milampos ang among plano—wala nakabantay kanamo ang panon sa mga antelope. Gipahiluna ko ang akong rifle, apan nalisod ko sa pag-

angkon ug maayong pagkaplastada tungod sa gilay-on ug sa akong kalisud sa pagginhawa human sa pagkamang. Sa katapusan, sa dihang nagtuo ko nga natarget na nako ang lalaking antelope, akong gibira ang gatiyo. Wala ko ka-igo. Nalisang ang panon samtang nag-andam ko sa ikaduhang tira. Wala gihapon ko kaigo. Karon, nagsugod na sila'g lihoc samtang nagpagawas ko sa ikatulo ug ikaupat nga buto—apan wala gihapon. Sa dihang nagpabuto ko sa ikalimang higayon, ang akong nadungog lang mao ang usa ka pag-klik. Nahurot na akong bala.

Sa kagubot sa panghitabo, wala ko makabantay nga ang tibuok panon nangahanaw ug wala na sa among panan-aw. Tanan gawas sa usa—ang lalaki nga antelope nga akong ginapusil. Hingpit kini nga

**ANG KALIBUTAN  
GIGUTOM SA  
TINUOD NGA  
BUTANG, UG ANG  
DIOS GUSTO NGA  
MANGATINGALA  
POD SILA.**

mibarog pipila lang ka yarda gikan sa dapit diin kini nagbarog sa akong unang tira. Dali akong nangayo sa rifle ni Tim. Karon, nagtindog na ko, nagpabuto nga wala maggamit og sandiganan, ug natumba ang antelope. Hilabihan ang akong kahinam—nalipay ug nahupay sa parehas nga oras. Ang lalaki nga antelope akoa na. Sa akong pagtan-aw balik sa akong abaga, grabe ang akong katingala sa

akong nakita—usa ka grupo sa mga lalaki nga nagsinggit ug nagsaulog. Ang uban naggunit sa ilang mga cellphone, ug nakadungog ko sa usa nga miingon, “Oo, parehas ra gyud sa libro sa *Faith Hunt*—mga 40 minutos lang ug mihunong ang antelope, sama sa giingon sa libro.” Silang tanan mianhi aron makita kon giunsa paglihok sa Gingharian sa Dios. Dugay na nakong gitudloan sila niini, ug gusto nilang makita kini nga mahitabo sa ila mismong kaugalingong mga mata. Bisan pa sa akong dili maayo nga pagpamusil, nagatrabaho gihapon ang prinsipyo sa pagtuo—ug naghatag kini og dugang kredibilidad sa akong gitudlo. Si Tim nakakuha usab sa iyang babaeng antelope nianang hapon—usa ka perpekto nga pagpusil sa nagdagan nga antelope. Naghinamhinam

kaayo ming duha! Pagkaanindot sa Montana! Kini nga kasinatian usa ka talagsaong pagpamatuod sa among paglakaw sa Gingharian sa Dios. Gikuha nako ang ulo sa antelope ug gibitay ibabaw sa lamesa sa akong opisina—usa ka pahinumdom sa Gingharian ug sa pagkamatinumanon sa Dios.

Nganong ako kang gisaysayan sa usa ka istorya sa pagpangayam niini nga libro? Tungod kay gusto sa Dios nga gamiton ka aron ipakita ang Iyang Gingharian sa tanan nimong mga higala, silingan, ug pamilya. Gusto Niyang makita nila kon giunsa sa paglihok ang Iyang Gingharian. Ang kalibutan gigutom sa tinuod nga butang, ug ang Dios gusto nga mangatingala pod sila. Aron sila mahingangha, kinahanglan nimo matun-an kon unsaon paggamit sa Gingharian sa Dios ug kon giunsa sa Balaang Espiritu pagdala ang mga tubag ug mga oportunidad nga gikinahanglan nimo aron mahimong usa ka saksi sa Iyang gahum—bisan pa ang imong kaugalingon. Sa ulahi, nahibaw-an nako nga ang pipila ka mga lalaki nga nagdumala sa grupo sa mga lalaki nagdala kanako didto alang sa tin-aw nga katuyoan—aron ipakita ang Gingharian ngadto sa daghang mga lalaki nga nabilanggo sa relihiyon. Nahibaw-an ko nga daghan ang mihatag sa ilang kasingkasing ngadto sa Ginoo pinaagi sa akong pagtudlo niadtong adlaw. Ang Balaang Espiritu mao ang nagbutang niana nga plano, ug Siya magahatag usab og tabang sa imong mga plano alang sa kalampusan.

Tugoti ako sa paghatag kanimo og usa pa ka istorya, apan kini gikan mismo sa Bibliya. Kini mag-ilustrar kon unsa kadako ang pagtinguha sa Dios nga masurprisa ka sa mga supernatural nga plano ug estratehiya nga magdala og ebidensya sa Iyang katinuod ug gugma sa imong palibot.

*Usa ka adlaw niana, samtang nagtindog si Jesus sa daplin sa Lanaw sa Genesaret, uban sa mga tawo nga nagdugok Kaniya ug namati sa pulong sa Dios, nakita Niya sa daplin sa tubig*

*ang duha ka sakayan, nga gibiyaaan sa mga mangingisda, nga naghugas sa ilang mga pukot. Siya misakay sa usa sa mga sakayan, nga iya ni Simon, ug mihangyo kaniya nga itulak ug diyutay ang iyang sakayan gikan sa baybayon. Unya milingkod Siya ug nanudlo sa mga tawo gikan sa sakayan.*

*Pagkahuman Niya sa pagtudlo, miingon Siya kang Simon, “Itaktak ninyo ang mga pukot aron makakuha kamo.”*

*Si Simon mitubag, “Magtutudlo, tibuok gabii kaming naghago ug wala kamiy nakuha. Apan tungod sa Imong giingon, itaktak ko ang mga pukot.”*

*Ug sa nahimo na nila kini, nakakuha sila ug daghan kaayong isda nga tungod niana nagisi ang ilang mga pukot. Busa gisenyasan nila ang ilang mga kauban sa usa ka sakayan nga moduol ug motabang kanila. Sila nangadto ug gipuno nila ang duha ka sakayan nga puno kaayo, nga nagsugod na kini sa pagkaunlod.*

*Sa pagkakita ni Simon Pedro niini, mihapa siya sa mga tuhod ni Jesus ug miingon, “Palayo kanako, Ginoo; Usa ako ka makasasala nga tawo!” Kay siya ug ang tanan niyang mga kauban nahingangha sa kadagaya sa isda nga ilang nakuha, ug mao usab si Santiago ug si Juan, ang mga anak ni Zebedeo, nga mga kauban ni Simon.*

—Lucas 5:1-10

Si Pedro, Santiago, ug Juan nanagat sa tibuok gabii ug walay nakuha. Kini sila mga eksperyensiyadong mangingisda nga nagdako sa lanaw ug nakaila kaayo niini, apan miabot sila nga walay dala. Apan siyempre, ang istorya wala magtapos didto. Si Jesus mihulam sa sakayan ni Pedro aron

magsangyaw ug pagkahuman, miingon siya kang Pedro nga itaktak ang mga pukot ngadto sa lawom nga tubig aron makakuha og isda. Si Pedro, nga medyo nakurat, miingon nga nagtrabaho sila tibuok gabii ug walay kuha, apan tungod kay si Jesus miingon niini, iyang gitaktak ang pukot. Sa dihang gitaktak ni Pedro ang pukot, ang Bibliya nag-ingon nga daghan kaayong isda ang iyang nakuha nga ang iyang pukot hapit nang magisi. Busa, gitawag niya ang iyang mga kauban aron sa pagtabang. Ang Kasulatan nagpadayon sa pag-ingon nga ang mga pukot sa iyang mga kauban halos magisi usab ug nga ang duha ka sakayan napuno pag-ayo sa isda, nga hapit na silang malunod. Ang Bibliya nag-ingon nga kining mga eksperyensiyadong mangingisda nahingangha sa kadagaya sa isda nga ilang nakuha niadtong adlaw, mao nga miundang sila sa pagpangisda ug misunod kang Jesus.

Usa kini sa akong paborito nga mga istorya sa Bibliya kay klaro nga nagpakita kini og hulagway sa mga kalainan tali sa duha ka gingharian: ang gingharian sa kangitngit ug ang Ginghamian sa Dios. Ang gingharian sa kangitngit, ang pagdumala ni Satanas, usa ka sistema nga guba, kabus, puno sa malisud nga paghago ug pagpatulog ug singot sa tibuok gabii nga walay nakuha, aron lang mabuhi. Gitawag ko kini nga sistema sa gitunglo nga yuta, nga gipahinabo sa pagrebelde ni Adan. Kini gitandi sa mahimayaong hulagway sa Ginghamian sa Dios ug sa mga butang nga gipatungha niini. Tan-awa pag-ayo ang duha ka sukwahi, ug hibalo nga ang Dios naghatag kanimo sa ikaduhang pultahan, ang Ginghamian.

Karon, ang matag Kristohanon mosinggit, mopakpak, ug moingon, “Oo, dako ang Ginghamian sa Dios; tan-awa ang nakuha nga mga isda!” Apan diotay lang ang mangutana kon giunsa kini paghimo ni Jesus, ug ang kadaghanan wala makahibalo nga gihatagan sila og pareho nga awtoridad ug kapasidad nga magamit ang pareho nga lebel sa probisyon nga gibuhat nilang Pedro, Santiago, ug Juan niadtong adlaw. Ang kasagaran nga tubag mahitungod sa pagpatin-aw sa kon giunsa ni Jesus pagbuhat sa Iyang gibuhat niadtong adlaw mao nga si Jesus makahimo niini tungod kay Siya si Jesus. Apan kadali lang; nakita nato nga si Jesus

wala makahimo sa pag-aayo sa tanan sa Marcos 6, tungod kay ang langit walay hurisdiksyon didto. Tungod kay adunay espirituwal nga mga balaod sa Gingharian nga naglihok niadtong adlaw, nga nagpatuman ug nagpahinagbo sa pagdakop sa daghang isda.

Apan ania ang isyu. Kadaghanan sa mga Kristohanon nga akong nahimamat wala gani maghunahuna nga posible nga buhaton ang samang mga butang nga gibuhat ni Jesus. Ug kon makahunahuna man gani sila, wala silay ideya kon giunsa kini pagbuhat ni Jesus. Aduna koy panultihon nga akong gigamit sa akong mga komperensya: Kon dili ka makatudlo og usa ka butang, dili nimo kini makinabuhi. Ang akong buot ipasabot mao nga kon dili nimo masabtan kon giunsa kini paghitabo, dili nimo kini mahimo. Busa, sa unsang paagi mitungha ang dakong kuha? Mahimo ba nimo kining mahibal-an? Kon gusto nimo makasinati sa ingon nga kalampusan, kinahanglan nimo mahibalo-an kon giunsa pagtungha sa mga isda. Apan, kadaghanan sa mga tawo nakurat sa dihang nagsugod ako sa pagsulti og ingon niini. Apan unsay gisulti ni Jesus?

*Sa pagkatinuod sultihan ko kamo, si bisan kinsa nga mosalig kanako magabuhat sa akong ginabuhat. Magbuhat siya ug labaw pa niini nga mga butang, tungod kay ako moadto man sa Amahan.*

— Juan 14:12

Sa dihang si Jesus miingon nga mahimo nato ang samang mga buhat nga Iyang gibuhat tungod kay Siya moadto sa Amahan, ang Iyang gipasabot mao ang Balaang Espiritu nga mokunsad kanato human sa Iyang kamatayon ug pagkabanhaw. Mao kini ang samang Balaang Espiritu nga mikunsad Kaniya didto sa Suba sa Jordan, nga nagtugot Kaniya sa pagbuhat sa gamhanang mga buhat sa Dios—mga buhat nga atong makita kon kita mosunod sa Iyang ministeryo. Nahibal-an nato nga kini nga gahum gibabagan sa Marcos 6 tungod sa pagkawalay

pagtuo sa mga tawo, apan wala kini gibabagan sa Lucas 5 sa dihang nahitabo ang dakong kuha sa isda. Busa, kinahanglan natong tun-an ang mga balaod sa Gingharian aron mahibal-an kon unsay makababag o makapadali sa gawasnong pagdagayday sa Balaang Espiritu sa bisan unsang sitwasyon. Busa, atong tan-awon ang istorya ug susihon kon makakaplag ba kita og mga balaod ug prinsipyo sa Gingharian nga atong mahibal-an ug makat-onan.

Karon, kon nabasa na nimo ang akong una nga libro, nahibal-an nimo kon unsay nahitabo sa espirituhanong aspeto sa dihang gihatag ni Pedro kang Jesus ang sakayan aron Iyang gamiton. Ang sakayan ni Pedro, ug ang tibuok niyang negosyo sa pagpangisda, nagbag-o bahin sa gingharian o hurisdiksyon! Oo, sa dihang gikuha ni Jesus ang sakayan ilalom sa Iyang pagministeryo, kini nailalom na sa hurisdiksyon sa Gingharian sa Dios. Tungod niini, ang Balaang Espiritu adunay legal nga katungod sa pagpadayag kang Jesus sa Pulong sa Kahibalo mahitungod sa nahimutangan sa pundok sa mga isda sa lawom nga tubig. Ang dakong kuha sa isda resulta sa supernatural nga plano ug estratehiya nga gihatag sa Espiritu Santo ngadto kang Pedro pinaagi ni Jesus niadtong adlaw. Gitawag kini og Sekretong Kahibalo, ug tungod niini, si Pedro, Santiago, ug Juan nakakita sa kinadak-ang kuha sa isda nga ilang nasinati. Sa pagkatinuod, ang Bibliya nag-ingon nga kining batid nga mga mangingisda nahingangha.

Nagtuo ako nga bout ni Jesus nga magkinabuhi ka usab sa kinabuhing makapahingangha—usa ka kinabuhi nga nagpakita sa Gingharian aron ang mga tawo sa imong palibot matingala sa ilang makita ug makaila usab kang Jesus. Nagtuo ako nga ang walay sulod nga mga sakayan sa relihiyon dili gayud makadani sa mga tawo ngadto sa Dios. Gusto sa Dios nga makita sa mga tawo ang kaayo sa Iyang Gingharian aron sila motuo nga Siya maayo ug andam modawat sa tanan nga moduol Kaniya. Si Isaias naghisgot niini sa dihang iyang gipahayag ang usa ka panagna nga nagtumong sa iglesia:

*“Sila [nagtumong kanamo] pagatawgon nga mga kahoy sa pagkamatarung, usa ka tinanum ni Jehova alang sa pagpasundayag sa Iyang himaya.” (Isaias 61:3b).*

Busa, unsa ang mensahe nga gusto ko nga imong makuha gikan sa istorya sa isda sa Lucas kapitulo 5? Aw, daghang mga espirituhanong mga balaod nga mahimo nimong makuha gikan nianang istorya, apan kon imo kining masabtan ug dawaton, kini makausab sa imong kinabuhi.

Bisan kinsa makadakop og isda kon si Jesus mosulti kanila kon asa ihulog ang ilang pukot!! O, tugoti ako sa pagsulti niini sa laing paagi: Bisan kinsa makakuha og isda kon si Jesus mosulti kanila kon asa kini makita ug unsaon kini pagdakop!

Ang mga tawo miingon kanako, “Aw, nindot man kana, Gary, apan si Jesus wala na man dinhi.” Dili, kay ang mao ra nga Balaang Espiritu nga nagsulti Kaniya niadtong adlaw kon diin ang mga isda, ania karon ug nagapuyo diha kanimo kon ikaw usa ka magtotoo. Paminawa ang gisulti ni Jesus sa Iyang mga disipulo samtang nangandam Siya sa pagbiya kanila.

*Kining tanan Akong gisulti samtang ania pa Ako uban kaninyo. Apan ang Magtatambag, ang Espiritu Santo nga ipadala sa Amahan sa Akong ngalan, magatudlo kaninyo sa tanang butang ug magapahinumdong kaninyo sa tanan nga Akong gisulti kaninyo. Ang kalinaw ibilin ko kaninyo; ang Akong kalinaw ihatag ko kaninyo. Wala Ako maghatag kaninyo sama sa paghatag sa kalibotan. Ayaw tugoti nga magkaguol ang inyong mga kasingkasing, ug ayaw kahadlok.*

— Juan 14:25-27

Unsa ang kalinaw ni Jesus? Ang Balaang Espiritu ang nagsulti Kaniya kon unsaon pagdumala ang matag sitwasyon nga Iyang

nasugatan. Gitawag ni Jesus ang Espiritu Santo nga Magtatambag. Higala, kini nga Magtatambag nagpuyo diha kanimo ug dili gayud mobiya kanimo. Namati ka ba Niya? Kinahanglan mouyon ka nga ang Dios lagmit adunay tubag sa bisan unsang kahimtang nga imong masinati. Si Jesus nag-ingon nga kini nga Magtatambag mahimong magtudlo kanimo o maghatag kanimo'g tambag bahin sa tanang mga butang. Sumala sa *Strong's Exhaustive Concordance of the Bible* (3875), ang Gregong pulong nga gihubad nga Magtatambag sa literal nagakahulugan: ang gitawag, o gitawag

**GITAWAG NI JESUS  
ANG ESPIRITU SANTO  
NGA MAGTATAMBAG.  
HIGALA, KINI NGA  
MAGTATAMBAG  
NAGPUYO DIHA KANIMO  
UG DILI GAYUD MOBIYA  
KANIMO.**

sa kiliranan, labi na nga gitawag aron magtabang. Nagpasabot usab kini sa usa nga nangaliyupo sa kawsa sa uban atubangan sa usa ka maghuhukom, usa ka abogado alang sa depensa, usa ka legal nga katabang, o usa ka manlalaban. Sa pinakalapad nga diwa niini, ang pulong nagpasabot sa usa ka katabang o usa nga nagdala og tabang, o usa ka tigtabang (*assistant*).

Wala ko kabalo bahin kanimo, pero ako dakong alibyo ang katabang; dili ba? Ang Balaang Espiritu mao ang tubag ni Pedro sa dihang nanagat sila tibuok gabii ug walay nakuha. Ug ang Balaang Espiritu mao ang akong tubag sa dihang wala koy ideya asa pangitaon ang kuwarta nga akong gikinahanglan aron makalingkawas sa utang. Human makalingkawas ang akong pamilya sa ingon kalisud nga pinansyal sa daghang mga tuig, sa dihang midangup ako sa Dios alang sa tabang, ang Balaang Espiritu ang naghatag kanako'g usa ka damgo usa ka gabii nga nagpakita kanako nga mobiya sa kompanya nga akong gitrabahoan ug magsugod sa akong kaugalingong kompanya gikan sa wala.

Ang Balaang Espiritu mao ang nagsulti kanako nga ang misyon

niining bag-ong kompanya mao ang pagpahayag sa kaayo sa Dios ug sa pagtabang sa mga tawo nga makalingkawas sa utang, nga niadtong panahona, mao ang pinakawalay pulos nga hunahuna nga akong nadungog sukad. Ako makatabang sa mga tawo nga makalingkawas sa utang? Ako ang klarong ehemplo sa mga butang nga dili angay buhaton sa kuwarta. Ang akong kinabuhi usa ka pinansyal nga daotan nga damgo. Apan mao kana ang Iyang giingon nga buhaton, busa, pinaagi sa pagtuo, si Drenda ug ako migawas ug misulti sa samang butang nga gibuhat ni Pedro: “Ginoo, dili kini makatarunganon, apan tungod kay giingon mo kana, buhaton namo kini.” Pinaagi sa pagsunod sa tambag sa Balaang Espiritu, kana nga bag-ong kompanya mitubo ug mitubo ug nakahatag og kwarta nga nakapahimo namo ni Drenda nga hingpit nga makalingkawas sa utang. Kana nga kompanya naganegosyo gihapon hangtod karon. 30 na ka tuig ang milabay, ug nagpatungha gihapon og gatusan ka libo ka dolyar sa usa ka tuig nga kita.

Uy, dili ko ingon ka maalamon ug dili usab ka, apan ang Dios naghatag kanimo sa Balaang Espiritu aron magtabang kanimo sa mga tubag nga imong gikinahanglan sa kinabuhi. Apan sama sa atong makat-unan gikan niini nga libro, aduna kitay mga bahin nga kinahanglang pagabuhaton, ug aduna kitay bahin sa pagpamuhat, uban sa Balaang Espiritu aron matuman ang kabubut-on sa Dios.

Ikasubo lang, gikan sa akong kasinatian sa mga tawo, ingon og daghang mga Kristohanon ang walay tubag sa mga problema nga ilang giatubang sa kinabuhi. Nagpadayon lang sila sa pagpangisda gamit ang ilang kaugalingon nga abilidad, ug pagkahuman sa tibuok gabii nga pagpangisda, nagpadayon sila nga walay kuha o kon nakakuha man, gamay lang. Wala pa sila makadungog nga ang Balaang Espiritu anaa aron magtabang kanila sa matag sitwasyon. Bisan tuod ang kadaghanan sa mga Kristohanon moingon, “Ang Dios motabang kanako sa pagbuhat niini o niana,” wala sila makasabut kon unsaon Niya pagtabang kanila,

o kon unsaon pagpaminaw sa mga tubag nga ilang gikinahanglan. Daghan kaayo ang wala makaamgo nga kinahanglan silang magtrabaho uban sa Dios aron matuman ang mga tubag nga ilang gikinahanglan, ug naghulat pa nga ang Dios ang maghimo sa tanan alang sa ilang problema, bisan kon ang tubag anaa na sa sulod nila.

Kon bahin sa kuwarta, pananglitan, ang mga tawo moingon nga ang Dios mopauswag kanako. Moingon ko, “Maayo! Sa unsang paagi ihatag sa Dios kanimo ang kuwarta?” Sa sinugdan, masuko sila nga mangutana ko sa ingon nga morag gihagit nako ang ilang pagtuo. Apan nagpadayon ko, “Asa man ang kuwarta? Sa unsang paagi ihatag kini sa Dios kanimo?” Kon pugson nako sila alang sa ilang tubag, wala silay ideya. Ok ra nga wala ka kabalo sa mubo nga panahon, apan sa katapusan, gikinahanglan nga adunay tubag. Dili nimo maani ang dili nimo makita. Hinumdomi, espesipiko si Jesus sa dihang gipangutana Niya si Pedro kon asa ang mga isda, ug gipangutana pa gani Niya siya kon unsaon kini pagkuha: “Itaktak ang imong pukot.” Sa katapusan, kinahanglan nimong mahibalo-an kon asa ibutang ang imong pukot kon mangisda ka.

Tungod kay ang mga tawo kasagaran adunay gitawag nako nga mailbox mentality, nga naghunahuna nga ang Dios ra ang maghimo sa tanan, ang ilang pinansyal nga kinabuhi nagpabilin nga mao ra gihapon, ang ilang salapi-anong kahimoan walay kausaban sulod sa 10 o 20 ka tuig nga walay pag-uswag. Makasubo kini. Gusto ba nimong mahibal-an kon ngano nga sila nagpabilin nga walay kausaban? Tungod kini kay wala pa sila matudloi kon unsaon pagpangisda pinaagi sa Balaang Espiritu, sa pamaagi sa Gingharian. Wala sila mahibalo kon unsaon paglihok sa Balaang Espiritu sa kalibotan aron matabangan sila nga molampos. Wala sila mahibalo sa bahin nga kinahanglan nilang buhaton ug unsa nga bahin ang buhaton sa Balaang Espiritu aron makab-ot ang kalampusan nga ilang gikinahanglan kaayo.

Sama kini sa tawo nga akong nakita sa paniudto karong adlaw.

Dakoon siya, tingali mga 375 ka libra. Siya adunay bakal nga naghawid (*brace*) sa usa ka paa ug naggunit ug duha ka sungkod. Halos dili siya makalihok. Human niya'g kaon sa iyang cheeseburger, nangayo siya og usa ka piraso nga peanut butter pie. Nakalingkod ko sa kakurat pagkadungog nga nangayo siya og pie. Dili ko sigurado kon unsa ang iyang gihunahuna, apan pirti na kagrabing pie ang iyang nakaon. Klaro kaayo kini, ug hinay-hinay siyang ginapatay niini. Naglisud siya sa pagbangon gikan sa lamesa ug hinay-hinay ug nagkalisod nga migawas sa restawran. Ingon niini ang akong pagtan-aw sa mga Kristohanon nga nagkinabuhi karon—nakadungog sa mga saad, apan nagpadayon sa pagkaon og hilo ug unya nahibulong kon nganong ang mga butang wala mosalir.

Higala, anaa kanimo ang tubag! Ang Balaang Espiritu, ang Dios mismo, nagpuyo diha kanimo aron maghatag ug bisan unsang tubag nga kinahanglan nimong masayran. Gipangutana ako sa mga tawo

**ANG BALANG  
ESPIRITU, ANG DIOS  
MISMO, NAGPUYO  
DIHA KANIMO ARON  
MAGHATAG UG BISAN  
UNSANG TUBAG  
NGA KINAHANGLAN  
NIMONG MASAYRAN.**

kon kinahanglan ba nilang minyoan si Susan o si Sally, kon kinahanglan ba nila kini nga trabaho o kana, kon kinahanglan ba silang mobalhin o magpabilin sa ilang nahimutangan, ibaligya ang ilang stock o magpalit og stock. Ang Balaang Espiritu nga anaa diha kanimo, adunay mga tubag. Sa makausa pa, mao kini ang katuyoan niini nga libro: aron mahibalo kon giunsa sa Balaang Espiritu sa pagtabang kanato ug

kon giunsa sa paglihok sa Gingharian pinaagi sa pagpaminaw sa tingog sa Balaang Espiritu.

Busa akong balikon.

**Bisan kinsa makadakop og isda kon sultihan sila ni Jesus kon asa ug unsaon kini pagdakop, bisan ikaw!**

Si Karol nagpamatuod niini sa iyang email kon giunsa pagbag-o sa iyang kinabuhi.

*Sa miaging tuig, sa petsa sa karong adlaw, namalit ko'g mga regalo sa Pasko gamit ang mga credit card. Wala koy kuwarta nga ikapalit para sa akong anak nga babaye, nga mituo gihapon kang Santa Claus. Nagpuyo ako sa kanunay nga kabalaka ug kasubo, ug misulat ako kang Pastor Gary nga kining pagpugas nga butang wala mosalir, nga walay nahitabo. Siya mapailubon kaayo nga mitubag kanako sa paghulat, nga ang pag-ani nagkinahanglan og pipila ka panahon ug dili kasagaran mahitabo sa sunod nga adlaw.*

*Karon, paglabay sa usa ka tuig, namalit ko'g mga regalo para sa tanan nakong pamilya gamit ang cash nga kuwarta. Mipalit ko og mga regalo nga nagkantidad og \$300 o \$400, ug akong gipasidunggan ang pipila ka mga tawo nga mitabang kanako niadtong lisud ang mga panahon. Sa miaging tuig, nagpuyo ko sa usa ka lawak sa silong nga gitugotan ko sa pipila ka higala nga magpabilin sulod sa pipila ka bulan. Wala gani koy kuwarta para pagkaon o gasolina. Apan karon nagpuyo ko sa usa ka matahum ug nindot nga apartment, ug ang akong refrigerator puno na ug pagkaon.*

*Sa Disyembre 3 mao ang adlawng natawhan sa akong anak nga babaye, ug among gidala siya sa Hershey Park sa Pennsylvania. Among giimbatar ang iyang suod nga higala ug mipuyo mi sa Hershey Hotel, ug gibayran namo ang tanan sa cash. Ug nakapalit ko niya ug nindot nga regalo nga nagkantidad ug kapin sa \$400 diin sa miaging tuig anaay nagpakaaulaw nako*

*pinaagi sa paghatag kanako og \$30 aron sa pagsaulog sa iyang adlawng natawhan.*

*Dili ko gani masulat kini nga sulat nga walay paghilak. Mapasalamaton kaayo ko kang Pastor Gary ug sa iyang asawa nga si Drenda. Kini nga tuig mao ang labing maayo nga tuig sa akong kinabuhi. Nindot ang mga butang nga gibuhat sa Dios sa akong kinabuhi. Makasulat ako'g libro sa tanan nakong mga istorya. Salamat sa pagtudlo kanako nga magkinabuhi sa langit dinhi sa yuta.*

Ang mosunod nga email mao ang usa sa labing makahingangha nga mga istorya sa Gingharian nga akong nadungog; kini gikan kang Sharon nga taga-Michigan.

*Pastor Gary, gisulat ko kini alang sa akong bana ug sa akong kaugalingon. Gusto ko lang magpasalamat kanimo tungod kay ikaw ug ang imong asawa usa ka hingpit nga inspirasyon kanamo. Nakadungog mi bahin nimo sa Sid Roth mga tulo o upat ka tuig na ang milabay. Kami nakasinati og lisud kaayo nga panahon. Ang akong bana gitanggal sa iyang trabaho human sa 18 ka tuig, ug bag-o pa lang ming nakatukod ug balay nga nagkantidad og \$280,000 sa dihang nahitabo kini. Hangtod sa among liog ang among utang ug pagka stress.*

*Gi-order namo ang imong mga CD, ug nakatabang kini kanamo. Among nakat-unan kon unsa ang utang mahimong makabalda ug makaapekto sa imong panglawas ug kinabuhi. Wala miy nakitang agianan. Bisa'g dili mi makabayad sa among bag-ong balay, nakapuyo kami niini sulod sa duha ka tuig hangtod nga kami kinahnaglan nang mobiya. Ang kadto ka panalangin.*

*Apan aron himuon ang taas nga istorya nga mubo, ang akong bana nakabawi sa iyang daan nga trabaho human sa upat ka tuig tungod kay siya nagpabilin sa hugot nga pagtuo ug mituo sa mga saad sa Dios, ug uban kanimo ug sa imong asawa sa pagtabang kanamo pinaagi sa pagpaminaw sa inyong mga CD. Nakabalik akong bana sa iyang daan nga trabaho ug ang tanang sweldo sa nangaging upat ka tuig nabalik kaniya! Walay abogado o bisan unsang legal nga nalambigit. Nakuha usab niya ang tanan niyang oras sa bakasyon gikan sa upat ka tuig. Sa pagkatinuod, sa dihang ila siyang gi-hire og balik, ang unang butang nga ilang gipabuhat kaniya mao ang pagbakasyon! Aw, cash na ang pangbayad para sa mas maayong balay kaysa sa nawala kanamo bunga sa back pay nga iyang nadawat. Salamat sa tanan nimong gibuhat.*

Gikan kang Andrew nga taga-Missouri:

*Duha na ka tuig ang milabay, bulan sa Mayo, anaa ko sa usa ka lisud nga kahimtang. Wala ko malipay sa akong kanhing trabaho ug midawat og bag-ong posisyon sa gawas nga pagpamaligya. Ang mga maniningil sa bayronon nanawag, halos wala ko'y igong kuwarta alang sa panggasolina o pagkaon, ang katapusan sa bulan nagsingabot, ug ang abang dali ra nga nagsingabot. Ang ANAA NAKO, bisan pa, usa ka stack sa mga CD gikan ni Gary gikan sa serye sa Revolution 2.0. Naglingkod ko sa serbisyo usa ka adlaw ug gusto nga magpugas, apan aduna lang koy \$23 sa akong ngalan ug halos dili igo nga gasolina aron mapadayon ang semana. Ang trabaho dili maayo, ug akong gipahibalo sa Dios nga gusto ko magpugas, apan wala koy kwarta. Nadungog nako ang usa ka tingog nga migula gikan sa sulod nako nga nag-ingon, "Ako (Dios) makahimo*

*og labaw pa pinaagi nianang \$23 kaysa imong mahimo.” Ang Dios nakigsabot kanako aron magpugas ug \$20 ug ako mituo Kaniya alang sa maayong pagbalik.*

*Niadto nga Huwebes, nagtabang ko sa account sa laing tawo (dili akong kostumer) nga ilang giserbisyuhan. Andam kong motabang bisan wala ko koy madawatan bisan unsa, bisan pa’g mahalanan mi og bisan unsang produkto. Pagkahuman sa adlaw, ang akong superbisor miingon nga gipasalamatan niya ang akong pagtabang ug nga mahimong maako-a na ang tanang mga baligya nianang adlaw (wala kana nagapanghitabo sa mga nangomisyon sa mga baligya, basin malibog ka). Tagnaa og unsa? Ang kinatibuk-ang ganansya nga akong madawat kay... \$2,000!!! Usa ka 100 KA PILONG PAGBALIK sa wala pay usa ka semana!*

*Ang Dios tinuod nga matinud-anon, ug bisan ang gamay naghingapin na kon ang Dios anaa niini. Sukad niadto, nagkugi ko sa paghatag sa akong ikapulo ug mga halad uban ang malipayong kinaiya ug pagdahom sa pagtubo.*

*Pipila ka bulan human kini nahitabo, napanalanginan ko og bag-ong posisyon nga EKSAKTO sa akong gipugas. Gikan sa hilabihang kalisod hangtod sa upat ka pilo sa akong kinitaan sulod lang sa duha ka tuig. Dalagyon ang Dios, ug Iyang maangkon ang tanang Himaya. Laing pang pagdayeg: Dili na bangko ang tag-iya sa akong sakyanan, ug nagadrayb na ko og bag-ong awto nga BAYAD NA!!!*

Ania ang usa ka taho sa pagdayeg gikan sa Korea:

*Minahal nga Pastor Gary,*

*Nagkinabuhi ko nga walay katuyoan, ug wala koy makayang buhaton sa akong kaugalingon. Kaniadto, nagpuyo ako sa mga limos, ug sa dihang ang mga tawo gikapoy na sa pagtabang kanako, ang akong paglaom mao na lang ang pagkuha og usa ka pakete sa biskwit ug usa ka botelyang Coke. Kana ra ang akong makaya para sa pagkaon nako ug sa akong duha ka anak. Dili ko makabayad sa among abang o sa among mga balayronon. Nahinumdom pa ako sa una nakong pagtan-aw sa Faith Life Church live stream nga serbisyo. Akong gipasabot sa imong online pastor kon unsa ka grabe ang akong kahimtang, ug ang tanan nga iyang gisulti mao nga kinahanglan nako nga hangyoon ang Dios aron ipakita kanako kon unsaon ug asa mangisda, sama sa gipakita Niya kang Pedro sa dihang siya adunay buhis nga bayaran. Aron mapamubo ang estorya, nanag-iyu na ko’g African restaurant ug barbershop, tungod sa pagpaminaw sa mga pagtulon-an ni Pastor Gary. Ang akong pagdayeg ug pasalamat iya sa Dios!*

Nindot kini nga mga istorya! Apan tingali moingon ka, “Nindot kana, Gary. Siyempre, ang mga butang maayo alang sa ubang mga tawo, apan dili alang kanako.” Aw, ang imong istorya wala pa mahuman! Mangutana ko nimo: Samtang naglingkod ka nga nagbasa niini nga kapitulo, desperado ka bang nagkupot sa imong lingkuranan uban ang dakong kahadlok nga basin molutaw ka? Dili, di ba? Ngano man? Tungod kay nakasabut ka sa balaod sa grabidad, ug nahibal-an nimo nga parehas kini nga nagapanlihok alang sa tanan. Busa, ang Gingharian sa Dios nagapanlihok sa samang paagi. Makakat-on ka sa

mga balaod. Makakat-on ka sa pagpamati sa talagsaong mga estratehiya nga maghimo sa imong kinabuhi nga usa ka istorya sa gahum sa Dios. Naestablisar na nato ang kamatuoran nga ang panabot ug tabang sa Balaang Espiritu ang nagpahinabo niini nga mga istorya. Busa, sugdan nato ang atong panaw uban ang pagrepaso sa pipila ka sukaranan sa Balaang Espiritu, unya molukso kita sa mas dakong detalye sa pagpaminaw sa mga estratehiya nga atong gikinahanglan.

## KAPITULO 4

# ANG SUKARANAN BUTANG: AYAW PAGBIYA SA BALAY NGA WALA KA NIINI

Kon magpadayon ka sa usa ka kinabuhi nga puno sa mga estratehiya sa Espiritu Santo ug mga kadaugan nga giya sa Espiritu Santo, una, kinahanglan nga ikaw matawo pag-usab ug ikaduha, bautismohan sa Espiritu Santo. Oo, kining duha ka hingpit nga managlahi nga mga buhat sa sama nga Espiritu. Kon kini butang nga bag-o kaayo kanimo, okay ra na. Ako ipakita kini kanimo samtang nagpadayon kita. Apan tugoti akong moadto diretso sa punto, giingon ni Jesus nga importante kaayo ang pagbautismo sa Espiritu Santo nga giingon niya nga dili ka dapat mobiya sa balay nga wala niini! Sa maka-usa, dili ako ang nagsulti niini; si Jesus ang nag-ingon niini sa Mga Buhat 1:4-5.

*Ayaw pagbiya sa Jerusalem, apan paghulat sa gasa nga gisaad sa Akong Amahan, nga inyong nadungog nga Akong gisulti.*

*Kay si Juan nagbautismo sa tubig, apan sa pipila ka adlaw  
mabautismohan kamo sa Espiritu Santo.*

—Mga Buhat 1:4b-5

*Apan makadawat kamo og gahum sa dihang moabot ang  
Espiritu Santo kaninyo; ug kamo mahimong akong mga saksi.*

—Mga Buhat 1:8

Matikdi nga ingon si Jesus, “Ayaw pagbiya sa panimalay nga wala kini—kinahanglanon kayo kini!” Sa yano nga pagkasulti, nag-ingon siya, “Kinahanglan nimo kini nga gahum aron buhaton ang mga buhat sa Dios, aron mahimong saksi sa Gingharian. Apan karon, adunay daghang mga Kristohanon nga wala pa makadungog o nakasinati sa Bautismo sa Espiritu Santo, daghang mga Kristohanon nga gipanganak sa iglesia apan wala pa gayud nakadungog sa panginahanglanon sa Bautismo sa Espiritu Santo. O sila gipanganak sa iglesia ug gisultihan nga ang bautismo dili para karon, nga ang mga milagro nawala na.

Nagtubo ko sa ingon niana nga iglesia ug wala gayud nakadungog bahin sa Bautismo sa Espiritu Santo. Daghan kaayo kong nadawat nga mga email gikan sa mga tawo sa tibuok kalibutan nga wala pa nakadungog bahin niini nga gamhanang kamatuoran. Daghan sa mga email nga akong nadawat nagapangutana sa kamatuoran niini nga gasa alang sa atong panahon karon, mao nga gikuha nako ang panahon aron isulat ang kamatuoran bahin sa Bautismo sa Espiritu Santo.

Nagtuo ako nga ang Bibliya klaro kaayo bahin niini nga dapit, ug gusto ko nga pasagdan ang Bibliya nga magsulti alang sa iyang kaugalingon. Kini magahatag ug tubag sa tanan nimo nga mga pangutana. Apan, usa kana, gusto kong isaysay kanimo kon sa unsang paagi nako nadiskobrehan ang kamatuoran bahin sa Bautismo sa Espiritu Santo.

Sa dihang bata pa ko, nagtinguha ko sa Dios (hangtod karun, bisan

pa nga nagkaedad na ko), ug nakaapil ako sa usa ka denominasyonal nga simbahan. Nagsunod kami sa mga normal nga relihiyosong rutina sa Domingo sa buntag. Tingali nagbuhat ka usab niini. Nahinumduman ko ang pipila ka mga himno nga gisundan sa usa ka hilom nga higayon sa meditasyon. Kanunay namong gisulti ang Pag-ampo sa Ginoo, ug dayon ang pastor naghatag og sermon, usa ka panapos nga himno, ug usa ka benediksyon. Ang matag serbisyo giplano sa sama nga paagi.

Ang mga tawo didto maayong mga tawo ug, oo, tinuod nga gihigugma nila ang Dios. Apan wala gayud nako nakita ang realidad sa Ebanghelyo. Wala nako nakita ang mga kinabuhi sa mga tawo nga dramatikong nausab o mga tawo nga naayo pinaagi sa gahum sa Dios. Siguro masulti nako nga wala ako makakita og daghang demonstrasyon sa Gingharian sa Dios.

Busa didto gibati ko ang kagutom sa Dios, 18 anyos, ug nagpadagan sa pizza shop sa akong amahan. Usa ka gabii, adunay usa ka lalaki nga niadto sa pizza shop ug nag-imbatar kanako sa usa ka revival. Kini gihimo sa usa ka gamay nga Methodist nga simbahan sa among lungsod, ug ang bisita nga magwawali usa ka ebanghelista nga naghisgot bahin kang Jesus nga Siya nagbuhat gihapon sa sama nga mga butang karon sama sa iyang gibuhay sa Bibliya.

Karon, mao nay nakakuha sa akong atensyon tungod kay gusto ko nga makita kana. Ang pipila sa akong mga higala mitambong sa maong simbahan, busa nakahukom ako nga mobisita sa maong pagkapukaw. Bisan pa ug wala ko makadungog bahin sa Bautismo sa Espiritu Santo niadtong gabhiona, nahikap gayud ako sa presensya sa Dios sa maong serbisyo. Ang akong mga higala nga mitambong didto nagdasig kanako nga mobalik sa usa ka Domingo, ug nabuhat ko kini. Nahulog ang akong kasingkasing sa maong iglesia ug gihimo kini nga akong bag-ong panimalay nga simbahan.

Pipila ka semana human sa revival, nakigkita ako sa usa ka grupo sa mga kababayan-an nga mitambong sa simbahan ug naghawid usab

og usa ka semana nga pagtuon sa Bibliya. Nagsultihay sila bahin sa usa ka butang nga gitawag nga Bautismo sa Espiritu Santo, ang mga gasa sa Espiritu, ug lain-laing mga butang nga wala pa nako nadungog kaniadto. Sobra ka interesado ako nga madungog ang bahin niini nga gahum nga ilang gihisgutan nga nangutana ako kanila kon mahimo ba akong makaapil sa ilang pagtuon sa Bibliya sa mga kababayen-an. Ang ilang pagtuon sa Bibliya kay sa buntag, ug tungod kay nagtrabaho ako sa gabii sa pizza shop, nakadesisyon ako nga moapil.

Pag-abot nako didto, nakit-an nako nga ako ra gyud ang lalaki ug ang nag-edad nga 18 anyos, apan wala ko kini panumbalinga. Miadto ko sa pagtuon sa Bibliya tungod kay gigutom ako sa Dios. Daghan *kaayo* ko’g mga pangutana.

Ang mga babaye mapailubon kaayo kanako ug gidala ako sa pagbasa sa Kasulatan ug gipakita kanako sa akong *kaugalingong* Bibliya nga ang Bautismo sa Espiritu Santo para karon ug nga ang gahum sa Dios anaa karon sama sa kaniadto nga naglakaw si Jesus sa kalibotan. Ang labing maayo nga bahin mao ang ilang giingon nga kini para sa *tanang* nga mga magtutuo—para kini kang bisan kinsa nga mangayo.

Human sa akong pag-apil sa pagtuon sa Bibliya sulod sa pipila ka semana, gisultihan ko nila nga ang usa ka nasudnong ministeryo nga gitawag og Women’s Aglow nagdumala og usa ka miting sa syudad. Ang Women’s Aglow usa ka organisasyon nga nagtudlo og daghan bahin sa Bautismo sa Espiritu Santo. Ang mga babaye nagplano nga moapil, ug gidapit nila ako nga moadto uban kanila. Niadtong mga panahona, ang mga tawo gikan sa tanang denominasyon nagtapok aron maminaw ug maglipay sa kini nga bautismo nga, hangtod niadto nga punto, kasagaran lang gihisgutan sa mga simbahan sa Pentecostal. Mao kadto ang mga adlaw nga daghang mga tawo nagtawag niini nga Charismatic Renewal, diin kini nga pagtulun-an sa Espiritu Santo mitabok sa tanang linya sa denominasyon.

Sa dihang niapil ko sa miting sa Women’s Aglow, nakita nako nga

gilangkuban kini sa gatusan ka mga babaye. Usab, ako ang minority isip usa ka lalaki, apan adunay presensya sa Dios sa maong luna nga mabati.

Natingala ko samtang ang mga tawo nagsulti mahitungod sa ilang kaayohan, ug naniid ko nga may katingala samtang ang uban nga giampuan nahulog sa yuta. Kini usa ka butang nga wala pa nako nakita kaniadto, ug ako nagkainteres ug medyo nalibog niini. Nakahibalo ko nga ang mga tawo didto nagtawag niini nga pagkatumba sa Espiritu. Bisan pa sa natural nga paagi nga medyo katingalahan kini para kanako, ang mga tawo nga nakasinati niini nagtan-aw nga nagbarug nga malipayon ug klaro nga nahikap sa Dios. Sa ulahi, nakahibalo ko gikan sa mga babaye nga ang atong unod dili makapugong sa gahum sa Dios ug usahay mahimong malabwan sa ilang gitawag nga “apagdihog.”

Gipakita nila kanako kon asa kini nahitabo sa kaugalingong ministryo ni Jesus. Sa Juan 18:4b-6 sa dihang ang mga sundalo miadto kang Jesus aron dakpon Siya, nangutana si Jesus,

*“Kinsa man ang inyong gipangita?” “Si Jesus nga taga Nazaret,” ang ilang tubag. “Ako mao Siya,” miingon si Jesus... Sa dihang miingon si Jesus, “Ako mao Siya,” sila mi-atras ug nangatumba sa yuta.*

Sa panahon sa pagsimba, ang mga babaye nga nagpalibot kanako puno sa kalipay ug kadasig, ug nakadungog ko sa daghang mga tawo nga naghisgot ug nagdayeg sa Dios sa mga pinulongan. Ang tibuok nga kasinatian bag-o kaayo para kanako nga sa kadaghanan sa miting nagbarug ra ako nga nagtan-aw. Bisan pa man nga adunay daghang aspeto sa miting nga medyo katingalahan para kanako, dili ko makalimod sa katingad-an ug mabati kaayo nga presensya sa Dios. Nalipay kaayo ako nga nakit-an ang realidad sa Ebanghelyo, ang gahum sa Dios, nga nagpadayon pa sa yuta, sama sa Bibliya.

Niadtong adlaw, ang magwawali nangutana kang bisan kinsa nga gustong makadawat niining gasa sa Espiritu Santo nga moadto sa unahan alang sa pag-ampo sa katapusan sa bahin sa serbisyo. Busa, miduol ako sa unahan aron mag-ampo uban sa mga kababayan-an. Samtang sila nag-ampo, napuno ko sa kusog nga presensya sa Dios nga nagkadugay, nagkalig-on pa gayud. Sa akong pagpasakop sa Iyang presensya, nakurat ko nga nakadungog ko sa akong kaugalingon nga nag-ampo sa Espiritu Santo, ug nag-ingon og mga pulong nga wala nako masabti. Nag-ampo ko sa mga dila sulod sa dugay nga panahon niadtong gabhiona. Nabati nako ang dako nga kahingawa tungod sa maong kasinatian, gusto nako isulti sa tanan nga akong matagbo-an kon unsay nahitabo kanako! Apan sa dihang akong gisulti sa akong mga higala sa iglesia ang akong kasinatian, wala sila malipay. Kasagaran, ilang giingon nga ang pagsulti sa mga pinulongan gikan sa yawa, o nga kini wala na karon. Gipahimangnoan ko nila nga likayan kadtong mga Holy Rollers!

Niadtong panahona, daghang mga iglesia ang dili abli sa mga gasa sa Espiritu, ug ang nag-una nga doktrina nga ang mga milagro daw nahunong na uban sa mga apostol. Apan karon nasabtan ko nga ang gahum sa Dios wala gayud mawala!

Sa wala pa mahitabo ang maong Women's Aglow nga kalihokan, gihatagan ako og katungdanan sa kabatan-onan sa maong gamay nga Methodist nga simbahan. Wala gayud kaayoy gikinahanglan gikan kanako gawas nga maghimo kami og miting sa kabatan-onan matag Domingo sa gabii sa basement sa simbahan. Kasagaran magdula kami, magkaon og mga snacks, ug maghimo og mubo nga pagtuon sa Bibliya. Ako usa ra pod sa mga kabatan-onan, apan nakita nako nga aduna koy kadasig alang sa mga butang sa Dios ug andam nga motabang.

Kasagaran adunay mga 15 ka batan-on sa grupo, ug human sa akong kasinatian niadtong adlaw sa miting sa Women's Aglow, gusto nakong isulti kanila ang bahin sa Bautismo sa Espiritu Santo nga akong

nasinati. Nakamatikod ko nga, sama kanako, kadaghanan kanila wala gani nakadungog bahin niini nga kasinatian, ug nahibalo ko nga dili sila makadungog bahin niini sa serbisyo sa Domingo sa maong simbahan.

Sa dili pa nako isulti kanimo kon unsay nahitabo sunod, nagtuo ko nga angay nakong ihatag kanimo ang usa ka dali nga update sa akong panghunahuna niadtong panahona. Wala ko makakuha og pagtugot gikan sa pastor aron hisgutan kini sa mga kabatan-onan. (Karon nasabtan nako nga angay unta nga ako nananghid.) Wala usab nako siya gisultihan kon unsay nahitabo kanako. Wala ko nagtinguha nga maglakaw sa pagsupak batok sa akong simbahan, ug wala ko nagtinguha nga molikay sa akong pastor. Nagsugod lang ko og kadasig. Sa kana nga panahon, wala gyud nako nasabti ang kontrobersiya nga bahin niini nga hilisgutan, ug sigurado nga wala ko nagtuo nga ang pastor supak niini.

Sa Domingo nga gabii human nako madawat ang Bautismo sa Espiritu Santo, nagplano ako nga isulti sa mga kabatan-onan ang nahitabo kanako, ug ipakita kanila ang pipila sa mga Kasulatan nga naghisgot bahin niini sa libro sa mga Buhat. Anaa kami sa basement sa simbahan nga naglingkod sa salog sa usa ka sirkulo sa dihang akong gipaambit ang akong kasinatian kanila ug gipakita ang pipila sa mga Kasulatan nga nagpamatuod sa maong kasinatian.

Niadtong maong gabhiona, miapil sa miting ang pastor ug naglingkod sa akong wala samtang nagpaambit ko. Wala ra kanako ang iyang presensya, kay isip akong pastor, naghunahuna ko nga nahibal-an na niya ang tanan nga akong ipaambit.

Busa, nagpaambit ko kanila mahitungod sa miting nga akong giadto ug sa mga butang nga akong nakita. Wala ko mosulod pag-ayo sa mga detalye bahin sa pagsulti sa pinulongan sa Espiritu. Hinuon, akong gibutang ang akong pagtagad sa Buhat 1:8, diin giingon nga makadawat kita og gahum sa dihang moabut ang Balaang Espiritu aron kita mahimong saksi sa Dios. Sa kataposan sa miting, wala gyud

ko kahibalo kon giunsa paghuman sa akong leksyon, busa akong gipangutana ang mga batan-on kon kinsa ang gusto modawat sa Bautismo sa Balaang Espiritu ug ipataas ang ilang kamot.

Wala ko kabalo unsay buhaton niadtong panahona. Pasabot, wala pa ko makakita og bisan kinsa nga nagministeryo sa usa ka tawo bahin sa Bautismo sa Espiritu Santo gawas sa akong nakita sa miting sa Women's Aglow. Sa akong hunahuna, tingali duha o tulo ra ka mga Kasulatan ang akong nahibaw-an nga nagtumong niini niadtong panahona.

Busa, akong giingon, "Kon gusto nimo madawat kini nga libre nga gasa sa Espiritu Santo, itaas lang ang imong kamot, ug mag-ampo kita." Mao ra gyud na ang akong giingon. Wala ko sila gihikap o gitudloan kon unsaon pagdawat sa Espiritu Santo. Nag-ampo kami ug nag-ampo. Siyempre, gisira namo ang among mga mata aron mag-ampo sama sa gitudlo sa tanan nga "maayo" nga denominasyonal nga mga Kristohanon.

Samtang naglingkod ako didto human ko miingon og "Amen," nagsugod ako pagpaminaw sa pipila ka kasamok sa mga bata. Gibuka ko ang akong mga mata ug nakita nga ang pipila sa mga bata nanghilak, ang uban nagkurog, ug pito ka mga bata nagsugod sa pagsulti sa mga pinulongan. Sa dihang nagsugod sila sa pagsulti sa mga pinulongan, nakita nako ang labing talagsaon nga kahayag sa ilang mga nawong. Sila nagdan-ag sama sa mga bombilya! Nakalitan ako!

Ang akong pastor, nga wala mag-ingon og bisan unsa hangtod niining panahona, dali siyang mitapik sa akong abaga ug nangutana kon mahimo ba siyang makig-istorya kanako dayon. Misulod kami sa sunod nga kwarto, ug gitutokan niya ako sa mata ug miingon, "Kini gikan sa yawa. Dili na ka mahimong lider sa kabatan-onan dinhi. Dili na nato kini tugutan."

Naghuna-huna ako, *Unsaon nimo pag-ingon nga kini gikan sa yawa? Tan-awa ang mga kabataan! Nagdan-ag sila!* Makita nimo ang pagdihog nga pisikal kanila. Syempre, wala pa ko kabalo kon unsa ang

pulong nga *pagdihog* kaniadto. Nahibalo lang ko nga nagdan-ag sila, ug wala ko sila gihikap o gisultihan unsaon paglihok. Kini nga sitwasyon nakapahugno ug nakalibog kanako nga ang akong pastor nagpasipala kanako sa ingon niana, ug wala ko kabalo unsaon pag-atubang niini.

Sa sunod nga Domingo, mibalik ko sa simbahan, apan imbis nga maglingkod sa atubangan sa simbahan diin kasagaran ko maglingkod, naglingkod ko sa likod. Nahibalo ko nga daw nasuko nako ang akong pastor tungod sa miting sa kabatan-onan, ug naghunahuna ko nga mas maayo nga maghilum sa makadiyot samtang akong gisabot ang mga butang.

Sa serbisyo sa Domingo sa buntag, adunay kasagaran nga hilom nga higayon sa meditasyon. Usa ka gitahod ug hilom nga higayon sa pag-ampo sa akong iglesia. Ang tanan nga mga ulo nakaduko, ug walay tingog sa simbahan. Halos wala gyud kay madungog. Sa kini nga higayon, nabati nako nga adunay nagtapik sa akong abaga. Anaa ko sa tumoy sa lingkoranan, ug sa dayag, may usa ka tawo nga nagbarog sa pasilyo ug mitapik sa akong abaga.

Sa sinugdanan, nakalitan ko nga maghunahuna nga adunay usa ka tawo nga naglakaw sa panahon sa hilom ug mahinay nga pag-ampo. Sa dihang nagtanaw ko sa itaas, nakalitan ko nga makita ang usa sa mga bata nga anaa sa miting sa kabatan-onan sa miaging semana. Nahibalo usab ko nga siya usa sa pito nga nakadawat sa Bautismo sa Espiritu Santo niadtong gabhiona. Nagtan-aw siya kanako ug miingon, “Tara na!” Naghunahuna ko, *Tara na? Asa ta moadto?*

Katingalahan, tungod kay siya nagdan-ag sama sa gabii nga nadawat niya ang Espiritu Santo, ug nahibalo ko nga ang Dios adunay ginabuhat. Apan dili ko sigurado kon mao ba kini ang hustong oras o dapit aron buhaton ang bisan unsa, ilabi na kay anaa na ko sa problema sa among pastor. Nasayod usab ko nga dili lang kita makabuhat og bisan unsa nga atong gusto sulod sa Domingo sa buntag nga pagsimba. Unya siya miingon, “Moadto ko aron ampoan ang akong inahan.”

Karon, nagsugod na ko sa pagsabot kon unsa ang nahitabo. Kaila ko sa iyang inahan. Usa siya ka gamay ug niwang nga babaye nga dugay na nga nagmasakiton. Lima ka bukog sa iyang mga hawak naguba na, ug ang bugtong paglaom sa doktor mao ang paghiusa niini pinaagi sa operasyon. Kini nga operasyon seryoso kaayo, ug ang akong higala mao ra usab ang iyang bugtong anak. Siyempre, nabalaka siya alang sa iyang inahan.

Human makadawat sa Bautismo sa Espiritu Santo, nabati niya nga pagaayohon ni Jesus ang iyang inahan. Busa sa dihang miingon siya, “Tara na,” nagtuo ko nga moadto siya didto ug itapion ang iyang mga kamot sa iyang inahan ug mag-ampo alang kaniya sa hilom. Apan dili kana ang iyang gibuhay. Miadto siya sa iyang inahan, gikuha siya gikan sa lingkuranan, ug gidala siya sa atubangan sa simbahan.

Gipalingkod niya siya ug nagsugod sa pag-ampo alang kaniya sa kusog nga nag-ampo diha sa lahi nga mga pinulongan. Karon hinumdumi, nahitabo kini sa panahon sa “hilom” nga pagmeditasyon, ug karon anaa nay nagsaba-saba. Nakalitan ko! Dayon siya mitan-aw kanako ug miingon, “Ikaw ang magpasabot unsay nahitabo.”

Karon nasabtan ko ngano nga buot niyang ubanan ko siya. Gituohan niya nga ako ang nagsulti kaniya bahin sa Bautismo sa Espiritu Santo, busa gituohan niya nga makasulti ako sa kongregasyon bahin niini human nila madungog siya nga nag-ampo sa lahi nga mga pinulongan alang sa iyang inahan.

Mao nga anaa ako nga nagtindog sa atubangan sa kongregasyon isip iyang tigpahayag, ug siya nga nag-ampo alang sa iyang inahan sa mga pinulongan. Wala gyud ko nahibalo unsay isulti, labi na kay ang akong pastor nagtan-aw kanako nga nagdilaab. Gisulti ra nako sa kongregasyon nga ang iyang inahan masakiton ug nga nag-ampo siya alang kaniya sa mga pinulongan, nga anaa sa Bibliya. Apan kabalo ka unsa? Dihadiha dayon naayo ang iyang inahan niadtong buntaga sa simbahan!

Mao kana ang pagtuo sa usa ka anak nga wala gayud nagtagad kon unsa ang hunahunaon sa uban bahin sa iyang pag-ampo. Sigurado siya nga ang Espiritu Santo buhi ug maayo ug makaayo sa iyang inahan.

Bisan pa nga naayo siya dihadiha dayon, wala kini madawat sa mga tawo sa simbahan. Sa tinuod lang, daghan kanila ang niadto kanako pagkahuman ug miingon, “Aw, wala koy problema nga nag-ampo siya para sa iyang inahan, apan kana nga mga pinulongan, dili namo madawat kana nga butang.” Makasiguro ko nga nagdumot usab ang yawa sa pagsulti sa pinulongan sa Espiritu, ug naglaom ko nga matabangan ko ikaw sa pagsabot kon ngano nga nagdumot siya niini sa dili pa matapos kini nga libro.

Tingali nagdako ka sa usa ka simbahan diin ang pagsulti sa pinulongan sa Espiritu ug ang mga gasa sa Espiritu wala ginabansya. O tingali nagdako ka nga gitudloan nga ang pagsulti sa lahi nga mga pinulongan dili para karon o kini nawala na. Dili lisod tubagon ang mga pangutana. Ang Bibliya klaro kaayo bahin niini. Busa atong tanawon pag-ayo ang Pulong ug pangitaon ang kamatuoran bahin sa Bautismo sa Espiritu Santo. Balik ta sa mga bersikulo nga atong gibasa sa sinugdanan niini nga kapitulo.

*Ayaw pagbiya sa Jerusalem, apan paghulat sa gasa nga gisaad sa Akong Amahan, nga inyong nadungog nga Akong gisulti. Kay si Juan nagbautismo sa tubig, apan sa pipila ka adlaw mabautismohan kamo sa Espiritu Santo.*

—Mga Buhat 1:4b-5

Adunay pipila ka importanteng mga punto nga atong makita niini nga bersikulo:

1. Ang Bautismo sa Espiritu Santo lahi sa pag-bautismo sa tubig.
2. Si Jesus miingon nga kini labing importante. Sa pagkatinuod, iyang gipakita nga dili ka makabuhay og bisan unsa kon wala kini.

Hinumdumi, si Jesus bag-o lang nagsulti sa mga disipulo nga moadto ug iwali ang Maayong Balita sa tanang nasud, apan dili nila mapakita o mapamatud-an ang Gingharian sa Langit kon wala kini nga pagbautismo. Busa siya miingon, “Pabilin hangtod nga madawat ninyo kini nga paghatag og gahum.”

*Apan makadawat kamo og gahum sa dihang moabot ang Espiritu Santo kaninyo; ug kamo mahimong akong mga saksi sa Jerusalem, ug sa tibuok Judea ug Samaria, ug hangtod sa katapusan sa yuta.*

—Mga Buhat 1:8

*Gahum!* Ang Grego nga pulong para sa *gahum* mao ang *dunamis* ug mao kini ang atong nakuha nga pulong para sa dinamita. Busa

**“ANG MGA PULONG  
NGA AKONG GIINGON  
KANINYO DILI KINI  
AKO. KON DILI,  
ANG AMAHAN NGA  
NAGPUYO KANAKO,  
NGA NAGAHIMO SA  
IYANG BULUHATON”**

**—JUAN 14:10B**

makita nato nga ang gahum sa Dios nag-abot kanato aron buhaton ang Iyang mga buhat. Sa mas sayo nga bahin sa ministeryo ni Jesus, iyang gihisgutan nga ang gahum, o ang pagdihog nga nagadagan Kaniya, gikan sa Iyang Amahan.

*“Ang mga pulong nga Akong giingon kaninyo dili kini Ako. Kon dili, ang Amahan nga nagpuyo Kanako, nga nagahimo sa Iyang buluhaton”* (Juan 14:10b).

*“Sa pagkatinuod, sultihan ko kamo, ang Anak dili makabuhat og bisan unsa sa Iyang kaugalingon”* (Juan 5:19).

Makita nimo, gikinahanglan ni Jesus ang pagpalig-on sa Espiritu sa Dios mismo. Ang pulong nga *pagdihog* nagpasabot nga “gipahiran.”

Nadawat ni Jesus ang maong pagdihog sa Suba sa Jordan gikan sa Iyang Amahan sa dihang ang Espiritu Santo miabot kaniya sa porma sa usa ka salampati.

Niadto rang human nga nadawatan ni Jesus ang maong pagdihog nga nakabuhat Siya sa mga bulohaton sa Gingharian. Kon kinahanglan ni *Jesus*, kinahanglan usab nato kini! Ang gahum magtestigo (o magpamatuod) pinaagi sa demonstrasyon nga ang Dios tinuod ngadto sa mga tawo nga wala makaila Kaniya.

Ang Bibliya usab nag-ingon nga makadawat ka ug gahum kon ang Espiritu Santo **MOABOT KANIMO**, dili kon Siya *mosulod* kanimo sama sa dihang ikaw matawo pag-usab.

Daghan ang nalibog kon maghisgot kita bahin sa Pagbautismo sa Espiritu Santo, nagtuo sila nga nadawat na nila ang Espiritu Santo sa dihang gidawat nila si Cristo. Ug ang kamatuoran mao nga *nadawat* nila ang Espiritu Santo sa dihang nadawat nila si Cristo. Ang Espiritu Santo naghimo sa ilang mga espiritu nga buhi ngadto sa Dios ug uban sa Dios.

Nabuhi na kita diha sa Dios pinaagi sa gahum sa Espiritu Santo nga anaa sa sulod nato sa dihang kita gipanganak pag-usab. Apan timan-i nga kini nga Kasulatan nag-ingon nga sa dihang ang Espiritu Santo moabot diha kanimo. Kini usa ka importante nga kamatuoran nga atong hisgotan sa ulahing bahin niini nga libro: ang pagkatawo pag-usab ug ang pagdihog o pagbautismo sa Espiritu Santo duha ka nagkalahi-lahi nga mga panghitabo. Makakuha kita og mas maayong pagsabot niini kon atong tan-awon ang Juan 20:21-22.

*Usab miingon si Jesus, “Ang kalinaw anaa kaninyo! Sama sa pagpadala sa Amahan kanako, nagapadala usab ako kaninyo.” Ug sa ingon, gihuyopan niya sila ug miingon, “Dawata ang Espiritu Santo.”*

Makita nato si Jesus dinhi human sa iyang pagkabanhaw samtang siya nag-abiabi sa iyang mga tinun-an ug nagginhawa kanila ug nag-ingon nga dawata ang Espiritu Santo. Kini ang higayon nga sila natawo pag-usab ug ang ilang mga espiritu nabalik ngadto sa Dios sa sulod. Apan si Jesus nag-ingon kanila nga maghulat alang sa Bautismo sa Espiritu Santo, nga moabot kanila sa umaabot nga adlaw.

Kon nadawat na nila ang tanan nga anaa sa Balaang Espiritu sa dihang miginhawa si Jesus kanila, nganong gisultihan man sila nga maghulat sa Jerusalem hangtod nga madawat nila ang Balaang Espiritu nga gisaad nga moabot kanila? Usab, duha kini ka naglahing mga panghitabo ug duha ka naglahing mga gimbuhaton, apan susama ra nga Espiritu. Usab, sama sa akong giingon, gusto nakong ipakita nga gikinahanglan ni Jesus nga mabautismohan Siya sa Balaang Espiritu aron makasulod ug mahimong epektibo sa iyang ministryo. Sa wala pa mabautismohan si Jesus sa Balaang Espiritu, walay natala nga siya nakahimo og usa ka milagro. Naghimo ba si Jesus og daghang pan sa lamisa sa panihapon sa dihang siya nagdako? Naghimo ba siya og mga milagro sa dihang siya usa pa ka bata? Naghimo ba siya og daghang pagkaon sa bata pa siya sa dihang nahurot kini tungod kay siya gigutom pa? Wala! Wala gayud. Ngano man nga wala? Ang yano ug tinuod nga tubag mao kini: *Dili pa Siya makahimo.*

Wala siya nagsugod sa pagbuhat og mga milagro hangtod nga *nahuman* na Niya pagdawat ang Balaang Espiritu didto sa Suba sa Jordan. Makita nimo, si Jesus miabot isip usa ka tawo. Wala siya miabot isip Anak sa Dios sa Iyang gahum ug himaya. Isip usa ka tawo, Siya limitado sama sa kang bisan kinsa nga tawo. Dili siya makaayo o makahimo og bisan unsang milagro, sama sa dili nato mahimo ang bisan unsang milagro sa atong kaugalingon.

Apan, dili sama kanato, ang espiritu ni Jesus wala mamatay sa Dios sa dihang siya natawo nga usa ka bata. Ang Iyang espiritu kanunay

nga buhi sa Dios; wala Siya magkinahanglan nga ipakatawo pag-usab sama sa atong gibuhay. Apan, bisan pa nga ang Iyang espiritu buhi sa Dios isip usa ka Anak, kinahanglan gihapon Siya nga mabautismohan sa Espiritu Santo sa dili pa siya makasugod sa Iyang ministeryo, sama kanato.

*Sa dihang si Jesus nabautismohan, siya miguwa gikan sa tubig. Sa maong higayon ang langit na-abli, ug nakita Niya ang Espiritu sa Dios nga nagapanaug sama sa usa ka salampati ug nagapahimutang Kaniya. Ug usa ka tingog gikan sa langit miingon, “Kini ang Akong Anak, nga Akong gihigugma; diha Kaniya Ako nalipay.*

—Mateo 3:16-17

Hinumdumi, giisip nato si Jesus nga Hari sa mga hari ug Ginoo sa mga ginoo, apan dili kini ang posisyon diin Siya nagministeryo. Nahitabo lamang kini human nga ang Espiritu Santo miabut kaniya sa Suba sa Jordan dayon nagsugod na ang mga milagro.

Ang imong ministeryo (tungod kay ang *matag* magtutuo gitawag sa pagbuhay sa mga buhat ni Jesus) dili makasugod hangtod nga ikaw mabautismohan sa Espiritu Santo—kinahanglan nimo ang gahum sa Espiritu Santo aron mabuhay ang mga butang. Ug kinahanglan nimo ang abilidad sa pag-ampo sa Espiritu aron mahibal-an kon unsaon kini pagbuhay, sama sa atong pagahisgutan sa ulahi.

Siyempre, mahimo nimong itanyag ang kasinatian sa pagkatawo pag-usab pinaagi sa pagsulti sa uban kon unsa ang giingon sa Bibliya bahin sa kaluwasan. Daghang mga Kristohanon nga wala mabautismohan sa Espiritu Santo nga epektibo sa pagpaambit sa Maayong Balita sa Ebanghelyo, apan wala silay gahum sa pagpakita sa Gingharian sama sa gibuhay ni Jesus. Kini nagdala sa daghang huyang nga pagwali.

Sa dihang giatubang ni Jesus ang mga Pariseo bahin sa ilang

pagkawalay pagtuo, naghisgot Siya sa mga milagro nga iyang gibuhat. Miingon Siya,

*“Tuohi ako sa Akong giingon nga ako anaa sa Amahan ug ang Amahan anaa Kanako; o tuohi na lang ang ebidensya sa mga milagro mismo”* (Juan 14:11).

Sa kinatibuk-an, si Jesus nag-ingon nga kini nga demonstrasyon sa Gingharian naghunong sa tanang argumento; ang isyu nasulbad na. Karon, siyempre, ang matag magtutuo adunay hingpit nga legal nga katungod sa tanan nga gibayran ni Jesus, lakip na ang pag-ayo. Ang matag magtutuo makadawat sa matag saad sa Dios pinaagi sa pagtuo (panagsabot sa langit), ug dili nila kinahanglan ang Bautismo sa Espiritu Santo aron makadawat gikan sa Dios.

Apan aron ang gahum gikan kanimo modagayday sa uban, ug aron ikaw makapadayon sa mga gasa sa Espiritu ug maglipay sa benepisyo sa paglakaw sa mga langitnong misteryo pinaagi sa pag-ampo sa lahi nga mga pinulongan, kinahanglan nga aduna kay gahum sa maong pagdihog! Nasabtan nako nga basin dili nimo masabtan ang akong gipasabot sa dihang nag-ingon ako nga mag-ampo sa lahi nga mga pinulongan. Ayaw kini kahadloki; akong ipasabot kini sa ulahi sa hingpit.

Ang akong anak nga si Amy mao ang nagapangulo sa pagsimba sa among simbahan, ang Faith Life Church, sa New Albany, Ohio. Sulod sa pipila ka tuig, siya adunay usa ka kondisyon nga nakapahibudlong kanamong tanan—hinayhinay nga midako ug mibaga ang iyang tiyan. Bisan pa sa among pag-adto sa daghang mga doktor, walay bisan usa nga nakabalo kon ngano kini nahitabo. Ang giingon nilang tanan nga mao lang gyud kana ang porma sa iyang lawas.

Nagpadayon kini hangtod nga mura na siya’g nagmabdos og bata nga mga unom ka bulan na ang gidak-on. Niadtong panahona, si Amy

nagpa-X-ray, ug karon klaro sa X-ray nga makita namo ang dako nga pagtubo sa iyang tiyan. Sa pagtan-aw sa X-ray, nahibaw-an ni Amy kon unsa ang sunod nga lakang sa medisina, ug kana mao ang operasyon. Kay bag-o lang nga nagminyo, nagtuo ni Amy nga ang bisan unsang klase sa operasyon mahimong makapugong o mahimong imposible na kaniya nga makaanak. Dili kini usa ka kapilian alang kang Amy. Nagdamgo siya sa tibuok niyang kinabuhi nga mahimong usa ka inahan. Makita usab namo sa X-ray ang dako nga pagtubo nakaapekto sa uban niyang mga kaunoran, ug kini nagdala og mga problema kang Amy sa pagtunaw sa iyang kinaon ingon man sa seryosong mga problema sa kidney. Nakadesisyon siya nga seryosohon ang Pulong sa Dios ug maghatag og panahon aron magpokus sa kon unsay gitudlo sa Bibliya bahin sa kaayohan. Sa samang mga semana, nagtudlo ako bahin sa kaayohan sa Faith Life Church. Sa katapusan sa maong serye, naghangyo si Amy sa mga kadagkoan nga itapion ang ilang mga kamot kaniya ug mag-ampo alang sa iyang kaayohan sumala sa Santiago 5:14–15, nga among gihimo.

*Aduna bay usa kaninyo nga masakiton? Tawga ang mga kadagkoan sa simbahan aron paga-ampoan siya ug pagdihogan siya og lana sa ngalan sa Ginoo. Ug ang pag-ampo nga may pagtuo magahatag og kaayohan sa masakiton; pagabangonon siya sa Ginoo. Ug kon siya nakasala, siya mapasaylo.*

—Santiago 5:14-15

Si Amy, nga nakasiguro sa Pulong sa Dios, *nag-angkon* sa iyang kaayuhan sa dihang gibutang namo ang among mga kamot kaniya. Bisan pa walay pisikal nga pagpakita sa iyang kaayuhan sa higayon nga nag-ampo kami alang kaniya, nakasiguro siya nga siya naayo na.

Pagkahuman sa duha ka semana, natulog siya, nga wala gihapoy pisikal nga ebidensya nga siya naayo, apan siya nagmata sa buntag nga

naglibog. Nawala ang 13 ka libra ug 9 ka piye (inches) sa iyang hawak sa usa ka gabii samtang siya natulog. Ang iyang likod nga nabaliko ug natuis karon hingpit na nga normal usab. Siya dihadiha nga naayo!




SA WALA PA

PAGHUMAN

Kini nga mga litrato nagpakita sa katingalahang pag-ayo. Ang litrato sa wala mao ang hitsura ni Amy sa dihang siya natulog. Ang litrato sa tuo mao ang hitsura niya sa dihang siya nagmata.

Makita nimo ang X-ray (*anaa sa sunod nga pahina*) sa iyang likod sa walang bahin sa wala pa siya maayo ug ang X-ray nga nakuha usa ka semana human siya maayo nga anaa sa tuo. Bantayi ang dakong kausaban sa iyang spine!

Si Amy sa panahon niana ug hangtod karon mao ang among lider sa pagsimba sa Faith Life Church. Siyempre, ang nahitabo sa sunod nga Domingo sa dihang siya miadto sa simbahan—ang mga tawo nagtutok kaniya! Ang mga tawo mihunong sa lobby, nagkaguliyang, ug miingon, “Unsay nahitabo nimo? Nakadawat ka og bag-ong lawas?” Ang tibuok iglesia nagkaguliyang niadtong Domingoha samtang si Amy nagdala sa



pagsimba, ug kini nga demonstrasyon sa Gingharian sa Dios nagdala sa daghang tawo ngadto sa Dios ug daghan ang nangaayo.

Kinahanglan kang mouyon, ang mga tawo kinahanglan makakita sa Gingharian sa Dios nga nagapanlihok. Sa Mga Buhat 1:8, makita nato nga ang pagdihog, kini nga pagbautismo sa Espiritu Santo importante.

*Apan makadawat kamo og gahum sa dihang moabot ang Espiritu Santo kaninyo; ug kamo mahimong akong mga saksi sa Jerusalem, ug sa tibuok Judea ug Samaria, ug hangtod sa katapusan sa kalibotan.*

—Mga Buhat 1:8

Ug sa tanang bahin nga may kalabutan kang Jesus, *importante* kini alang sa pagpakita sa Gingharian sa Dios.

*Ug mao kini ang mga timaan nga mabatonan sa mga motuo: sa Akong ngalan maghingilin sila’g mga yawa ug manulti sila’g*

*lainlaing mga sinultihan. Makakupot sila’g mga balas ug kon makainom silag hilo, dili sila maunsa. Itapion nila ang ilang mga kamot sa mga masakiton ug mangaayo sila.*

—Marcos 16:17-18

Ang pagpunit og mga bitin ug ang pag-inom og makamatay nga hilo nagpasabot sa gingharian ni Satanas ug usa ka direkta nga paghisgot mahitungod sa kahadlok. Ang gingharian ni Satanas napildi na. Si Jesus wala nagpasabot nga atong kuhaon ang mga delikadong bitin o mag-inom og makamatay nga hilo, apan gigamit niya kini nga pulong isip usa ka pananglitan sa gahum nga gihatag kanato batok sa kaaway. Kinahanglan natong dalhon ang maong awtoridad ug gahum sa Dios ngadto sa teritoryo ni Satanas ug tagaan ug kagawasan ang mga katawhan!

Matikdi nga si Jesus nag-ingon nga **“kini nga mga timaan”** mosunod sa mga nagtuo. Samtang ang mga tawo makakita niini nga mga timaan (mga demonstrasyon) sa Gingharian, mangutana sila kon giunsa kini pagkahitabo-a. Ang usa ka timaan nagpunting sa usa ka butang. Sa iyang kaugalingon, dili kini ang tubag, apan nagpunting kini kang Jesus, nga mao ang tubag!

Kini nga mga timaan naghunong sa tanan nga argumento kon si Jesus ba ang Ginoo—SIYA ANG GINOO! Ug kon makita sa mga tawo nga Siya mao, sila magbasol ug moadto sa Dios. Mao nga kinahanglan nato nga Bautismo sa Espiritu Santo, ug dili kita mahimong tinuod nga epektibo kon wala kini!

Busa, karon nga nakabuhat kita og gamay nga pundasyon kon ngano nga kinahanglan nimo ang pagbautismo sa Espiritu Santo, atong susihon ang mga Kasulatan nga nagtumong niini nga pagdihog.

## KAPITULO 5

# EBIDENSYA SA KASULATAN

Usa sa pinakamaayong paagi aron makasabut sa Bautismo sa Espiritu Santo mao ang pagsunod sa pananglitan niadtong nakadawat niini sa Adlaw sa Pentecostes, sumala sa natala sa libro sa Mga Buhat. Samtang atong susihon ang matag Kasulatan, modako ang imong pagtuo ug pagsalig nga kini nga bautismo para usab kanimo.

*Sa pag-abot sa Adlaw sa Pentecostes, silang tanan nagkatigom sa usa ka dapit. Sa kalit, usa ka kusog nga tingog sama sa huros sa hangin ang miabut gikan sa langit ug mipuno sa tibuok balay nga ilang gilingkoran. Nakita nila ang daw mga dila nga kalayo nga nagbulag ug mipatong sa matag usa kanila. Silang tanan napuno sa Balaang Espiritu ug misugod sa pagsulti sa lain-laing mga pinulongan, sumala sa gahom nga gihatag sa Espiritu.*

*Karon, dihay nagpabilin sa Jerusalem nga mahadlok sa Dios nga mga Hudiyo, nga naggikan sa matag nasod ilalom sa langit. Sa pagkadungog nila sa tingog, usa ka panon sa katawhan ang midugok ug natingala, tungod kay ang matag usa nakadungog kanila nga nagsulti sa ilang kaugalingong pinulongan.*

*Nahingangha sila pag-ayo ug nangutana: “Dili ba mga Galileanhon kining tanan nga mga tawo nga nagsulti? Nan, ngano nga ang matag usa kanato makadungog kanila sa atong kaugalingong pinulongan? Kami nga mga taga Parthia, Medianhon, ug Elamita; mga lumulupyo sa Mesopotamia, taga Judea, ug taga Capadocia, taga Ponto ug taga Asia, Frigia ug Pamfilia, taga Ehipto, ug sa mga bahin sa Libya nga duol sa Cyrene; mga bisita gikan sa Roma (mga Hudiyo ug mga nakabig sa Judaismo); mga taga-Creta ug mga Arabo—nadungog namo sila nga nagpahayag sa mga katingalahang butang sa Dios sa among kaugalingong pinulongan!”*

*Natingala ug nangalibog sila, ug nangutana sa usa’g usa, “Unsa may buot ipasabot niini?” Apan ang uban nagbiaybiay kanila ug nag-ingon, “Nangahubog na kana sila sa bino.”*

— Buhat 2:1-13

Ang una nga butang nga gusto nakong makita nimo mao nga ang Bibliya nag-ingon nga **silang tanan** napuno sa Balaang Espiritu! Ikaduha, silang *tanan* nagsulti sa lain-laing mga pinulongan. Tingali nakadungog na ka sa mga tawo nga naghulagway sa Adlaw sa Pentecostes ug nagsaysay kon ngano nga silang tanan nagsulti sa lain-laing mga pinulongan. Ang uban mipugos nga kini usa ka talagsaong kasinatian alang sa iglesia tungod kay ang mga tawo nagpundok didto nga naggikan sa daghang mga nasud. Busa, matod nila, gikinahanglan ang lain-laing mga pinulongan aron sa pagsangyaw sa Ebanghelyo ngadto sa tanan nga mga katawhan sa ilang kaugalingong sinultian.

Apan kon imong tan-awon ang Kasulatan, imong makita nga ingon diri nga kining 120 ka mga tawo nga anaa didto sa ibabaw nga lawak nagsulti sa mga katingalahang buhat sa Dios. Wala sila nagwali sa Ebanghelyo; nagdayeg lang sila sa Dios.

*“Nadungog namo sila nga nagpahayag sa mga katingalahang butang sa Dios sa among kaugalingong mga pinulongan!” Natingala ug nangalibog sila, nangutana sa usa’g usa, “Unsa may buot ipasabot niini?”*

— Buhat 2:11b-12

Ang mga tawo nga nagtindog sa palibot nakadungog kanila nga nagdayeg sa Dios sa ilang kaugalingong lumad nga pinulongan, busa sila nangatingala ug nalibog. Unya mitindog si Pedro ug nagwali sa mensahe sa kaluwasan, ug 3,000 ka tawo ang nadugang sa iglesia niadtong adlaw. Karon, kon ang mga disipulo *nagwali* pa sa lain-laing pinulongan, dili na unta kinahanglan nga motindog si Pedro ug magwali. Apan hangtod nga wala pa si Pedro mibarog ug misangyaw, wala sila masayod sa kahulogan sa ilang nadungog. Ang mga pagsulti sa laing pinulongan wala gigamit sa pagsangyaw sa Ebanghelyo kaniadto, ug wala kini gigamit sa pagsangyaw sa Ebanghelyo karon. Atong hisgotan ang kaayohan sa paggamit sa lain-laing pinulongan alang sa mga magtotoo sa ulahi nga kapitulo, apan sa pagkakaron, ako lang ipasabot ang usa sa komon nga argumento nga akong madungog.

Sa makausa pa, gusto nako nga ipasabut nga ang Bibliya nagingon nga silang *tanang* nakadawat ug silang *tanang* nagsulti sa lain-laing pinulongan. Karon, kon ang Bibliya mihunong didto mismo, tingali magduhaduha kita nga ang pagsulti sa lain-laing pinulongan para sa tibuok iglesia. Apan wala kini gihimo sa Bibliya. Hinoon, atong makita nga kini nga panghitabo nagpadayon ug nahitabo sa *matag tawo* nga nakadawat sa Bautismo sa Balaang Espiritu human sa Adlaw sa Pentecostes.

Tugoti ko nga sultihan ka bahin sa usa sa mga lalaki nga anaa sa Adlaw sa Pentecostes—ang iyang ngalan mao si Felipe.

*Kadtong mga nagkatibulaag nagwali sa pulong bisan asa sila moadto. Si Felipe milugsong ngadto sa usa ka siyudad sa Samaria ug didto nagmantala mahitungod kang Cristo. Sa dihang ang mga panon sa katawhan nakadungog ni Felipe ug nakakita sa milagrosong mga ilhanan nga iyang gibuhay, silang tanan namati pag-ayo sa iyang gisulti.*

— Buhat 8:4-6

Dinhi, atong makita si Felipe nga nagpasundayag sa Gingharian ug ang mga tawo nga namati. Ingon unta niana ang mahitabo karon! Kon *makita* sa mga tawo ang mga timailhan, ug kon *makakita* sila sa *ebidensya* sa Gingharian, siguradong hatagan nila ug pagtagad ang imong gisulti.

*Uban sa mga pagsinggit, ang mga dautang espiritu nanggula gikan sa mga panon, ug daghang mga paralitiko ug mga bakol ang nangaayo. Gani may daku nga kalipay sa maong siyudad.*

— Buhat 8:7-8

Matikdi nga si Felipe naglakaw diha sa gahom nga iyang nadawat samtang didto siya sa Jerusalem. Ang mga timailhan misunod kaniya, ug ang gahum sa Dios nahimong dayag sa tanan. Siya nakadawat nianang *dunamis* (ang Grego nga pulong alang sa *gahom*), ug makahimo na siya karon sa pagpamatuod isip saksi sa Gingharian sa Dios.

*Sa dihang ang mga apostoles sa Jerusalem nakadungog nga ang Samaria midawat sa pulong sa Dios, ilang gipadala si Pedro ug si Juan ngadto kanila. Sa pag-abut nila, nag-ampo sila alang kanila nga makadawat sila sa Espiritu Santo, tungod kay ang Espiritu Santo wala pa mikunsad kang bisan kinsa kanila; bag-o lang sila nabautismohan sa ngalan ni Ginoong Jesus.*

*Unya si Pedro ug si Juan mipandong sa ilang mga kamot diha kanila, ug sila nakadawat sa Espiritu Santo.*

— Buhat 8:14-17

Sa dihang ang mga apostoles sa Jerusalem nakadungog nga ang Samaria midawat sa Pulong sa Dios, ilang gipadala si Pedro ug si Juan ngadto kanila. Pag-abot nila, nag-ampo sila alang kanila nga madawat nila ang Espiritu Santo, tungod kay wala pa mikunsad ang Espiritu Santo kang bisan kinsa kanila. Apan ang Bibliya nag-ingon nga ang mga demonyo mibiya, ang mga tawo nangaayo, ang gamhanang mga buhat sa Dios bag-o lang nahitabo, ug ang mga tawo mituo kang Jesus ug gibautismohan sa tubig. Apan kini usab nag-ingon nga ang Balaang Espiritu wala pa MIKUNSAD sa kang bisan kinsa kanila!

Nakita nimo, si Felipe nagwali sa kaluwasan ug gidawat nila kini, ug naangkon kini, apan wala pa sila makadawat sa Bautismo sa Balaang Espiritu. Natawo sila pag-usab, apan tan-awa ang mga pulong: Ang Balaang Espiritu wala pa “MAKAKUNSAD KANG BISAN KINSA KANILA.” Anaa niana ang kalainan—ang Balaang Espiritu nga *ania* kanato (natawo pag-usab) ug ang Balaang Espiritu *mikunsad* kanato uban ang paghatag og gahum.

Ang Bibliya wala mag-ingon ngano nga si Felipe wala magwali kanila mahitungod sa Bautismo sa Espiritu Santo. Posible nga mibiya dayon siya sa Jerusalem pagkahuman nabautismohan sa Balaang Espiritu sa iyang kaugalingon, ug niadtong panahona wala siya mahibalo nga para kini sa tanan. Bisan unsa pa ang hinungdan, dayag nga ang mga tawo mituo sa Ebanghelyo ug nabautismohan sa tubig, mao nga sila natawo pag-usab. Apan matikdi kon unsa ka importante alang sa mga apostoles nga ang mga tawo sa Samaria makadawat sa Bautismo sa Espiritu Santo sama sa ilang nadawat—diha-diha dayon.

Ang una nilang gihunahuna dili mahitungod sa pagsinina. Wala

sila moingon, “Atong sultihan sila unsaon sa pagsinina og matarung o kanus-a magsimba.” Wala sila mabalaka sa mga lagda sa doktrina. Unsa ang unang butang nga ilang gikabalak-an? Ang Bautismo sa Espiritu Santo! Busa naningkamot sila nga moadto dayon didto ug isulti sa mga tawo ang tanan bahin sa Bautismo sa Espiritu Santo.

Unya si Pedro ug si Juan mipandong sa ilang mga kamot diha kanila, ug sila nakadawat sa Espiritu Santo. Diha-diha dayon, nakadawat sila sa Espiritu Santo. Unsa ang ebidensiya? Nagtuo ko nga sama ra kini sa uban: pag-ampo sa lain-laing mga pinulongan.

*Sa pagkakita ni Simon nga ang Espiritu gihatag pinaagi sa pagpandong sa mga kamot sa mga apostoles, siya mitanyag kanila og salapi ug miingon, “Hatagi usab ako niini nga abilidad aron ang matag usa nga pandongan sa akong mga kamot makadawat sa Espiritu Santo.”*

*Si Pedro mitubag: “Hinaot nga ang imong salapi mahanaw uban kanimo, tungod kay ikaw naghunahuna nga imong mapalit ang gasa sa Dios pinaagi sa salapi! Wala kay bahin niini nga ministeryo, tungod kay ang imong kasingkasing dili matarong atubangan sa Dios. Paghinulsol sa imong pagkadaotan ug pag-ampo sa Ginoo.*

*Tingali pasayloon ka niya tungod sa pagbaton sa ingon nga hunahuna sa imong kasingkasing. Kay nakita ko nga puno ka sa kapaitan ug ulipon ka sa sala.”*

*Unya mitubag si Simon, “Pag-ampo kamo sa Ginoo alang kanako aron walay mahitabo kanako nga imong gisulti.”*

— Buhat 8:18-24

Sa dihang nakita ni Simon nga ang Espiritu gihatag pinaagi sa pagpandong sa mga kamot, iyang gitanyagan ang mga apostoles ug kuwarta aron ihatag kaniya ang maong matang sa gahom. Tingali adunay nakita si Simon, pipila ka ebidensya nga adunay nahitabo sa dihang nadawat nila ang Balaang Espiritu. Gusto niya kana nga gahum. Karon, wala kini nag-ingon nga nagsulti sila sa lain-laing mga pinulongan didto, apan adunay nahitabo nga dayag nga ilang makita. Nakita ni Simon ang usa ka butang nga gamhanan, ug gusto niya nga adunay abilidad sa paghatag niana sa mga tawo. Nagtuo ko nga ang iyang mga komento nagpakita nga nadawat nila kana nga bunyag sama sa gibuhay sa uban ug nagsugod sa pagsulti sa lain-laing mga pinulongan. Sa makausa pa, gusto nakong ipunting kon unsa ka importante ang pagtan-aw sa iglesia sa Jerusalem sa Bautismo sa Espiritu Santo nga—kini mahinungdanon!

Sa dihang ang pagkakabig ni Pablo nahitabo sa dalan paingon sa Damasco, usa ka tawo nga ginganla’g Ananias gipadala ngadto kang Pablo aron mag-ampo alang kaniya.

*Si Ananias miingon, “Igsoong Saulo, ang Ginoo—si Jesus, nga nagpakita kanimo sa dalan sa imong pag-anhi dinhi—nagpadala kanako aron makakita ka pag-usab ug mapuno sa Espiritu Santo.”*

— Buhat 9:17b

Ang Bibliya wala mag-ingon nga si Pablo nagsulti sa mga pinulongan sa dihang siya nakadawat sa Bautismo sa Balaang Espiritu, apan kita nasayud nga siya misulti sa mga pinulongan, ug ako nagtuo nga siya nakadawat niini sama sa uban. Mahimong mangutana ka nganong motuo ko niana. Sayon ra kana. Tungod sa gisulat mismo ni Pablo sa 1 Corinto 14:18.

*“Ako nagpasalamat sa Dios nga ako nagsulti sa lain-laing mga pinulongan labaw pa kay kaninyong tanan” (1 Corinto 14:18).*

Busa, makaingon gayud kita nga si Pablo nagsulti sa bag-ong pinulongan sa dihang siya gibautismohan sa Balaang Espiritu. Imong mabasa sa mga kapitulo sa Mga Buhat, imong madiskobrehan nga kini nga bautismo nagpadayon adlaw-adlaw sa tibuok iglesia. Wala lang kini nahitabo sa Adlaw sa Pentecostes.

Sa wala madugay, sa Buhat 10, si Pedro gipadala ngadto sa panimalay sa mga Gentil ug gidala aron magsangyaw sa Ebanghelyo ngadto kanila. Hinumdomi, talagsahon kaayo kini para kay Pedro, nga usa ka Hudyo, nga mag-adto sa puluy-an sa usa ka Gentil. Miadto lang siya tungod kay gigiyahan siya didto pinaagi sa usa ka panan-awon gikan sa Balaang Espiritu.

*Samtang nagsulti pa si Pedro niining mga pulonga, mikunsad ang Espiritu Santo sa tanan nga nakadungog sa mensabe. Ang mga tinuli nga magtutuo nga miuban kang Pedro natingala nga ang gasa sa Espiritu Santo gibubo bisan pa sa mga Gentil. Kay nadungog nila nga nanagsulti sila og lain-laing mga pinulongan ug nagadayeg sa Dios.*

*Unya miingon si Pedro, “Aduna bay makapugong niining mga tawhana nga dili mabautismohan sa tubig? Nakadawat sila sa Balaang Espiritu sama kanato.” Busa, nagsugo siya nga bautismohan sila sa ngalan ni Jesu Cristo. Unya gihangyo nila si Pedro nga magpabilin uban kanila sa pipila ka adlaw.*

— Buhat 10:44-48

Samtang si Pedro nagwali sa Ebanghelyo ni Cristo niining Gentil nga panimalay, ang Balaang Espiritu mikunsad sa tanan nga

nakadungog sa mensahe. Dili nimo makita ang Espiritu sa Dios, busa giunsa nila pagkahibalo nga ang Balaang Espiritu mikunsad kanila? Ang teksto nag-ingon nga ang tinuli nga mga magtutuo nga miuban kang Pedro natingala nga ang gasa sa Espiritu Santo gibubo bisan pa sa mga Gentil, kay nadungog nila nga namulong sila sa lain-laing mga pinulongan ug nagadayeg sa Dios.

Busa, unsa ang ebidensya nga ang Balaang Espiritu anaa didto? Kinahanglan ilhon ni Pedro kon unsa ang dayag kaniya, nga gidawat sa Dios kining mga tawhana. Ang kamatuoran nga iyang nakita sila nga namulong sa lain-laing mga pinulongan sa dihang wala pa siya makaministeryo kanila mahitungod sa Bautismo sa Espiritu Santo mao ang tanan nga ebidensya nga iyang gikinahanglan. Si Pedro *nahibalo* nga sila nakadawat tungod kay sila nakadawat sa Balaang Espiritu sama kaniya—ug sila nag-ampo sa mga pinulongan.

Makita nimo ang usa ka dako nga kalainan tali sa kon unsa ang gihunahuna sa modernong iglesia nga mahinungdanon ug kon unsa ang gihunahuna sa iglesia nga mahinungdanon sa panahon sa Bibliya. Usa sa akong paborito nga mga Kasulatan nga klaro kaayo nga nagpunting nga ang matag usa kinahanglan mabautismohan sa Balaang Espiritu, ug nagpamatuod nga walay pagduhaduha nga kini usa ka buhat sa Balaang Espiritu nga lahi sa pagkahimugso pag-usab, makita sa Mga Buhat 19:1-2.

*Samtang si Apolos didto sa Corinto, si Pablo miagi sa kinasuloran ug miabot sa Efeso. Didto iyang nakit-an ang pipila ka mga tinun-an ug nangutana kanila, “Nakadawat ba kamo sa Espiritu Santo sa dihang mituo kamo?” Mitubag sila, “Wala, wala gani kami makadungog nga adunay Espiritu Santo.”*

— Buhat 19:1-2

Sa pagsulod ni Pablo sa lungsod sa Efeso, iyang nakit-an ang pipila ka mga tinun-an ug siya nangutana kanila, “Nakadawat ba kamo sa Espiritu Santo sa diha nga mituo kamo?” Mao kini ang unang gikabalakan ni Pablo sa dihang iyang nahimamat kining mga magtutuo.

Si Pablo nakaamgo nga ang pagkahimugso pag-usab lahi kaayo sa pagpabautismo sa Balaang Espiritu uban ang ebidensya sa pagsulti sa lain-laing mga pinulongan.

Ngano nga mao kini ang una nga gisulti ni Pablo kanila? Tungod kay mao ra kini ang giingon ni Jesus sa Buhat 1:4! Siya nag-ingon, “Ayaw pagbiya sa lungsod nga wala kini!” Unsa ang gibuhat sa mga apostoles sa Jerusalem sa dihang ilang nahibaloan nga ang mga tawo sa Samaria nakadungog sa Pulong? Miingon sila, “Mga anak, bangon na

**KARON, AKO NAGTUO  
NGA KINI USA KA  
KONTROBERSYAL  
NGA HILISGUTAN  
SA DAGHANG MGA  
IGLESIA DILI TUNGOD  
KAY KINI WALA  
SA BIBLIYA, APAN  
TUNGOD KAY ANG  
YAWA NAGDUMOT  
NIINI PAG-AYO.**

kamo diha. Kinahanglan natong sigurohon nga kini husto. Bangon didto ug siguroha nga sila nabautismohan na sa Balaang Espiritu.” Sa dihang si Pablo, nga miagi sa Efeso, nakakita ug pipila ka mga tinun-an, ang unang butang nga iyang gipangutana kanila mao kini, “Nakadawat ba kamo sa Espiritu Santo sukad nga kamo mitoo?”

Sa dihang mitubag sila, “Wala, wala gani kami makadungog nga adunay Balaang Espiritu,” nangutana si Pablo kanila kon unsang bautismo ang ilang nadawat. Sila mitubag, “Ang bautismo ni Juan.” Si Pablo miingon nga ang bautismo ni Juan usa ka bautismo sa paghinulsol ug misulti sa mga tawo sa pagtuo Kaniya nga moabut sunod kaniya. Sa ato pa, tuohi si Jesus.

Sa pagkadungog nila niini, gibautismohan sila sa ngalan ni Ginoong Jesus (gibautismohan sa tubig). Pagkahuman, samtang gipandong ni Pablo ang iyang mga kamot kanila, nakunsaran sila sa Espiritu Santo, ug

nagsulti'g lain-laing mga pinulongan. Matikdi, sa dihang nangutana si Pablo, siya nagtuo nga sila mga magtutuo ni Jesus. Mao nga nangutana siya, “Nakadawat ba kamo sa Espiritu Santo sukad nga mituo kamo?” Iyang nasabtan nga ang Bautismo sa Balaang Espiritu lahi kaayo sa pagkatawo pag-usab.

Karon, ako nagtuo nga kini usa ka kontrobersyal nga hilisgutan sa daghang mga Iglesia dili tungod kay kini wala sa Bibliya, apan tungod kay ang yawa nagdumot niini pag-ayo.

Kay kon kini mao ang gahum, kon kini mao ang pultahan sa abilidad sa pag-usab sa mga kinabuhi ug sa pagsaksi ngadto sa kalibutan, nan inyong atubangon ang dios niini nga kalibutan, ug kita nahibalo kon unsa ang iyang hunahuna mahitungod niana. Ang Bautismo sa Espiritu Santo naghatag kanato ug pundohanan sa gahum, ang gahum sa Dios, aron magbuhat sa mga buhat ni Jesus ug sa paghimaya sa Dios!



## KAPITULO 6

# TANANG MAGTOTOO BA NAGA-AMPO SA LAHI NGA PINULONGAN?

Tingali nakadungog ka nga adunay nag-ingon nga wala sila nagasulti sa lainlaing pinulongan ug dili sila motuo nga ang tanan makasulti o angay nga makasulti niini. Unya ilang kutloon ang 1 Corinto 12:27-30 isip basehan sa ilang pagtuo. Ilang ipasabot nga si Pablo mismo miingon nga dili tanan makasulti og lainlaing pinulongan. Apan atong susihon ang maong teksto ug tan-awon kon tinuod ba gayud nga kini ang gipasabot ni Pablo.

*Busa kamong tanan ang lawas ni Cristo ug ang usa'g-usa kabahin niini. Diha sa iglesia gipahimutang sa Dios ang tanan sa husto nga dapit: una ang mga apostoles, ikaduha mga propeta, ikatulo mga magtutudlo ug kadtong naghimo'g mga milagro, kadtong gihataga'g gahom sa pag-ayo, kadtong gihataga'g hiyas sa pagtabang sa uban, kadtong gihataga'g hiyas sa pagdumala ug kadtong may katakos sa pagsulti'g lahi nga pinulongan. Silang tanan ba mga apostoles? Silang tanan ba mga propeta? Silang tanan ba mga magtutudlo? Silang tanan ba may gahom sa paghimog mga milagro? Silang tanan ba o nagaayo sa mga balatian? Silang tanan ba namulong*

*sa lahi nga pinulongan? Silang tanan ba nagahubad sa kahulogan sa maong mga pinulongan?*

—1 Corinto 12:27-30

Niining sulata, si Pablo nagatudlo sa iglesia sa Corinto kon giunsa pagpadagan sa hapsay nga paagi aron ang tanan mamistryohan sa ilang mga panagtigom. Niadtong panahona, ang mga miyembro sa iglesia nakigkompitensya pinaagi sa ilang mga espirituhanong gasa ug ilang paboritong magwawali. Busa, gitudloan sila ni Pablo kon unsaon magkinabuhi isip usa ka lawas nga nagalihok sa panaghiusa ug gugma. Karun, atong susihon pag-ayo ang 1 Corinto 12:27-28:

*Busa kamong tanan lawas ni Cristo ug ang usa’g-usa kabahin niini. Diha sa iglesia gipahimutang sa Dios ang tanan sa husto nga dapit: una ang mga apostoles, ikaduha mga propeta, ikatulo mga magtutudlo ug kadtong naghimo’g mga milagro, kadtong gihataga’g gahom sa pag-ayo, kadtong gihataga’g hiyas sa pagtabang sa uban, kadtong gihataga’g hiyas sa pagdumala ug kadtong may katakos sa pagsulti’g lahi nga pinulongan.*

Nagpadayon si Pablo sa maong bersikulo, apan mohunong usa ko kay gusto nakong hisgutan kadali ang pulong, “sa iglesia.” Siya naghisgot mahitungod sa tinuod nga panagtigom sa iglesia. Mahimo natong mapamatud-an kini sa 1 Corinto 14:18-19, diin gigamit ni Pablo ang maong mga pulong usab:

*Nagpasalamat ako sa Dios nga makasulti ako’g lahi nga mga pinulongan labaw kang bisan kinsa kaninyo. Apan sa pagsimba DIHA SA IGLESIA, palabihon ko ang pagsulti’g lima ka mga pulong nga masabtan aron pagtudlo sa uban kay sa pagsulti’g libo ka lahi nga pinulongan nga dili masabtan.*

—1 Corinto 14:18-19

Miingon si Pablo, “Nagpasalamat ako sa Dios nga makasulti ako’g lahi nga mga pinulongan labaw kang bisan kinsa kaninyo apan diha sa Iglesia....” Anaa na usab ang maong pulong, ug karon klaro nga si Pablo naghisgot sa tinuod nga panagtigom sa iglesia, dili lang sa kinatibuk-ang lawas ni Cristo. Kitang tanan motuo nga si Pablo kabahin sa lawas ni Cristo, ang “iglesia.” Siyempre, apil siya. Ug miingon siya nga nalipay siya nga nakasulti siya sa lahi nga mga pinulongan labaw pa sa tanang magtotoo sa Corinto. Giingon niya kini tungod kay ang iglesia didto nagpasigarbo sa ilang bag-ong abilidad sa pagsulti sa lahi nga mga pinulongan, apan dili sila hapsay ug nagdala lang ug kasamok.

Ang buot niyang ipasabot, “Mga higala, nagasulti ako sa lahi nga mga pinulongan labaw kaninyong tanan, apan adunay husto nga paagi sa pagbuhat niini ‘sa iglesia’ nga hapsay ug dili magdala’g kasamok.” Nagpadayon siya sa pagpahayag nga sa iglesia (ang panagtigom sa mga magtotoo), mas gusto niya nga mosulti sa masabtang pinulongan (ilang Kumon nga sinultian) aron ang uban malig-on.

Sa sulod sa simbahan, adunay pipila nga mogamit sa gasa sa mga pinulongan ug paghubad, sumala sa 1 Corinto 12. Apan, dili tanang tawo angay mogamit niini tungod kay ang tumong mao ang pagpali-on sa tibuok lawas sa Kristohanong pagtuo. Bisan si Pablo nag-ingon nga limitado ra ang gidaghanon sa mosulti sa mga pinulongan ug paghubad—labing daghan tulo ka tawo sa usa ka serbisyo.

*Kon dunay mosulti ug lahi nga pinulongan—duha o tulo lang—ang mamulong, tag-isa lang sa matag higayon, ug adunay usa nga mohubad niini.* (1 Corinto 14:27).

Busa, sa dihang giingon ni Pablo nga dili tanan mosulti sa laing mga pinulongan, naghisgot siya mahitungod sa “sulod sa iglesia” o sa panagtigom sa mga magtutuo.

Kinahanglan nimong masabtan nga ang tanang magtutuo adunay

abilidad sa pag-ampo sa mga pinulongan, apan dili tanan adunay pagdihog nga mogamit sa gasa sa mga pinulongan ug paghubad sa pagsimba. Kon aduna kay pagdihog nga gamiton kana nga gasa sulod sa panagtigom, ang Bibliya nag-ingon nga kinahanglan mag-ampo ka aron makahubad usab.

*“Busa ang nagsulti’g lahi nga pinulongan kinahanglan nga mag-ampo nga makabaton sa hiyas sa paghubad niini”* (1 Corinto 14:13b).

Nagtuo ko nga ang tawo nga mosultig lahi nga mga pinulongan mao gayud ang labing maayong kandidato sa paghubad sa mensahe sulod sa panagtigom, kay kini nga mensahe nagadagayday na pinaagi kanila.

Ngano nga kinahanglan ka mag-ampo sa mga pinulongan? Kay ang yawa nagadumot sa mga magtutuo nga nasayod sa pag-ampo sa Espiritu (sa mga pinulongan), ug gusto ko masiguro nga nakasabot ka sa hinungdan niini.

Sa dihang giingon ni Pablo nga nalipay siya kay naga-ampo siya sa laing mga pinulongan labaw pa kaysa uban, aduna siyay hinungdan nga gibati niya kini. Naghatag siya og komentaryo sa 1 Corinto 14 nga angay natong basahon ug sabton.

*Ang nagsultig lahi nga pinulongan naglig-on sa iyang kaugalingon lang apan ang nagpanagna naglig-on sa tibuok simbahan.* (1 Corinto 14:4).

Atong susihon pa og mas lawom. Unsa may buot ipasabot sa paglig-on? Ang pulong nga paglig-on nagpasabot sa “paggiya o pagbenipisyo, ilabi na sa moral ug espirituhanong aspeto; kini nagapadasig.”<sup>2</sup>

Dili ba mouyon ka nga daghang higayon nga nagkinahanglan ka og giya aron ka mahibalo kon unsay angay buhaton, masabtan ang usa

ka sitwasyon, o makahimo sa hustong desisyon? Mao kini ang usa sa mga katuyuan sa pag-ampo sa laing pinulongan: aron mapalig-on ka ug matagaan ka og giya sa imong kinabuhi. Gipahayag ni Pablo kining maong punto sa Roma 8:26-27:

*Sa samang paagi, sa atong pagkahuyang tabangan kita sa Espiritu kay wala kita mahibalo unsaon pag-ampo. Ang Espiritu mismo mao ang mangaliyupo sa Dios alang kanato uban sa mga pag-agulo nga dili ikasaysay sa pulong. Ug ang Dios nga nasayod sa kasingkasing sa mga tawo, nasayod unsay gihunahuna sa Espiritu; kay ang Espiritu mangaliyupo sa Dios alang sa Iyang katawhan sumala sa Iyang kabubut-on.*

Giingon ni Pablo nga aduna kitay problema ug kahuyang: “Wala kita masayod kon unsay angay i-ampo.” Tingali mangutana ka, “Ngano nga kini usa ka kahuyang?” Masabtan nato kini pinaagi sa pagbasa sa 1 Juan 5:14-15:

*Ug makasalig kita sa Dios nga bisa’g unsay atong pangayoon Kaniya sumala sa Iyang kabubut-on, dunggon gayod kita Niya. Ug kay nasayod man kita nga mamati Siya kanato, masiguro usab nato nga Iya nang gihatag kanato ang atong gipangayo Kaniya.*

Kon wala kita masayod o walay kasiguruhan sa kabubut-on sa Dios, dili kita makalihok diha sa pagtuo (nga nagpasabot sa atong panaghiusa uban sa Dios). Ug kon dili kita makalihok diha sa pagtuo, anaa kita sa usa ka kahuyang, kay dili kita makasandig sa grasya o gahum sa Dios kon walay pagtuo. Busa, giingon ni Pablo nga ang dili pagkahibalo sa pag-ampo usa ka kahuyang, apan ang pag-ampo sa laing pinulongan makatabang niini. Atong basahon pag-usab ang maong teksto.

*Sa samang paagi, sa atong kahuyang tabangan kita sa Espiritu kay wala kita mahibalo unsaon pag-ampo.*

—Roma 8:26a

Ang atong kahuyang mao nga wala kita masayod kon unsay i-ampo! Ang Bibliya wala maghisgot kon kinsa atong minyoon, asa kita

**“SA SAMANG PAAGI,  
SA ATONG KAHUYANG  
TABANGAN KITA SA  
ESPIRITU KAY WALA  
KITA MAHIBALO  
UNSAON PAG-AMPO.”**

**—ROMA 8:26A**

mopuyo, o unsay trabaho nga angay pilion. Kon wala kita masayod sa kabubut-on sa Dios, dili kita makabalo ug makatuo nga nakadawat kita kaniya sa atong pag-ampo. Kini usa ka dakong kahuyang! Dili kita makasalig sa Dios kon wala kita nahibalo sa Iyang kabubut-on. Apan adunay paagi aron atong masabtan ang kabubut-on sa Dios sa matag sitwasyon sa kinabuhi. Adunay paagi nga makasiguro kita sa Iyang kabubut-on aron makalihok kita diha sa pagtuo ug pagsalig.

Mao kini ang ginaingon ni Pablo. Ang pagpalig-on nga iyang gipasabot nagkahulugan sa pagbaton og koneksyon o *access* niining matang sa kahibalo—ang kahibalo nga gikan sa Espiritu sa Dios. Ug atong maangkon kini pinaagi sa pag-ampo diha sa Espiritu, o sa laing mga pinulongan. Kon sundon pa nato ang giya ni Pablo sa Roma 8:26b-27, mabasa nato kini:

*Ang Espiritu mismo mao ang mangaliyupo sa Dios alang kanato uban sa mga pag-agulo nga dili ikasaysay sa pulong. Ug ang Dios nga nasayod sa kasingkasing sa mga tawo, nasayod kon unsay gihunahuna sa Espiritu; kay ang Espiritu mangaliyupo sa Dios alang sa Iyang katawhan sumala sa Iyang kabubut-on.*

Karong panahona, wala nagpasabot si Pablo nga kita mag-agulo kon mag-ampo sa Espiritu. Hinuon, nagtumong siya sa mga miaging bersikulo.

*Nasayod kita nga hangtod karon ang tibuok kabuhatan nag-agulo tungod sa mga kasakit sama sa babaye nga nagbati. Apan dili kay ang kabuhatan lang ang nag-agulo kondili lakip kita nga nagbaton na sa Espiritu ingon nga unang gasa sa Dios. Nag-agulo kita samtang nagpaabot kita kon kanus-a sagopon diha sa pagka-anak sa Dios ug kanus-a luwason sa hingpit. Kay giluwat kita tungod niining maong paglaom. Apan kon makita nato ang atong gilaoman, dili kana nato matawag nga paglaom. Kay laoman pa ba diay ang nakita na? Apan kon molaom kita sa wala nato makita, magpaabot kita nga mapailubon.*

*Sa samang paagi, sa atong pagkahuyang tabangan kita sa Espiritu kay dili kita mahibalo unsaon pag-ampo. Ang Espiritu mismo mao ang mangaliyupo sa Dios alang kanato uban sa mga pag-agulo nga dili ikasaysay sa pulong. Ug ang Dios nga nasayod sa kasingkasing sa mga tawo, nasayod unsay gihunahuna sa Espiritu; kay ang Espiritu mangaliyupo sa Dios alang sa iyang katawhan sumala sa iyang kabubut-on.*

—Roma 8:22-27

Gigamit ni Pablo ang pulong nga pag-agulo isip usa ka pananglitan o ilustrasyon sa kon unsay nagapanghitabo sulod kanato. Naga-agulo kita sa sulod, sama sa usa ka babaye nga nagapanganak. Sa ato pa, nagadala kita og usa ka butang nga gikan sa Espiritu sa Dios sulod kanato—nagbaton kita og usa ka bag-ong kajibalo, usa ka butang nga wala pa kaniadto, ug dili gikan sa atong kaugalingon. Sa pag-ampo sa

Espiritu, “matawo” ang kahibalo nga wala pa nato masabti—usa ka bag-ong kahibalo nga nagagikan sa atong espiritu. Ang Bibliya nagatudlo kanato nga ang Espiritu sa Dios nag-ampo sa hingpit nga kabubut-on sa Dios alang sa matag sitwasyon pinaagi sa atong espiritu. Nag-ingon kini nga ang Dios mismo nagapangamuyo alang kanato, pinaagi sa atong espiritu, uban sa mga pag-agulo nga dili mahimong malitok sa yanong sinultian.

Busa, atong nadiskubre dinhi nga ang Balaang Espiritu nagapangamuyo alang kanato pinaagi sa mga pag-agulo (pagpanganak) gamit ang dili masabtan nga mga pulong—mga pulong nga wala nato masabti (mga pinulongan). Ug siya nga nagasusi sa atong kasingkasing nakabalo sa hunahuna sa Espiritu, tungod kay ang Espiritu (Espiritu sa Dios) nagapangamuyo alang sa mga balaan sumala sa hingpit nga kabubut-on sa Dios. Ang Espiritu sa Dios nagapangamuyo sa hingpit nga kabubut-on sa Dios alang sa matag sitwasyon pinaagi sa imong Espiritu **sa dihang mag-ampo ka sa laing mga pinulongan.**

Busa, anaa kita sa kahuyang kon wala kita masayod sa kabubut-on sa Dios. Dili nato mapagawas ang atong pagtuo hangtod nga atong masayran ang iyang kabubut-on. Giingon ni Pablo nga kon mag-ampo kita sa Espiritu, ang Espiritu sa Dios mismo magapangamuyo pinaagi kanato sa iyang hingpit nga kabubut-on alang sa atong kinabuhi sa bisan unsang sitwasyon.

Samtang ang Espiritu sa Dios nagapangamuyo pinaagi kanato sa laing mga pinulongan, giunsa man nato pagkalig-on kon dili kita makasabot sa atong giingon? Ang tubag makita sa laing sulat nga gisulat ni Pablo.

*Wala pa makita sa mata ug wala pa madungog sa igdulungog, ug ang wala pa gayod miabot sa panghunahuna sa tawo, ang giandam sa Dios niadtong nahigugma kaniya—apan gipadayag kanato sa Dios ang iyang tinago pinaagi sa iyang Espiritu.*

*Ang Espiritu nagsusi sa tanang mga butang, bisan pa niadtong labing natago nga mga katuyoan sa Dios. Walay laing nasayod mahitungod sa hunahuna sa usa ka tawo gawas sa iyang kaugalingong espiritu, ingon nga ang Espiritu sa Dios lang ang nasayod mahitungod sa hunahuna Dios. Wala nato dawata ang espiritu niining kalibotana kondili ang Espiritu nga gipadala sa Dios aron atong mahibaw-an ang tanan nga gihatag sa Dios kanato. Busa sa atong pagsaysay sa espirituhanon nga mga kamatuoran alang niadtong nakabaton sa Espiritu sa Dios wala kita magtudlo ginamit ang mga pulong sa kaalam sa tawo kondili sa mga pulong nga gitudlo sa Espiritu sa Dios.*

—1 Corinto 2:9b-13

Una sa tanan, giingon ni Pablo nga kita adunay *access* sa mga butang nga wala pa nato nadungog, nakita, o nahunahuna, sama sa akong gipaambit kanimo. Apan nagapadayon siya sa pagpahayag kon giunsa kini paglihok:

*Walay laing nasayod mahitungod sa hunahuna sa usa ka tawo gawas sa iyang kaugalingong espiritu, ingon nga ang Espiritu sa Dios lang ang nasayod mahitungod sa hunahuna Dios.*

—1 Corinto 2:11

Sa dili pa nato hisgutan kini nga aspeto sa Kasulatan, kinahanglan una natong masabtan ang pangunang kahibalo mahitungod sa atong pagkatawo. Sumala sa 1 Tesalonica 5:23, tulo ka bahin ang atong pagkatawo: espiritu, kalag, ug lawas.

*Hinaot unta nga ang Dios nga naghatag kanato'g kalinaw hingpit nga maghimo kaninyong balaan aron walay makitang salawayon sa tibuok ninyong pagkatawo—sa espiritu, kalag ug*

*lawas hangtod sa pag-abot sa atong Ginoong Jesu Cristo.*

—1 Tesalonica 5:23

Ang atong espiritu mao ang bahin kanato nga konektado sa Dios. Ang atong kalag naglangkob sa atong hunahuna, kabubut-on, ug pagbati, samtang ang atong lawas mao ang atong pisikal nga lawas. Giingon ni Pablo nga ang atong kalag (hunahuna, kabubut-on, ug pagbati) ug espiritu duol kaayo ang koneksyon, nga ang atong espiritu nakabalo sa atong mga hunahuna.

Ang kabaliktaran usab niini tinuod. Ang atong hunahuna makadawat og mga hunahuna gikan sa atong espiritu. Giingon ni Pablo nga ang Espiritu sa Dios nakabalo sa mga hunahuna sa Dios, ug nakadawat kita sa Espiritu sa Dios aron **masayran nato** ang mga butang nga gihatag sa Dios kanato nga walay bayad.

*Wala nato dawata ang espiritu niining kalibotana kondili ang Espiritu nga gipadala sa Dios aron atong mahibaw-an ang tanan nga gihatag sa Dios kanato. Busa sa atong pagsaysay sa espirituhanon nga mga kamatuoran alang niadtong nakabaton sa Espiritu sa Dios wala kita magtudlo ginamit ang mga pulong sa kaalam sa tawo kondili sa mga pulong nga gitudlo sa Espiritu sa Dios.*

—1 Corinto 2:12-13

Nagpadayon si Pablo sa pagpahayag nga kini nga wala pa nato nahibaloang kahibalo—ang kahibalo nga gipadayag kanato sa Espiritu sa Dios—mao kini ang atong gisulti nga mga pulong nga gitudlo kanato sa Espiritu, dili kini mga pulong nga atong ginasulti sa atong natural nga panghunahuna o linggwahi, apan mga espirituhanong pulong. Nasayran nato nga ang gihisgotan ni Pablo mao ang pag-ampo sa pagsulti'g lahi nga mga pinulongan, kay gigamit niya kini sa samang

kahulogan sa pagpasabot sa pagpamulong sa lahi nga pinulongan 1 Corinto 14:14-15:

*Kay kon mag-ampo ako sa pinulongan nga dili masabtan, nag-ampo ang akong espiritu apan ang akong hunahuna wala makasabot. Busa unsa man ang akong buhaton? Mag-ampo ako uban sa akong espiritu ug sa akong salabotan. Mag-awit ako uban sa akong espiritu ug sa akong salabotan.*

Gigamit ni Pablo ang pulong nga “pag-ampo sa Espiritu” nga nagpasabot sa pagsulti sa laing mga pinulongan. Tungod niini, mahimo natong masabtan nga sa dihang giingon ni Pablo nga kita nagsulti gamit ang mga pulong nga gitudlo sa Espiritu, nagtumong gihapon siya sa pagsulti sa lahi nga pinulongan.

*Kay ang magsulti ug lahi nga pinulongan wala mamulong ngadto sa tawo kon dili ngadto sa Dios tungod kay walay makasabot kaniya. Nagsulti siya sa tinagong mga butang pinaagi sa iyang espiritu.*

—1 Corinto 14:2

Giingon na usab ni Pablo nga ang atong espiritu may abilidad sa pagsulti sa mga butang nga wala pa nato nakita, nadungog, o nahibaw-an—o sumala sa gisulti ni Pablo “mga tinago.” Mapansin usab nato nga giingon ni Pablo nga kita nagapangamuyo sa mga tinago gamit ang atong kaugalingong espiritu, dili direkta sa Espiritu sa Dios. Unsaon man nga ang usa ka butang nga wala nato nahibaw-an makasulod sa atong espiritu? Sayon ra! Pinaagi sa Espiritu sa Dios, nga nakighiusa na sa atong espiritu.

*Walay laing nasayod mahitungod sa hunahuna sa usa ka tawo gawas sa iyang kaugalingong espiritu, ingon nga ang Espiritu sa Dios lang ang nasayod mahitungod sa hunahuna Dios.*

—1 Corinto 2:11

Kon ang atong espiritu makadawat sa mga hunahuna sa Dios, makadawat usab ang atong hunahuna niini. Sa dihang makasabot ang atong hunahuna sa mga hunahuna sa Dios, gitawag kini nga “kapadayagan,” “nahayagan,” o, sumala ni Pablo, “paglig-on.” Mao kini ang rason ngano nga nalipay si Pablo nga naga-ampo siya sa lahi nga mga pinulongan labaw pa kay sa uban—tungod kay nakadawat siya sa kaayohan sa pagkahibalo sa kabubut-on sa Dios sa tanang sitwasyon.

Mao kini ang gipasabot ni Pablo sa 1 Corinto 2:15-16.

**ANG BAUTISMO SA  
ESPIRITU SANTO  
MAO ANG TINAGO  
NGA HINAGIBAN SA  
DIOS! PINAAGI NIINI,  
MAHATUD NIYA ANG  
IYANG KABUBUT-ON  
SA KALIBOTAN NGA  
WALA MASAYRI SA  
YAWA KON UNSA ANG  
NAGAPANGHITABO.**

*Ang tawong espirituhanon makatugkad sa bili sa tanang butang apan walay makahukom kaniya. Sumala sa gisulti sa kasulatan, “Kinsay nahibalo sa hunahuna sa Ginoo? Kinsay makatambag Kaniya?” Apan nabatonan nato ang salabotan ni Cristo.*

Dili kita limitado sa yano nga tawhanong paghukom, apan makahimo kita og hustong paghukom sa tanang butang uban sa tabang sa Dios. Kini usa ka maayong balita! Pinaagi sa pag-ampo sa Espiritu (sa lain nga mga pinulongan), makadawat kita og mga tinagoan—mga butang nga wala pa nato nahibaw-an. Ug tungod niana nga kahibalo, makahimo kita og matarong nga paghukom o mga desisyon sa tanang butang!

Ang Bautismo sa Espiritu Santo mao ang tinago nga hinagiban sa Dios! Pinaagi niini, mahatud Niya ang Iyang kabubut-on sa kalibotan nga wala masayri sa yawa kon unsa ang nagapanghitabo. Sa tinuod lang, ang pag-ampo sa Espiritu (sa lahi nga mga pinulongan) giisip nga bahin sa atong espirituhanong hinagiban, sumala sa Efeso 6:18a:

*Ug pag-ampom kamo diha sa Espiritu sa tanang panahin uban sa tanang klasing pag-ampo ug pangamuyo.*

Ang pag-ampo sa Espiritu nagtugot kanato sa pagpangita og mga estratehiya nga makatabang kanato sa paglikay sa kaaway o sa pagsulong gamit ang talagsaon ug makapatingala nga mga pamaagi.

Ang buot ipasabot niini mao nga makahimo kita og husto nga mga desisyon sa kinabuhi pinaagi sa pagpamati sa hunahuna ni Cristo. Dili ba usa kini ka mahinungdanon nga butang? Ako mismo nakasinati niini!

Isip usa ka pananglitan, nahinumdum ko nga nakasinati ko og dakong desisyon nga akong buhaton alang sa akong negosyo. Usa ka sales rep nga akong kauban—nga nagrepresentar sa usa sa akong mga supplier—mihulga nga dad-on ang akong kompanya sa korte tungod kay wala ko mosunod kaniya sa iyang bag-ong kompanya. Gusto niya nga padayon akong makigdeal kaniya bisan pa nga mibulag na siya sa tigbaligya nga akong gisaligan kanunay. Tinuod, ganahan ko niya isip sales rep, apan mas gibati nako nga ang akong pagkamatitud-anon anaa sa kompanya nga iyang gialagaran, dili lang kaniya personal. Bisin pa niana, ang iyang kompanya mismo miingon kaniya nga ang tanang kliyente niya makabalhin uban kaniya sa bag-ong kompanya. Busa, kon mosunod ko, legal ug husto ra kini. Apan wala ko makabati og kalinaw mahitungod sa pagpugos nga mosunod kaniya. Kining kompanya nga iyang gialagaran kanunay nga maayuhon ug patas alang kanako.

Gihulga niya nga iya kong kasohan tungod kay pipila ka bulan ang milabay, iyang gihisgotan nga mobalhin siya sa bag-ong kompanya ug nangutana siya kanako kon mosunod ba ako. Wala nako kini mahinuklogi pag-ayo, ug nabungat nako nga mosunod ko. Tungod niini, nisalig siya nga magpabilin ang akong negosyo kaniya sa dihang mobalhin siya. Apan sa dihang hapit na siya mobalhin, nakabati ko og dili maayong pagbati mahitungod sa pagpili. Busa, nag-ampo ako sa Espiritu sulod sa pipila ka adlaw. Bisan pa niana, wala gihapon ko makadungog sa tubag nga akong gikinahanglan.

Si Drenda ug ako kanunay nga nagdala sa among mga anak sa usa ka nindot nga amusement park nga gitawag og Cedar Point—ang pinakadakong roller coaster park sa Estados Unidos. Kasagaran, makabisita kami didto kaduha sa usa ka tuig. Biyernes sa gabii, ug kinahanglan na ako’g katubagan sa Lunes sa buntag kon unsa ang akong buhaton. Aron matabangan ang akong hunahuna nga makalimtan kadali sa problema, nakahukom ko nga dalhon si Drenda sa amusement park aron malingaw lang mi. Samtang nagtindog ko sa linya, nga wala gani naghunahuna mahitungod sa akong pagabuhaton, kalit lang nga nahibaw-an ko kon unsa ang angay buhaton. Klaro kaayo, sama sa kahayag sa adlaw. Ang Espiritu Santo misulti kanako, ug mipabilin ako sa parent company. Pipila lang ka bulan ang milabay, nabalda ang bag-ong kompanya sa sales rep.

Ani-a ang usa ka dakong susi sa kalampusan—pag-ampo! Pag-ampo sa kanunay, ug pag-ampo sa Espiritu sa kanunay, aron magmaayuhon ang dagan sa imong kinabuhi, makahimo ka og husto nga mga desisyon, ug makadawat ka sa mga tinagoan nga estratehiya nga imong gikinahanglan aron modaog.

*“Pag-ampo sa walay hunong.”* (1 Tesalonica 5:17.)

## KAPITULO 7

# ANG KAHA SA BAHANDI

Nahinumdom ko sa unang higayon nga akong nakaila si Dan. Nagbarog siya sa likod sa simbahan, sa pinakalikod nga laray, kauban sa akong ig-agaw nga si Jennifer. Akong nahibaw-an nga aduna diay silay relasyon. Apan, nahibal-an nako sa ekspresyon ni Dan nga gibati niya nga dili siya kasakay. Sa tinuod lang, mura'g dili gyud siya komportable. Nahibaw-an nako sa ulahi nga lahi ra diay ang among iglesia sa denominasyon nga iyang natambongan. Pero samtang naminaw siya bahin sa Gingharian, nagsugod siya'g kakomportable ug sa kadugayan, naminyo sila sa akong ig-agaw.

Niadtung panahona, si Dan nag-uma ug mga 566 ka ektarya sa Central Ohio, ug dili maayo ang kahimtang niini. Sa tinuod lang, wala siya nakaginansya ug nabalaka siya pag-ayo. Apan samtang naminaw siya bahin sa Gingharian ug sa paagi nga makatabang ang Balaang Espiritu, miadto siya kang Jennifer usa ka adlaw ug miingon, “Gusto kong doblehon ang atong paghatag.” Nakurat si Jennifer apan nalipay kaayo. Mao to ilang gibuhat.

Nianang tuiga, ang ilang ani gikan sa mao ra nga 566 ka ektarya miginansiya ug og 128% nga mas labaw kay sa miaging tuig. Sa tinuod lang, mas dako gyud kini nga kita, ug nakahimo sila sa pagbayad og cash alang sa bag-ong sakyanan ug nakapalit pa og laing umahan—cash usab! Kini nagpasabot og dugang nga ektarya alang sa pagtanum sa sunod nga tuig. Naghinam-hinam kaayo si Dan! Miingon siya nga

kasagaran, ang iyang papa mogahin og 10 ka tuig aron mabayran ang bag-ong uma, apan siya, bag-o lang niya kini nabayaran. Mao nga akong gipangutana si Dan kon giunsa kini pagkahitabo ug unta ipaambit niya kanako ang iyang istorya.

Mora'g human gidoble ni Dan ug Jennifer ang ilang paghatag, nag-ampo usab sila ug nangayo sa Dios nga ipakita kanila kon unsa ang ilang buhaton. Miingon si Dan nga usa ka adlaw niana, samtang nagtan-aw siya sa kasagaran niyang madawat nga mga sulat—kadaghanan niini mga advertisement nga nagbaligya og gamit pang-uma, aduna siyay nalabay nga gamay nga kard sa basurahan. Apan sa kalit lang, nakabati siya og pagpamulong sa iyang kasingkasing nga kuhaon kini pagbalik. Walay espesyal nga butang sa maong kard—usa lang kini ka paanunsyo bahin sa usa ka kahimanan pang-uma. Apan kini nag-imbatar sa mga mag-uuma sa usa ka miting aron hisgutan ang maong gamit.

Gibati ni Dan ang usa ka kusog nga tinguha sa pag-adto, ug pagkahuman sa miting, napalit niya ang maong himan (tool) nga gipahibalo. Kini usa ka bag-ong produkto sa merkado—usa ka gamit nga makatabang sa pagtanom, ilabi na sa pagbutang og mga liso ug pag-andam sa yuta. Misulay si Dan sa pagpahayag kanako sa siyentipikong mga rason kon ngano kini epektibo sa pagpataas sa ani, apan wala na ko kasabot niini tunga-tunga sa iyang pagsaysay. Apan siya mismo nakasabot, ug mao kana ang pinakaimportante. Gisultihan ko ni Dan nga siya ang ikaduhang mag-uuma nga mipalit sa maong himan sa Ohio niadtong panahona. Ug kinsa may nagdahom? Ang maong gamay nga himan nakahatag og dakong kausaban—nagresulta sa 128% nga pagtaas sa ani! Nagpadayon si Dan sa pagpanguma ug nakapalit pa og dugang nga yuta. Karon, liboan na ka ektarya ang iyang giatiman. Daghan na siya'g mga istorya kon giunsa siya pagtabang sa Balaang Espiritu sa paghimo og desisyon—mga desisyong nakapalambo kaniya sa mas paspas nga paagi kay sa iyang mahunahunaan.

Giunsa man ni Dan pag-usab sa iyang dili maayong umahan aron

makaginansya ug dako? Gisunod niya ang tambag sa Balaang Espiritu, ang iyang Magtatambag. Apan ang makapaguol, daghang Kristohanon ang nakadungog sa istorya apan wala makasabot kon giunsa kini nga nahitabo. Mao nga gibati nako nga kinahanglang isulat kini nga libro. Daghan sa mga Kristiyano malipay ug mopasidungog sa kadako sa Dios, mopaila nga kini mao ang buhat sa Dios, apan wala sila nahibalo unsaon pagsundog o pagsubay sa prinsipyo. Tungod niini, daghan sa atong kaigsoonan ang nahisalaag, nawala ang pagsalig sa Dios, ug nagbasol sa Dios tungod sa ilang mga problema. Kanunay nakong madungog ang pangutana, “Hain na man ang Dios? Ngano wala ko niya gitabangan?”

Nanghinaut ko nga nasabtan na nimo kini karon. Ang Gingharian sa Dios naglihok sumala sa mga balaod, dili lang kay tungod sa pabor. Wala ang Dios magpili kon kinsa lang ang Iyang panalanginan ug dili Siya mopili nga pabor-pabor. Si Dan dili mas pinasahi o mas espesyal kay kanimo sa atubangan sa Dios. Aduna usab kay katungod sa Gingharian sama sa gibuhay ni Dan. Sama sa pagpugas ug pag-ani sa usa ka mag-uuma, ang Gingharian molihok alang kang bisan kinsa nga nakasabut ug naggamit sa mga balaod niini. Ikaw usa ka miyembro sa panimalay sa Dios, usa ka lungsoranon sa Iyang Gingharian, ug adunay access sa tanan nga Iyang gihatag.

**Busa sultihan ko ikaw kon nganong daghan sa katawhan sa Dios ang napakyas sa kinabuhi. Wala sila mahibalo kon sa unsang paagi nagapanlihok ang Gingharian sa Dios, ug wala sila nahibalo kon unsaon pagpaminaw sa Balaang Espiritu.**

*Mao kini ang giingon sa Ginoo, ang imong Manunubos, ang Balaang Dios sa Israel: “Ako mao ang Ginoo nga imong Dios, nga nagtudlo kanimo sa kaayohan, nga nagtultol kanimo sa dalan nga imong laktan.”*

—Isaias 48:17, NKJV

Ang kalampusan ni Dan wala lang mahitabo tungod kay iyang gihunahuna kini. Hinuon, kini usa ka talagsaong estratehiya sa Balaang Espiritu nga nahisabtan tungod kay si Dan mipili sa pagbuhat og mga lakang sa paggamit sa mga balaod sa Gingharian. Siya ug ang iyang asawa matinumang naminaw sa Balaang Espiritu samtang kini naggiya kanila ug naghatag og plano alang sa ilang kalampusan. Gusto ko nga isulat nimo kini.

### **ANG ESPIRITU SANTO ADUNAY PLANO!**

**Wala nay mas gamhanan pa kay sa pagbaton ug plano. Kon walay plano, ang hulagway usa ka damgo, apan kon adunay plano, ang damgo mahimong matuman.**

Ang usa ka pamilya makadamgo nga magpuyo sa usa ka nindot nga balay—adunay daghang mga lawak nga higdaanan, lapad nga puy-anan, usa ka dako ug moderno nga kusina, ug matahum nga mga detalye. Apan sa maong punto, kini usa pa lang ka damgo, usa ka hulagway sa hunahuna. Aron kini mahimong tinuod, kinahanglan kini drowingon ug kalkulahan ngadto sa usa ka blueprint—usa ka tukma nga plano. Sa dihang aduna nay blueprint, ang magtutukod makasugod na sa pagtukod sa balay. Apan, daghang Kristohanon ang nagkinabuhi sa gitawag nako nga “mentalidad sa mailbox.” Sa dihang sila mag-ampo ug mangayo sa Dios og panalangin, sama sa gibuhat ni Dan, nagpaabot lang sila nga kini kalit lang nga moabot sa ilang mailbox—o mas grabe pa, magdahom nga adunay laing tawo nga mohatag niini kanila. Wala sila masayod sa proseso nga gikinahanglan.

Oo, una, kinahanglan nga adunay hulagway sa imong hunahuna. Apan adunay proseso aron kini mahimong tinuod nga imong gikalingawan. Ang tubag mao ang usa ka plano o estratehiya nga gikinahanglan aron kini matuman. Hatagan ko ikaw og pananglitan.

Kon sultihan ko ikaw nga mahimo nakong sulbaron ang imong mga problema sa panalapi sa labing dali nga paagi, ug hangyoon ko ikaw nga andamon ang imong bolpen ug papel samtang ipatin-aw ko ang mga lakang nga gikinahanglan nimong buhaton, dali kang mokuha sa imong papel ug bolpen, ug andam maminaw sa tubag. Unya, mopadayon ko sa pag-ingon para sa kadaghanan sa mga tawo nga nagbasa niini nga libro, kon unsa ang akong isulti kanimo mahimong makatangtang sa imong kapit-os sa panalapi ingon usab mahimo ka nga walay utang sa dili pa matapos ang tuig. Karon, nagkupot na ka sa imong bolpen nga mas hugot, ug naningkamot kang masiguro nga wala kay mapakyas sa pagsubay sa akong isulti.

Sayun ra kaayo ang tubag, akong ipasabot. Himo-a lang nga makabot nimo ang net profit nga 10 ka milyon ka dolyar karong tuiga. Tingali motutok ka nako sa makadiyot, dayon maglibog o magkatawa. Nagtuo ko nga pinaagi sa imong pagngisi nga ang 10 ka milyon ka dolyar dili igo, mao nga ako modugang, “Aw, kon gamay ra na para nimo, nan himoa na lang nga 25 ka milyon ka dolyar.” Niini, dili lang ka makangisi kundi mokatawa na gyud og kusog. Ngano man? Tugoti ko nga ipatin-aw kini kanimo. Para sa kadaghanan, ang 10 milyon dolyar igo na unta aron makagawas sila sa utang, pero adunay pagkatawa tungod kay dili nila makita ang ilang kaugalingon nga makahimo og 10 ka milyon ka dolyar sulod lang sa usa ka tuig. Samtang ang ideya nga makagama og 25 ka milyon ka dolyar, mas kataw-anan pa kay murag imposible na gyud sa ilang panglantaw.

Apan ingnon ta nga ako adunay usa ka kompanya sa pag-eksport, ug mitanyag ako nga bayran ka og \$1,000 alang sa matag bola nga imong ibutang sa kahon ug dayon isira ang tape aron ipadala. Ibutang usab nato nga mahimo nimo ang mga 500 ka mga kahon kada adlaw, ug ako usab naglakip sa usa ka 12 ka bulan nga kontrata sa samang rate. Kini gipasobrahan ra kaayo alang sa mga katuyoan sa paghulagway, apan kini maoy maghimo sa akong punto.

Karon, atong tuohan nga naa na gyud nimo ang kontrata. Kon akong isulti pag-usab ang parehas nga pahayag—nga ang imong solusyon sa pinansyal nga panginahanglan mao ang paghimo og 10 milyon dolyar nga net profit sa sunod nga tuig—unsa may imong tubag? Karon,

**TUGOTI KO NGA ISULTI  
KINI PAG-USAB—SA  
AKONG HUNAHUNA,  
KINAHANGLAN NIMO  
KINI MADUNGOG PAG-  
USAB—ADUNAY PLANO  
ANG DIOS PARA NIMO!**

dili na kataw-anan. Hinuon, mahitabo ang mga singgit sa kalipay ug dakong kahinam. Ngano man? Kay sayon ra diay ang pagkita og 10 ka milyon ka dolyar sulod sa maong kontrata. Sa tinuod lang, mahimo pa gani nga mas sayon ang paghimo og 25 ka milyon ka dolyar, ug bisan ang 100 ka milyon ka dolyar dili na imposible. Unsa may nausab? Usa lang ka butang—naa na

kay plano. Sama sa akong giingon kaniadto, bisan kinsa makahimo og dakong pangisda kon ipakita ni Jesus kanila kon asa ug unsaon ang pagpangisda. Mao kini ang mahitabo kanimo. Sa higayon nga anaa na kay usa ka tin-aw nga plano—usa ka plano nga imong masabtan ug makita nga posible nimo buhaton—masulbad ang imong problema.

*“Kay ako nahibalo sa akong mga laraw alang kaninyo,’ nag-ingon ang Ginoo, ‘mga plano sa pagpauswag kaninyo ug dili sa pagdaot kaninyo, mga plano sa paghatag kaninyo ug paglaom ug kaugmaon’”* (Jeremias 29:11).

Tugoti ko nga isulti kini pag-usab—sa akong hunahuna, kinahanglan nimo kini madungog pag-usab—Adunay plano ang Dios para **NIMO!**

Pipila ka bulan ang milabay, nakapribilehiyo ko nga mahimamat ang usa sa akong mga kauban sa iglesia diin ako nagtudlo. Miabut sila sa pagtapos sa serbisyo nga adunay usa ka pangutana—o mas angay

kong isulti, usa ka reklamo. “Dili kini mosaler! Gipugas nako ang akong liso, nakigsabot sa akong bana bahin sa pagkuha sa akong toro nga elk, ug wala koy nakuha.” Gisaysay niya kanako kon giunsa niya pagpugas alang sa usa ka klase nga elk—usa ka toro—ug kon giunsa niya pagpangita og elk nga naghatag og hingpit nga higayon alang sa usa ka maayong pagpamusil. Busa, nagsugod ako sa pagpangutana, hangtod nga sa kataposan, nangutana ako kaniya kon nakadungog na ba siya og elk sa dihang nangayam siya. Mibalik siya og tubag, “Oo, ang eksaktong matang sa toro nga elk nga akong gipugas ang miabot ug mibarug tupad ngari kanako, sa hingpit nga gilay-on alang sa akong pagpusil.”

Karon, medyo nakurat ko niini, mao nga nangutana ko kon unsa ang sunod nga nahitabo. Siya miingon nga siya adunay hingpit nga kahigayunan, apan iyang gihangyo ang usa ka higala sa pagtan-aw sa iyang rifle, ug, sa pag-ingon nga ang higala nakahimo na sa ingon, siya wala gayud magsusi niini sa iyang kaugalingon ug siya nasipyat sa pag-igo. Karon, para nako klaro na kaayo, pero katingad-an tungod kay dili para niya.

Nagtuo ko nga anaa dinhi ang daghan nga mga magtutuo. Sa pila ka rason, wala nila masabti ang proseso—ang ilang bahin nga kinahanglan buhaton aron maka-ani. Kinahanglan nakong ipasabut kaniya nga ang Dios mibuhat na sa Iyang bahin, apan siya nakalimot sa iyang kaugalingong bahin. Nakita nimo, ang Dios makahatag kanimo sa plano, apan kinahanglan nimo buhaton ang imong bahin aron kini matuman. Ikaw ug ang Dios magkauban sa pagbuhat niini!

*Ang gingharian sa langit sama sa bahandi nga GITAGO sa usa ka uma. Sa diha nga ang usa ka tawo nakakaplag niini, iya kining gitagoan pag-usab, ug unya sa iyang kalipay miadto ug gibaligya ang tanan nga iya ug gipalit kadtong uma.*

— Mateo 13:44

Daghan kaayo ang kamatuoran sa Gingharian niini nga Kasulatan! Una sa tanan, atong ipasabot ang bahandi. Sumala sa diksyonaryo, ang bahandi usa ka bililhon o presyosong kabtangan sa bisan unsang matang. Busa, possible usa ka piraso nga bulawan; o mahimong bisan unsa nga imong gikinahanglan nianang higayona. Mao nga, kini nga Kasulatan nag-ingon nga ang Gingharian sa langit sama sa bahandi, o makaingon ka nga ang tanan nga imong gikinahanglan sa kinabuhi anaa sa maong Gingharian. Busa, diin man ang Gingharian? Niini nga Kasulatan, si Jesus nag-ingon nga kini natago sa usa ka uma. Wow, dili ba ka interesado nga makabalo kon asa kana nga uma? Aw, ang maayong balita mao nga gisultihan kita ni Jesus kon asa kana nga uma ug kon unsaon usab sa pagpangita sa bahandi nga natago niini.

Kon kita moadto sa Sambingay sa Magpupugas sa Marcos 4, atong makita si Jesus nga nagtudlo kon sa unsang paagi ang pagtuo mamugna diha sa kasingkasing sa tawo. Iyang kining gigamitan ug paghulagway sa pagtandi sa espiritu sa tawo ngadto sa yuta ug sa Pulong sa Dios ngadto sa binhi nga gipugas sa yuta. Gamit ang parehas nga analohiya, makahunahuna ko nga ang yuta nga gihisgutan dinhi sa Mateo 13 adunay parehas nga kahulugan —ang espiritu sa tawo. Gusto kong mogahin og usa ka gutlo aron pahinumdoman ka sa atong nakat-unan sa kapitulo 6, nga sa dihang kita matawo pag-usab, ang atong tawhanong espiritu mahimong mahiusa sa Espiritu sa Dios, nga magtugot kanato sa paggamit sa mga hunahuna sa Dios. Busa, ang bahandi nga anaa sa uma dili lang limitado kanato, apan naglakip sa tanan nga anaa sa Dios, tungod kay kita nausa uban Kaniya diha sa Espiritu.

*Walay mata nga nakakita, walay dalunggan nga nakadungog, walay hunahuna nga nakahunahuna kon unsa ang giandam sa Dios alang niadtong nahigugma Kaniya—apan ang Dios nagpadayag niini kanato pinaagi sa Iyang Espiritu. Ang Espiritu nagasusi sa tanang mga butang, bisan pa sa halalum*

*nga mga butang sa Dios. Kay kinsa ba sa mga tawo ang nahibalo sa mga hunahuna sa usa ka tawo gawas sa espiritu sa tawo nga anaa kaniya? Sa samang paagi walay nasayod sa mga hunahuna sa Dios gawas sa Espiritu sa Dios. Wala kita makadawat sa espiritu sa kalibotan kondili sa Espiritu nga gikan sa Dios, aron atong masabtan kon unsa ang gihatag sa Dios kanato nga walay bayad.*

— 1 Corinto 2:9-12

Ug unya ang 1 Corinto 2:16 midugang nga *anaa kanato ang hunahuna ni Cristo!*

Gipamatud-an ni Jesus kon asa kini nga bahandi sa Lucas 17:20-21.

*Ang gingharian sa Dios dili moabut uban sa imong maampingong obserbasyon ... tungod kay ang gingharian sa Dios anaa kaninyo.*

— Lucas 17:20-21

*Wala ba kamo mahibalo nga ang inyong lawas templo sa Espiritu Santo, nga anaa kaninyo, nga inyong nadawat gikan sa Dios? Dili na kamo ang nag-iya sa inyong kaugalingon, kay gipalit na kamo sa usa ka bili. Busa, pasidunggi ang Dios pinaagi sa inyong lawas.”*

— 1 Corinto 6:19-20

Busa, tugotiako ngasumahon kon unsa ang akong gipaningkamutang isulti sa imo.

**ANAA’Y BAHANDI KANIMO!**

Unsa ka dako nga bahandi? Bahandi nga labaw pa sa imong mga damgo! Bahandi nga dili masukod!

*Karon, ngadto Kaniya nga makahimo sa dili masukod nga labaw pa sa tanan nga atong gipangayo o gihunahuna, sumala sa Iyang gahum nga nagalihok sulod kanato.*

— Efeso 3:20

Karon, ania dinhi ang kinahanglan natong bansayon sa atong kaugalingon sa lahi nga paagi. Kini nga bahandi labaw pa sa atong mahunahunaan! Kasagaran, kon kita nanginahanglan og usa ka butang o tabang, naanad kita sa pagtan-aw sa gawas sa atong kaugalingon aron mangita og tubag. Apan karon, ang Balaang Espiritu—ang Dios mismo—nagpuyo sulod kanato ug mao ang atong tinuod nga tabang. Nahisgotan na nato kon sa unsang paagi ang pag-ampo diha sa Espiritu o sa mga pinulongan nga nagdala og paggiya ug nagpadayag sa mga misteryo. Apan daghan kaayong tawo ang naglisod sa pagsabot kon unsa ka bililhon kini nga matang sa tabang, ug nga gusto gayod sa Dios nga Siya mismo ang mahimong ilang tubag sa matag bahin sa ilang kinabuhi.

Apan sa dihang natawo ka pag-usab, nahimo kang sakop sa kaugalingong panimalay sa Dios ug lungsoranon sa Iyang dakong Gingharian. Gihatag na Niya kanimo ang tanan nga anaa Kaniya! Sa pagkatinuod, ang Lucas 12:32 nag-ingon nga walay rason nga mahadlok o malisang kay ang inyong Amahan nahimuot sa paghatag kaninyo sa Gingharian. Unsa nga gingharian? Iyang Gingharian!

*“Ayaw kahadlok, gamayng panon, kay ang inyong Amahan nahimuot sa paghatag kaninyo sa gingharian.”* (Lucas 12:32).

Kanang tanan imo, higala, ang tibuok Gingharian. Ang Dios dili makadugang sa bisan unsa nga Iya nang gihatag kanimo. Anaa na nimo

ang tanan! Daghang mga tawo ang molihok nga daw masamok ang Dios kon iapil nila Siya sa ilang adlaw-adlaw nga kinabuhi. Apan kana usa ka yano nga ka walay alamag. Kon ako mosulti kanimo nga ikaw usa ka lungsoranon sa Estados Unidos, ug ikaw moingon, “Aw, wala ko kabalo ana. Kon magtukod ko’g tindahan dinhi, mahadlok ko nga makahasol ko sa usa ka tawo kon gusto nakong pahimuslan ang pipila sa mga balaod sa nasod nga magtugot kanako sa pag-abli sa akong negosyo dinhi.” Isip usa ka lungsuranon, anaa na nimo ang tanan nga mga balaod ug mga pribilehiyo nga gitanyag sa tibuok nasud. Imo kining tanan! Ayaw pag-undang. Ankona ang tanang benepisyo nga legal nga para na kanimo!

### **Nganong ang Gingharian sa Dios gitandi sa usa ka bahandi?**

Tungod kay kon aduna kay access sa kahibalo sa langit, makahibalo ka unsay buhaton sa matag sitwasyon, gamit ang talagsaon, ug pinasahi, ug hinatag sa Dios nga mga estratehiya. Hatagan ko ikaw ug lain pang pananglitan kon giunsa kini.

Sa dihang nagsugod kami ni Drenda sa pagkat-on bahin sa Gingharian, ang among kinabuhi nausab sa dako nga paagi. Ang bug-os nga paglingkawas sa utang nahisama sa pagginhawa ug presko nga hangin, ug ang among kinabuhi adunay dakong kausaban. Ang kahibulongang kasinatian sa pagbayad sa among 22 ka ektarya nga yuta mura’g usa ka damgo—talagsaon kini! Apan nagkinahanglan gihapon kami og balay. Wala kami alamag sa pagtukod og balay, ug wala mi mahibalo kon asa magsugod. Apan nagsugod kami sa pag-ampo kon UNSAON nga makuha ang balay nga among gikinahanglan sa maong propiedad. Kami mosalig sa Balaang Espiritu sa pagtabang kanamo.

Gusto namo nga magpabilin nga hingpit nga gawasnon sa utang, busa nagsugod kami sa pagsusi sa dili kasagarang mga paagi sa pagtukod og balay. Usa sa mga pamaagi nga makapakunhod sa gasto apan makahatag og kalidad nga balay mao ang paggamit og modular nga balay. Ang usa ka modular nga balay dili sama sa gibitbit nga balay, kondili usa ka

balay nga gitukod sa mga seksyon sa usa ka pabrika ug dayon gihiusa sa imong propiedad. Kini nga mga balay adunay parehas nga kalidad sa mga balay nga hinimo sa kahoy, apan mas barato tungod sa mas maayo nga proseso sa pagtukod niini sa pabrika. Tungod niini, among gitan-aw ang duha o tulo ka modular nga kompanya sa pagtukod ug gitandi ang ilang mga modelo. Pagkahuman sa among pagtuki ug pagbisita sa modular nga mga balay, gibati namo nga kini ang pinakamaayong kapilian, busa among gipili ang usa ka kompanya ug modelo nga among giila nga tukma para sa among propiedad. Andam na unta kami sa pagpirma sa kontrata human sa among pagpauli gikan sa usa ka homeschool nga kombensyon diin kami gidapit isip mamumulong sa Virginia. Nakahukom kami nga dad-on ang mga plano uban kanamo aron among hisgutan ang tanang detalye nga posibleng wala namo matagad ug masiguro nga kini ang pinakamaayong desisyon sa wala pa kami mopirma sa kontrata sa among pagbalik.

Wala ako makahinumdom kon giunsa kini nahitabo nga kami gidapit sa pagpamulong sa usa ka komperensya sa Virginia, apan gidapit kami nga mopuyo uban sa usa ka homeschool nga pamilya samtang kami anaa didto. Sa among pag-abut sa ilang matahum nga balay nga may istilong anghabagatan, ug sa dihang nahimamat namo ang among bag-ong mga higala, nagsugod kami sa pagkomento kon unsa kini katahum. Sa maong panag-istoryahanay, nahibal-an namo nga sila mismo ang nagtukod sa ilang balay. Nakurat ko sa pirmiro! “Kontraktor ba kamo?” nangutana ko. “Dili,” sila mitubag. Ang amahan mipahayag nga siya usa ka accountant sa usa ka dakong lokal nga kompanya. “Aw, giunsa man nimo pagkahibalo kon unsaon pagtukod sa imong kaugalingong balay?” pangutana nako.

Nagsugod sila sa paghisgot bahin sa lainlaing mga butang, ug sa kana nga panag-istoryahanay, gisultihan namo sila nga magtukod usab kami og balay ug mopirma na kami sa kontrata inig balik namo sa lungsod. Nalipay sila sa pagkadungog niana ug nagsugod sa pagpangutana

kanamo bahin sa among bag-ong balay. Gisugdan namo pagsulti kanila ang bahin sa Ginghamarian ug kon sa unsang paagi nausab ang among kinabuhi. Among gipaambit kon giunsa namo pagbayad nga cash ang 22 ka ektarya nga yuta ug unsa kami kahinam nga makagawas sa farmhouse.

Among giingon nga kami adunay aktuwal nga mga plano uban kanamo, ug sila nangutana kanamo kon pwede ba sila makakita niini. Siyempre, nalipay kami sa pagpaminaw sa ilang opinyon. Gibutang namo ang mga plano sa ilang lamesa sa kusina, unya ila kining gisusi. Dali rang nagsulti ang asawa ug miingon sama sa, “Gamay ra kaayo ni nga lugar,” o “kinahanglan nimo og mas dako nga kusina,” o “nahunahuna ba nimo kini nga balay kon ang imong mga anak modako na? Isip mga pastor, kinahanglan nimo ang mas dako nga lugar alang sa mga bisita.” Sa ilang mga gipang-ingon, klaro nga gipasabot nila kon ngano nga dili kini ang angay nga balay para namo, ug nakasabot mi sa ilang mga punto. “Pero unsaon man namo pagtukod og mas dako nga balay gamit lang ang kuwarta nga among naandam?” “Sayon ra na,” miingon sila. “Tukora kini sa inyong kaugalingon!” Pagkadungog nako anang mga pulonga, hapit ko makatawa. “Magtukod ko’g kaugalingong balay?” Sama sa akong giingon, wala koy kasinatian bahin sa pagtukod og balay! Apan misugod sila sa pagdasig kanamo, nga nag-ingon nga dili kaayo kini lisod. Gisultihan nila kami bahin sa usa ka libro nga gitawag, *Save up to \$50,000 or more as your own General Contractor: How to Plan, Subcontract and Build Your Dream House* ni Warren V. Jaeger.

Sa among pagpauli, nakahukom kami nga dili na lang mopirma sa kontrata para sa modular nga balay. Imbis, among gi-order ang libro ug gibasa kini pag-ayo, nga naghinuktok sa matag kapitulo. Nagsugod usab kami sa pagpangita og tradisyonal nga mga plano sa balay. Sa kadugayan, nakakita mi og plano nga among ganahan, ug gisugdan namo kini pagbahinbahin ngadto sa sunod-sunod nga proseso.

Nakigsulti mi sa mga higala ug uban pang mga tawo nga nakasuway na og tukod og ilang balay. Sa katapusan, nakadesisyon kami—kaya namo kini! Gitan-aw namo ang mga plano sa bilding ug nangutana sa among kaugalingon: “Unsa may among mahimo mismo aron masulod kini sa among badyet?” Ug sa dili katuohan, nakahunahuna ko nga ako mismo ang mag-wire sa tibuok balay, bisan wala pa gani ko nakahikap og bisan usa ka piraso sa 12/2 wire sa akong kinabuhi! Usa ka higala nga nakasabut sa electrical wiring ang miingon nga sayon ra kini ug buot siya magtudlo kanako.

Tungod kay busy ko sa akong negosyo, nakahukom si Drenda nga siya ang mahimong general contractor ug mogunit sa mga subcontractor. Una, nakakita mi og contractor nga mag-frame sa balay,

**KANUNAY KONG  
GIINGON NGA ANG  
MGA TINAGO SA  
DIOS GITAGO ALANG  
KANIMO, DILI GIKAN  
KANIMO! SI SATANAS  
NAGPUYO SA  
KANGITNGIT UG WALA  
SIYA MAKASABOT SA  
MGA PLANO SA DIOS.**

ug ang uban, kami na ang bahala. Ang misunod mao ang pipila sa labing lisod pero makapahinam nga mga adlaw sa among kinabuhi. Aron mubuo ang taas nga istorya—nahuman namo ang among balay nga doble ang gidak-on kumpara sa modular nga among unang gihunahuna. Kami adunay solidong kahoy nga mga pultahan; gahi nga kahoy nga salog; solidong kahoy nga crown molding; ug nindot, tradisyunal nga mga kabinet sa kusina nga puno sa bag-ong stainless

steel nga mga appliances. Among nasayran nga nakadaginot kami og labaw sa \$200,000 pinaagi sa pagtukod niini sa among kaugalingon!

Karon, malipayon ko nga nangayo kami og tabang sa Balaang Espiritu aron hatagan kami og plano. Ang resulta labaw pa sa among gihandom—mas maayo pa kaysa sa among gihunahuna nga kaya namo sa among kaugalingon. Nahibulong gihapon ko kon giunsa pagplano sa Dios ang among pag-adto sa Virginia ug kon giunsa kami pagbutang

sa balay sa magtiayon nga bag-o lang nakahuman og tukod sa ilang kaugalingong balay. Sigurado ko nga kon wala to nahitabo, tingali modular nga balay ang among napili. Wala ko nag-ingon nga bati ang modular nga balay, pero dili unta namo makuha ang labing maayong resulta. Ang balay nga among natukod usa ka buhing ebidensya kon giunsa sa Balaang Espiritu paggiya ug paghatag og plano nga molapas sa among gilaoman!

Usabon ko, tugoti ako sa pagsulti sa makausa...

**Anaa sa Dios ang Iyang plano KANIMO!**

Apan tingali moingon ka, “Gary, kini maayo, apan ang Mateo 13:44 nag-ingon nga ang plano gitago!” Oo, kini tinuod, ug kana alang sa imong kaayohan. Lantawa ang giingon ni Jesus sa Mateo 13:10-11.

*Ang mga tinun-an miduol kaniya ug nangutana, “Nganong nagsulti ka sa mga tawo pinaagi sa mga sambingay?” Siya mitubag, “Ang kahibalo sa mga tinago [kadtong mga butang nga gitago] sa gingharian sa langit gihatag na kaninyo, apan wala kanila.”*

— Mateo 13:10-11

Kini nga tinago nga kahibalo alang lang kanimo, ug dili alang sa yawa o sa dautang mga tawo nga mahimong moabuso niini o mopugong sa plano sa Dios. Ang Bibliya nag-ingon nga si Satanas mag-usab sa iyang mga pamaagi kon makahibalo siya sa ginabuhay sa Dios.

*Dili, ang among gipasabot mao ang tinago nga kaalam sa Dios. Kini nga kaalam gitago ug gitagana sa Dios alang sa atong himaya sukad pa sa sinugdan sa panahon. Wala kini masabti sa mga pangulo niining kalibutana, kay kon nakasabot pa sila, wala unta nila gilansang sa krus ang mahimayaang Ginoo.*

— 1 Corinto 2:7-8

Kanunay kong giingon nga ang mga tinago sa Dios gitago alang kanimong, dili gikan kanimong! Si Satanas nagpuyo sa kangitngit ug wala siya makasabot sa mga plano sa Dios. Maka-reakto **lang** siya sa gibuhad sa Dios. Sa dihang makamatikod siya kon unsa ang nahitabo, **ulahi na ang tanan**! Busa kon makasinati ka og kabalaka samtang nagpaabot sa tubag sa Dios, ilabi na kon hapit na ang tungang gabii ug wala pa gihapon ka makadawat og tubag, hinumdumi: ang Dios dili maulahi. Ang paglangan nga imong makita mahimo diay nga pamaagi sa Dios aron matago ang tubag hangtod sa hustong panahon nga ipadayag kini.

*Ang gingharian sa langit sama sa bahandi nga GITAGO sa usa ka uma. Sa diha nga ang usa ka tawo nakakaplag niini, iya kining gitagoan pag-usab, ug unya sa iyang kalipay milakaw ug gibaligya ang tanan nga iya ug gipalit kadtong uma.*

— Mateo 13:44

Atong gihisgutan kon unsa ug asa ang uma, ug nganong gitago ang bahandi. Atong gihisgutan usab kon unsaon pagpaminaw sa tinago nga mga butang gikan sa Gingharian sa Dios—pinaagi sa pag-ampo diha sa Espiritu ug pagpaminaw sa tingog sa Balaang Espiritu. Apan adunay usa pa ka importante nga prinsipyo niining proseso nga gilatud sa Kasulatan, nga kinahanglan nimong masabtan. Ang dili pagsunod niini nakapahinabo sa kapakyasan sa daghang maayo ug halangdong mga plano, ug nakadala sa makaguba nga kalaglagan sa kinabuhi sa daghang mga tawo. Kon imong namatikdan sa Kasulatan, sa dihang ang usa ka tawo makadungog og bahandi, ideya, direksyon, o plano gikan sa Dios, ang kasulatan nag-ingon nga tago-an niya kini pagbalik. WALA SIYA DAYON MAGBUHAT OG AKSYON niana! Wala niya kini ipanghambog o gisaysay sa tanan niyang mga higala ug silingan mahitungod sa unsay iyang nadungog gikan sa Ginoo o sa iyang bag-o ug makapahinam nga mga plano, dili pa. Ang Bibliya nag-ingon nga

iyang gitagoan pag-usab ang bahandi, milakaw ug gibaligya ang tanan niyang kabtangan, ug dayon gipalit ang uma. Sa yano nga mga pulong, dili siya gusto nga ibutyag ang nahimutangan sa bahandi ngadto kang bisan kinsa hangtod nga siya mismo ang matag-iya niini. Pinaagi sa paghulat hangtod nga maiyaha na kini, nasiguro niya nga walay bisan kinsa nga makakawat niini gikan kaniya.

Ang Kasulatan usab nagpadayag nga sa dihang nakakaplag siya sa bahandi, wala pa siya sa kahimtang nga makabayad niini. Kinahanglan pa siyang moagi sa usa ka proseso sa pagpangandam aron makaangkon siya og igong kapasidad sa pagpalit niini. Kini nga prinsipyo wala lang naghigot bahin sa kuwarta ug sa pagpalit og butang. Kini nagtudlo kanato og mahinungdanong prinsipyo sa kinabuhi ug kon unsaon nimo pagbuhat sa mga butang nga ipadayag sa Balaang Espiritu kon gusto ka nga magmalampuson.

Ang Kasulatan nagpasabot nga sa dihang makadungog ka og ideya o direksyon, dili ka dapat molihok dayon hangtod nga andam ka ug aduna kay igong kapasidad sa pag-angkon niini. Sayon ra natong masabtan kon atong ihalimbawa kini sa kuwarta. Kon wala kay igo nga kuwarta aron mapalit ang yuta, siyempre, dili nimo isulti sa uban nga aduna kini'y bahandi. Kon adunay balita nga adunay usa ka bahandi niini, sigurado nga adunay lain nga mopalit niini nga mag-una pa kanimo. Busa, ang hustong buhaton mao nga maningkamot ka sa pagpangita og paagi aron makakuha og kuwarta sa pagpalit sa yuta, samtang gitago nimo ang tinood mahitungod sa maong bahandi.

Kini nga prinsipyo magamit usab sa tanang direksyon o mando nga ihatag sa Dios kanimo. Kasagaran, ang mga Kristohanon masayop sa pag-ila sa sinugdanan isip kataposan. Daghang higayon nga ang Balaang Espiritu magpadayag kanato og usa ka ideya, dili aron molihok dayon niana, kondili aron makapangandam kita ug makakuha sa oportunidad sa tukma nga panahon. Ang panahon sa pagpangandam sa bisan unsang paningkamot mao ang labing mahinungdanong bahin sa proseso. Sa

isports, ang duwa mapildi o madaug base sa pagpangandam sa mga team atol sa ilang pagbansay—sa panahon nga walay nagtan-aw kanila. Apan kinahanglan nga mouyon ka nga ang pagbansay dili lingaw; lisod kini ug kapoy. Sa laing bahin, halos tanang tawo ganahan sa kahinam sa duwa, sa kasaba sa mga tawo, sa suga, ug sa kahinam sa kadaugan.

Kasagaran, kining mga damgo moresulta sa kasakit ug kasubo kon ang pagpangandam dili tagdon. Dili ko maihap kon pila ka mga tawo nga akong nakita nga napukan ang ilang kinabuhi tungod sa kakulang sa kasayuran mahitungod niining mahinungdanong prinsipyo. Nakita nako ang mga tawong tinud-anay nga gitawag sa Dios, mga tawong aduna’y dihog sa Espiritu, nga nagsugod og iglesia bisan dili pa sila andam sa emosyonal o pinansyal. Ang resulta? Kalaglagan imbis nga matuman ang ilang damgo. Nakita usab nako ang mga tawong nakadungog sa Dios nga naghatag kanila og ideya para sa negosyo. Tungod sa ilang pagsalig sa kalampusan, mibiya sila sa ilang lig-on nga trabaho nga walay saktong pagpangandam o pagsuta, ug sa kataposan, na-bankrupt sila. Ang labing makasubo sa maong mga istorya kay ang Dios ang basulon, ug ang mga nalambigit napakyas sa paglaum dili lang sa ilang kaugalingon kondili apil na usab sa ilang pagsalig sa Dios. Dili ko sigurado ngano nga daghang mga tawo ang naghunahuna nga ang kalampusan moabut lang sa usa ka gabii. Apan kinahanglan matudloan ang mga tawo sa proseso sa kalampusan nga anaa mismo niining yano nga bersikulo sa Kasulatan.

Adunay mga tawo nga mianhi kanako ug moingon, “Pastor, gisultihan ako sa Dios nga kini ang akong iglesia.” Unya dili na nimo sila makita pag-usab. “Pastor, gihatagan ko sa Dios og nindot nga ideya para sa negosyo.” Unya ang sunod nimo madungog, nakalista na ilang balay sa sheriff’s sale ug ilang sakyanan imbarguhonon na. DILI kini ang gusto sa Dios alang kanimo.”

Kon makadungog kita og ideya gikan sa Balaang Espiritu, wala kini nagpasabot nga dapat ta molihok dayon. Kasagaran, kini naggiya

kanato sa pagtago sa maong damgo ug sa pagpangandam aron kini atong maangkon sa tukma nga panahon. Kasagaran, wala pa kanato ang tanang butang nga gikinahanglan aron malampuson natong makab-ot ang maong panan-awon. Ang pagpangandam mahimong molungtad og usa ka semana o bisan pa og pipila ka tuig, depende sa gipadayag sa Dios kanimo. Kinahanglan nimong masabtan nga ang pagpangandam ug tukma nga panahon kay sama kaimportante, o mas labaw pa, kay sa ideya mismo!

Nasayud ko nga sa akong kabahin, gitawag ako sa pagsangyaw sa Ebanghelyo sa nag-edad pa ako og 19 anios. Adunay usa ka hayag nga panan-awon diin nakita nako ang akong kaugalingon nga nagguniit og Biblia, ug ang Ginoo miingon, “Gitawag ko ikaw sa pagpahayag sa akong Pulong,” tulo ka beses. Usa kini ka tinuod ug gamhanan nga kasinatian. Apan wala ko sugoa sa Ginoo nga magsugod og wali diha-diha dayon. Hinunoo, giingnan ko Niya nga moeskwela sa kolehiyo. Kay tan-awa, halos napakyas ko sa high school nga adunay 1.3 nga grado. Dugang pa, grabe ako ka ulawon ug naglikay gyud sa mga tawo. Para lang masayod mo, layo ra gayud ko sa hustong pangidaron aron mahimong usa ka pastor! Busa miadto ko sa kolehiyo, ug lisod—grabe kalisod—apan nagpadayon ko ug nahuman nako ang akong upat ka tuig nga kurso.

Pagkahuman nako sa kolehiyo, naghunahuna ko kon mao na ba ang hustong panahon sa pagwali. Apan giingnan ko sa Ginoo nga gusto Niya nga modawat ko og trabaho sa usa ka lokal nga kompanya sa pinansyal, nga nagbaligya og insurance ug securities. Bisan pa nga wala kini makasulod sa akong panghunahuna, nasayod ako nga tingog kini sa Dios, busa gidawat ko ang maong posisyon. Kana nga trabaho mas lisod pa kaysa sa kolehiyo. Kinahanglan ko nga motawag sa mga tawo nga wala pa nako mailhan matag-adlaw ug nakakat-on ko kon unsaon sa pagpakigbatok sa akong kahadlok sa mga tawo. Lisod usab ang pagpuyo sa kita nga nakabase lang sa komisyon, ug, sa tinuod

lang, gusto ko mohunong matag-adlaw—apan nasayod ako nga dili ko pwede moundang. Sa kataposan, human sa pipila ka tuig, nahimo akong maayo sa akong trabaho. Sa tinuod lang, kami ni Drenda nakahimo sa labing maayong opisina sa tibuok nasod, nga nag-una sa 5,000 ka opisina sa among kompanya.

Sa maong higayon, giingnan ko sa Dios nga mao na ang tukma nga panahon sa pagsugod og iglesia. Anaa na ko sa edad nga 40 niadtong panahona. 21 ka tuig ang gikinahanglan sa Dios aron andamon ako para sa panan-awon nga iyang gihatag kanako sa dihang 19 pa ako. Sa dihang nagsugod na ako sa pagpamastor, nakasabot ko ngano nga daghan kaayong pagpangandam ang gikinahanglan. Mas lisod pa diay ang pagpastor kaysa akong gipaabot. Apan tungod sa akong pagbansay sa pakigsandurot sa mga tawo ug sa pag-atubang sa mga pagsalikway sa negosyo, nahimo akong matinumano sa panawagan sa Dios sa akong kinabuhi. Dili tanang tahas magkinahanglan og 21 ka tuig nga pagpangandam, apan ang prinsipyo sa pagpangandam magpabilin nga parehas.

Tungod niini nga prinsipyo sa pagpangandam, ganahan ko nga ipasabot ang Mateo 13:44 sa laing pamaagi sama niini:

*Ang Gingharian sa langit nga anaa diha kanimo naghatag kanimo og kahibalo o kahinguhaan sa kahibalo sa mga tinago o natagong mga butang nga nahibal-an sa Dios. Kini nga kahibalo makuha gikan sa Espiritu sa Dios nga anaa sulod kanimo. Sa dihang ang usa ka tawo makakaplag o makadungog sa maong tinago nga kahibalo—nga usa ka bahandi alang kaniya, usa ka tubag alang kaniya—iya kining gitipigan pag-usab sa iyang kasingkasing ug hunahuna. Ug sa iyang kalipay, uban sa tibuok kusog, nagapaningkamot siya sa maayong pagpangandam aron matuman ang direksyon ug panudlo nga gipadayag kaniya, aron hingpit niyang makuha ug maangkon ang tubag nga iyang gipangita.*

## KAPITULO 8

# ANG LISOD NGA DAPIT SA PROMOSYON

Ang akong higala nga si Pastor Peter ug ang iyang asawa nga si Bev, nga nagpastor sa usa ka maayong iglesia sa New Zealand, nagplano nga moanhi sa Estados Unidos alang sa usa ka mubo nga pagbisita. Panahon kadto sa Pasko, ug sila mopadulong sa Colorado Springs nga anaa sa Broadmoor hotel aron magpahuway ug malingaw sa maanyag nga dekorasyon sa Pasko. Kon wala pa ka nakaadto sa Broadmoor, kini usa sa labing maayong resort sa Amerika, nga nahimutang sa dapit sa Rocky Mountains, ug nailhan sila tungod sa ilang nindot kaayong dekorasyon sa Pasko. Gipahibalo kami ni Pastor Peter nga didto sila magpabilin ug nangutana kon gusto ba namo mokuyog nila. Wala kami magduha-duha sa pagdawat sa maong higayon, ug among gigahin ang tulo ka labing matahum nga mga adlaw didto.

Kon kauban ko si Pastor Peter, kasagaran among tagaan ug daghang oras ang paghisgot sa ministryo, kay apil man siya sa akong board. Mao gihapon ang nahitabo niini nga biyahe. Nag-istorya kami bahin sa among mga plano alang sa umaabot nga tuig ug nag-ambitay og mga ideya. Sa katapusan, miabot ang panahon sa pagpanghawa, nga kanunay nga makapaguol kay sila usa sa dako nga mga higala sa among kinabuhi. Kasagaran, si Drenda ug ako mobisita kanila sa New Zealand

kausa sa usa ka tuig, o dili man gani, matag duha ka tuig. Apan niining tuiga, sobra ko ka busy ug wala koy plano nga mag-adto.

Pagbalik namo sa balay, andam na namong atubangon ang bag-ong tuig nga puno sa kahinam. Apan makapainteres nga sa ika 9 sa Enero, nakadamgo ako nga si Pastor Peter magdapit kanako sa pagwali sa ilang simbahan sa Pebrero. Nakahunahuna ako nga kini talagsaon kaayo kay bag-o lang kami nag-uban sulod sa tulo ka adlaw, ug wala man siya naghisgot bahin niini. Dugang pa, hapit na ang Pebrero, mao nga murag dili katuohan ang maong damgo. Bisan pa, akong gisultian si Drenda sa gisulti sa Ginoo kanako samtang naglakaw ko paingon sa kusina aron mamahaw.

Ang akong computer napatong sa countertop sa kusina, ug ako kining kaswal nga gipaadar. Samtang nag-inom ko og kape, nakita nako nga may bag-ong email nga naabot gikan kang Pastor Peter. Sa akong pag-abli sa email, nakurat ko kay siya nagdapit kanako sa pagwali sa ilang tinuig nga financial conference, nga mahitabo human sa tulo ka semana. Nasurprisa ko, apan tungod sa akong damgo, dili ko hingpit nga nahingangha. Dali ra akong mitan-aw sa akong schedule aron susihon kon posible ba kini, kay daghan ang akong biyahe niadtong bulana, ug halos parehas sa petsa nga gidapit ako ni Peter sa New Zealand. Si Drenda ug ako nakaskedyul na nga molupad padulong sa Buenos Aires, Argentina, pipila ka adlaw bago ako maanaa sa Auckland. Ang bugtong paagi nga makaabot ko sa New Zealand sa hustong oras mao ang paglarga dayon human sa komperensya sa Buenos Aires, padulong diretso sa Sydney, Australia, ug dayon sakay sa usa ka biyahe padulong sa Auckland. Dili unta ko magplano og usa ka biyahe nga ingon niini, apan tungod kay ang Ginoo mismo misulti kanako, nasayod ko nga angay gayud kaming moadto.

Angamongbiyahe sa Argentina usa ka corporate trip nga gisponsoran sa usa sa akong mga vendors nga nakignegosyo sa akong kompanya. Nindot ang maong biyahe, ug usa usab kini ka maayong higayon aron

magkita-kita pag-usab sa pipila ka mga higala nga kasagaran makasugat ra nako kausa sa usa ka tuig o mas dugay pa. Niadtong panahona, ang Argentina nag-atubang og seryoso nga mga problema sa pinansyal, ug may pipila ka mga kagubot sa syudad. Apan sa kinatibuk-an, maayong kasinatian ang maong biyahe, labi na kay wala pa ko nakaadto didto kaniadto. Ang among paglupad padulong sa Sydney mikabat og 16 ka oras—ang pinaka dugay nga paglupad nga akong nasinatian. Ang ruta sa among eroplano moagi sa ibabaw sa South Pole, nga akong gitan-aw nga usa ka kahibulongang kasinatian, kay naglaum ko nga makakita sa maong bahin sa kalibutan gikan sa ibabaw.

Samtang naglupad kami, nagtan-aw ko sa bintana ug nakita nga puro nalang yelo ug niyebe ang anaa sa ubos. Unya nakahuna-huna ko nga nagsakay diay ko sa usa ka airline sa Argentina—usa ka kompanya nga naapil sa problema sa pinansyal sa ilang nasud nga naglisod pagpabilin nga lig-on sa ekonomiya. Misulod lang sa akong hunahuna sa makadiyot nga kon nagtipid sila sa maintenance sa ilang mga eroplano ug adunay mahitabo, dili kini usa ka maayong panghitabo, labi na sa ingon niining dapit sa kalibutan. Apan nasayod ko nga anaa ako sa luwas nga mga kamot sa Ginoo, ug Siya mismo ang naggiya kanako sa maong biyahe.

**“ANG TANANG  
GIMANDOAN SA  
ESPIRITU SA DIOS,  
MGA ANAK SA DIOS”**

**—ROMA 8:14**

Sa among pag-abot sa Sydney, dali namong gitawagan sila Pastor Peter ug Bev, ug nakurat kami sa balita nga si Pastor Peter anaa diay sa ospital ug bag-o lang nakasinati og grabe nga atake sa kasingkasing. Dili siya makawali sa iyang dakong financial weekend, ug nangutana siya kanako kon pwede ba ko makatudlo sa tibuok nga bulohaton. Diha-diha, nasabtan ko na kon ngano nga gigiyahan gayud ako sa Ginoo nga moadto sa New Zealand. Nahingangha ako kon giunsa sa Balaang Espiritu paggiya sa atong mga lakang. Kini usa ka dakong pahinumdom sa giingon sa Roma 8:14.

*“Ang tanang gimandoan sa Espiritu sa Dios, mga anak sa Dios”*  
(Roma 8:14).

Sa makausa pa, naghisgot kita bahin sa abilidad nga makadungog sa giya, mga ideya, ug mga konsepto nga gikan sa Balaang Espiritu. Wala nay laing mas maayong istorya sa Bibliya nga makapadayag sa akong sunod nga pagtulon-an bahin sa pagpaminaw sa Balaang Espiritu aron makabaton sa tubag nga imong gikinahanglan kaysa sa kasinatian ni Daniel. Atong subayon ang istorya sugod sa Daniel 2:1–6.

*Sa ikaduhang tuig sa paghari ni Nabucodonosor, nagdamgo siya sa makadaghan. Nahasol siya ug dili makatulog. Unya gipatawag sa hari ang mga salamangkero, ang may mga anting-anting, ang mga diwatahan ug ang mga maalamong taga-Babilonia aron paghubad sa iyang damgo. Busa miatubang sila sa hari. Ug gisuginlan sila sa hari, “May damgo ako nga wala ko hisabti ang kahulogan busa nahasol ako.”*

*Mitubag sila sa hari sa pinulongang Aramaico, “Kamahalan, hatagan ka untàg taas nga kinabuhi! Tug-ani kami sa imong damgo ug amo kining hubaron.”*

*Mitubag ang hari, “Timan-i ninyo kini: kon dili kamo makatug-an kanako sa akong damgo ug makahubad niini, ipaputolputol ko kamo ug ipaguba ko ang inyong mga balay. Apan kon makatug-an kamo sa akong damgo ug makahubad niini, hatagan ko kamo’g mga gasa ug mga ganti ug pasidunggan ko kamo pag-ayo. Busa itug-an ninyo ug hubara ang akong damgo.”*

—Daniel 2:1-6

*Mitubag sa hari ang mga magtatambag, “Walay bisan kinsa nga makatuman sa gipangayo sa hari kay wala pa gayoy*

*hari, bisan unsa pa siya ka gambanan, nga nagsugo sa mga salamangkero o sa mga may anting-anting o sa mga taga-Babilonia sa pagbuhat sa ingon. Lisod tumanon ang imong gisugo ug walay makatuman niini gawas sa mga dios ug wala sila magpuyo uban sa mga tawo.”*

*Tungod niini, nasuko ug napungot pag-ayo ang hari ug misugo nga pamatyon ang tanang makinaadmanong tawo sa Babilonia. Busa gipahibalo ang sugo nga pamatyon ang mga maalamon lakip sila si Daniel ug ang iyang mga higala.*

—Daniel 2:10-13

*Unya mipauli si Daniel sa iyang balay ug gisuginlan niya ang iyang mga higala nga si Ananias, si Misael ug si Azarias bahin sa nahitabo. Gisultihan niya sila nga magpakiluoy sa Dios bahin niining tanghaga aron siya ug ang iyang mga higala dili malakip pagkamatay uban sa mga makinaadmanong tawo sa Babilonia. Unya nianang gabhiona gipakitaan si Daniel bahin sa tanghaga pinaagi sa usa ka panan-awon. Unya gidayeg ni Daniel ang Dios nga anaa sa langit. Siya miingon: “Dalaygon ang ngalan sa Dios hangtod sa kahangtoran, kay Iya man ang kaalam ug ang gabom. Siyay nagbuot sa dagan sa panahon; paphaon Niya ang mga hari ug lain na usab ang iyang paharion; gikan Kaniya ang kaalam sa mga maalamon ug ang kahibalo sa adunay panabot. Gipadayag Niya ang tulukibon ug tinagong mga butang; makita niya ang gitabonan sa kangitngit, ug ang kahayag anaa kaniya.”*

—Daniel 2:17-22

Si Daniel anaa sa usa ka kahimtang nga naghulga sa iyang kinabuhi, usa ka makamatay nga sitwasyon. Apan ania ang usa ka

mahinungdanong susi alang sa imong sunod nga pag-uswag: Gigamit kini sa Dios aron iandam ang iyang promosyon, dili ang iyang kapildihan. Tungod sa tinago nga kaalam nga gihatag sa Balaang Espiritu, si Daniel nakahubad sa damgo ni Haring Nabucodonosor ug sa kahulogan niini. Nahingangha ug nalipay pag-ayo ang hari, sama sa atong makita sa sunod nga bersikulo.

*Unya si Haring Nabucodonosor mihapa sa yuta ug miyukbo kang Daniel ug misugo nga halaran siya’g insenso. Miingon ang hari kang Daniel, “Matuod gayod nga ang imong Dios mao ang Dios sa tanang dios ug Ginoo sa mga hari ug tigpadayag sa mga tanghaga kay nakahimo ka man sa pagsaysay niining maong tanghaga.”*

*Unya gipasidunggan niya pag-ayo si Daniel, gihataga’g mga mahalong gasa ug gihimong gobernador sa lalawigan sa Babilonia ug pangulo sa tanang makinaadmanon sa Babilonia. Tungod sa hangyo ni Daniel, gipili sa hari si Sadrac, si Mesac ug si Abednego nga maoy magdumala sa mga kalihokan sa lalawigan sa Babilonia apan si Daniel nagpabilin sa palasyo.*

—Daniel 2:46–49

Unsa may resulta sa abilidad ni Daniel sa pagpaminaw sa tingog sa Dios? Promosyon ug bahandi!

Makita nato ang susama nga resulta sa laing istorya sa Bibliya—ang kasinatian ni Jose. Sa dihang nakaatubang siya sa usa ka parehas nga sitwasyon, gihatagan siya og higayon sa paghubad sa damgo ni Paraon. Wala lang niya kini nahubad nga husto, apan naghatag usab siya og plano sa pagdumala aron maluwas ang Ehipto gikan sa umaabot nga hulaw nga gipadayag sa damgo. Tan-awon nato ang tubag ni Paraon sa Genesis 41:39–40.

*Busa miingon si Paraon kang Jose, “Kay gipadayag man sa Dios kanimo kining tanan, walay tawo nga labaw kanimo’g salabotan o mas maalam pa kay kanimo. Himoon ko ikaw nga gobernador sa akong nasod ug ang tanan kong katawhan motuman sa imong sugo. Ako ray labaw kanimo kay hari man ako.*

—Genesis 41:39–40

Sa duha ka istorya, ang kawad-on sa paglaum usa ka tinuod nga hagit sa sinugdanan, apan ang kataposang resulta mao ang promosyon ug bahandi. Sa yano nga pagkasulti, ang kalibutan andam mobayad og dako alang sa mga tawong makasulbad og dagkong mga problema. Ug ang Balaang Espiritu nga anaa kanimo ganahan gayud sa pagbutang kanimo sa taliwala sa dagkong hagit! Ayaw kahadlok kon kini mahitabo, hinunoa, sugdi ang pagdayeg sa Ginoo kay Siya motabang kanimo, sama sa iyang pagtabang kang Daniel ug Jose! Kanunay kong giingon, “Ang Dios makadawat sa himaya, ug ako makadawat sa suweldo!” Ganahan gyud ko sa gisulti ni Daniel mahitungod sa Ginoo: **“Siya nagapadayag sa lawom ug tinago nga mga butang; Siya nasayod sa mga anaa sa kangitngit, ug ang kahayag nagapuyo uban Kaniya.”** Si Daniel mismo miingon nga ang kahayag nagapuyo uban sa Dios. Pasabot niini, sama sa paglakaw sa ngitngit nga gabii, kon imong pasigaon ang suga, makita nimo ang imong padulngan! Ang kahadlok mapulihan sa kahayag, ug makahibalo ka kon asa ka moagi. Si Pablo usab nagpasabot sa maong bersikulo nga ang Dios nagasulti ug nagatabang kanato sa panahon sa kalisdanan.

*Nasayod kamo nga sa inyong pagkadili magtutuo kaniadto nahisalaag kamo sa nagkadaiyang paagi sa pagsimbag mga diosdios nga **dili makasulti** (1 Corinto 12:2).*

Si Pablo nag-ingon nga ang mga diosdios dili makasulti, apan ang Dios makasulti!

Tingali naghunahuna ka kon ngano nga gititulohan ko kining kapitulo nga “Ang Lisod nga Dapit sa Pag-uswag.” Ang rason mao kini: sa lisod nga dapit, anaa ang Balaang Espiritu sa sulod nimo nga may tubag. Sa lisod nga sitwasyon, anaa ang hingpit nga higayon aron madawatan ang solusyon. Ang lisod nga dapit mao ang hingpit nga dapit para sa imong sunod nga promosyon! Kasagaran, daghang magtotoo ang naglikay sa mga lisod nga sitwasyon. Sa kamatuoran, daghan ang nagtuo nga kon anaa sila sa kalisdanan, napakyas na sila sa pagsubay sa kabubut-on sa Dios.

Nahinumduman ko sa dihang nagsugod pa lang kami sa among TV ministry, ug ang among bayronon miabot og \$9,000 matag bulan. Grabe, abi nako nga dako na kaayo kana nga kantidad nga among pangitaon matag bulan! Apan unya, misaka kini og \$20,000 matag bulan, dayon naabot og \$50,000! Usa ka adlaw, samtang kami tanan nag-ampo, ang akong anak nga si Amy nagsugod sa pagsulti pinaagi sa gasa sa pagpanagna:

“Dako kaayo ang anihonon nga para kanimo. Ginapalapad Ko ikaw! Sa Akong Espiritu lang nimo masabtan ang mahitabo! Mopadayon kaha ka? Tugoti Ako nga dad-on Ko ikaw sa lisod nga mga butang nga labaw pa sa imong pagsabot—ang dapit sa imposible?”

Sa dili pa nako isulti ang istorya, base sa imong nasabtan karon, unsa man ang tinuod nga kahulugan sa maong panagna? **PROMOSYON!** Nalipay ako nga gihatagan ko sa Dios og kapilian. Wala Siya namugos, apan nangutana Siya kon andam ba ako nga molakaw uban Kaniya sa layo pa nga panaw. Gipangayo Niya ang akong pagsalig. Kon ako mingbalibad, sigurado ko nga mangita Siya og lain. Apan mas gusto ko nga ako mismo ang makadawat sa promosyon, dili ba?

Ako mitubag, “Oo, Ginoo, kabalo Ka nga andam ko.” Pipila ka semana human sa maong pagpanagna, gitanyagan kami sa Daystar

network og adlaw-adlaw nga time slot, nga kaniadto kada semana ra ang among programa. Apan kon among dawaton kini, mosaka ang among balayranon sa TV ngadto sa \$200,000 matag bulan! Basi sa pulong sa pagpanagna ug sa giya sa Balaang Espiritu sa akong sulod, miingon ko og “oo.” Tanang tawo miingon kanako nga posible nga malangay ang pagbayad sa airtime bills sulod sa pipila ka bulan samtang moila pa ang mga tawo sa programa. Ug sakto sila—apan mas grabe pa ang nahitabo kay sa among gilauman. Sa sulod sa lima ka bulan, anaa kami batal nga \$500,000 sa among TV airtime bills! Sa tinuod lang, nakadawat ko og email gikan sa among airtime buyer nga nagsulti nga ang ilang mga abogado nagsugod na og kabalaka bahin sa among nalangan nga mga bayad.

Nagsugod ko sa pakigbisog sa Dios mahitungod niini, kay ang ngalan baya sa akong programa mao ang *Fixing the Money Thing!* Akong gibati ang gamay nga pagkadiskorahi ug miingon kang Drenda nga tingali kinahanglan nakong undangon ang among TV ministry. Apan miingon siya, “Unsa may gisulti sa Dios? Dili ba Siya ang nag-ingon nga Siya ang mobayad niini?” Sulod sa pipila ka adlaw, mao ra kana ang iyang tubag matag higayon nga akong hisgutan kini. Nag-ampo kami, ug bisan wala koy klarong tubag niadtong panahona, nakabati ko sa kalinaw sa Dios. Sa maong semana, nagdamgo ko nga nakakita ko og mga stack sa tseke. Ang lahi sa maong damgo kay dili lang ang mga tseke ang akong nakita, kon dili ako sab nakita ang kantidad sa matag usa ug kinsa ang nagpadala niini. Pagmata nako, nasayod ko nga nabayaran na ang among TV bills, ug nakabati ko og hingpit nga kalinaw. Pag-abot sa katapusan sa semana, usa lang ka ordinaryong weekend, ning-abot ang \$500,000 sama sa akong nakita sa damgo. Ang kantidad ug ang mga nagpadala sa tseke anaa gyud nga miabot.

Nakita ba nimo? Ang lisod nga mga butang dili dautan! Kini mao ang dalan sa promosyon, higala. Daghan ang moingon kanako nga nahadlok sila nga moatubang sa lisod nga sitwasyon kay basin masayop

sila. Apan ang Balaang Espiritu andam mopahimangno kanimo sa posibleng sayop—basta maminaw ka Kaniya.

Nahinumdom ko sa dihang nagpadagan pa ko sa akong mortgage company pipila ka tuig ang milabay, adunay usa ka kliyente nga gusto nga ipautang ang equity sa iyang balay aron ipuhunan sa usa ka kompanya nga wala ko makabati og maayong kasiguruhan mahitungod niini. Samtang naglakaw ko paingon sa hagdanan sa among opisina, usa sa akong mga representante naghisgot mahitungod sa maong kliyente. Kalit lang, nakabati ko sa Balaang Espiritu nga nagtudlo kanako kon unsay angay buhaton. Ako ming-ingon sa akong representante, “Pwede nimo buhaton ang inyong gisabotan, pero kinahanglang mopirma ang kliyente og usa ka sulat bahin sa loan package, nga nagasaysay nga wala kitay kalabotan sa maong investment company ug nagproseso lang sa loan binase sa hangyo sa kliyente.” Sa sulat, among gipahayag nga wala kamiy responsibilidad sa kahimtang o performance sa maong investment, ug wala usab kami nagsugyot sa kliyente nga ipuhunan ang iyang kwarta didto. Paglabay sa unom ka bulan, nabungkag ang maong investment company ug nawad-an og kwarta ang among kliyente. Usa ka kaso ang gipasaka batok sa investment company ug sa akong kompanya. Apan sa dihang ilang abogado nakakita sa sulat nga among gipapirmahan sa kliyente, gibasura ang kaso batok kanamo.

Ang Balaang Espiritu ang mipahunong kanako niadtong adlaw sa hagdanan ug nagpahinumdom kanako nga ipabutang ang maong sulat sa closing packet. Makasalig ka sa Balaang Espiritu nga motabang ug maggiya kanimo sa tanang matang sa sitwasyon. Sama sa gisulti ni Jesus, “Ayaw kahadlok.” Nasaysay ko na kining istoryaha sa usa sa akong ubang libro, pero angay kini nga balikon dinhi. Usa ka adlaw, among pamilya nag-andam sa pagbiyahe alang sa tulo ka adlaw nga bakasyon. Samtang ang tanan anaa na sa van ug andam na ako sa pagpaandar sa makina, kalit lang, nakadungog ko sa Balaang Espiritu nga nagsulti nga ipadaplin ang imong sakyanan sa lain nga dapit. Adunay laing

sakyanan namo nga nagbarog sa driveway tupad sa van. Miingon ang Balaang Espiritu nga ipadaplin kini dapit sa mga sagbot. Mura'g lahi kaayo nga pahimangno. Naghunahuna ko, “Ngano man nga ipabalhin sa Balaang Espiritu ang sakyanan gikan sa driveway ngadto sa balili?”

Wala ko kasabot, pero kusog ang impresyon!

Busa, gisultian nako si Drenda kon unsay akong buhaton, ug akong gibalhin ang sakyanan gikan sa driveway ngadto sa yuta.

Wala nako kini tagda pag-ayo hangtod sa among pagbalik sa Domingo sa gabii.

Didto sa nahimutangan sa akong sakyanan kaniadto, usa ka dako nga punoan sa maple

ang nahagbong ug nagtak-op sa driveway—eksakto ra gayud kon asa ang akong sakyanan kaniadto. Apan ang sakyanan nga akong gibutang dapit sa sagbot, wala gayud matandog. Kon wala to siya nabalhin didto, siguradong nadaot ug naguba ang sakyanan.

Siyempre, kami ni Drenda maoy ehemplo sa unsay dili angay buhaton pag-abot sa kwarta. Apan ang among gikinahanglan lang mao ang pipila ka tinagong estratehiya ug kaalam aron mapahimutang kami nga mas taas kay sa among kahimtang. Karon, makapahiyom na lang ko kay ang among programa sa telebisyon, nga makita sa tibuok kalibutan, nga gitawag og *Fixing the Money Thing!*

Higala, ania ang imong destinasyon karon.

*Mga huyang sila apan nahimong kusgan; gambanan sila sa pakig-away ug gibuntog nila ang mga kasundalohan sa mga langyaw* (Hebreo 11:34b).

Ang lisod ug imposibleng mga butang dili na lisod ug imposible kon mahibal-an nimo ang tubag!

**MAKASALIG KA SA  
BALAANG ESPIRITU  
NGA MOTABANG UG  
MAGGIYA KANIMO  
SA TANANG MATANG  
SA SITWASYON.**



## KAPITULO 9

# ANG MAHINAY NGA GAMAY NGA TINGOG

Sa dihang magsugod ako sa pagtudlo mahitungod sa tingog sa Balaang Espiritu, daghang mga tawo ang moingon kanako nga wala pa sila makadungog sa tingog sa Dios. Apan kanunay kong isulti kanila, “Oo, nakadungog na kamo!” Kon nakabati ka og parehas sa kadaghanan nga wala pa ka makadungog sa tingog sa Dios, palihug ablihi ang 1 Hari 19:11–12.

*Ug ang Ginoo miingon, “Gula ug tindog sa bukid sa atubangan sa Ginoo, kay ang Ginoo moagi.”*

*Unya, may kusog ug gamhanang hangin nga mitumpag sa mga bukid ug midugmok sa mga bato sa atubangan sa Ginoo, apan ang Ginoo wala diha sa hangin. Human sa hangin, may linog, apan ang Ginoo wala diha sa linog. Human sa linog, may kalayo, apan ang Ginoo wala diha sa kalayo. Ug human sa kalayo, may usa ka mahinay nga tingog.*

1 Hari 19:11–12.

Bisan tuod nakadungog na ako sa tingog sa Balaang Espiritu sa nagkalain-lain kakuog, kasagaran nga tingog sa Balaang Espiritu usa ka mahinay nga tingog. Kini mao ang gamay, hilum nga tingog. Sama

sa akong giingon sa unang bahin niining libro, kasagaran, ang tingog sa Dios daw sama lang sa usa ka hunahuna nga may lahi nga timpla. Sama sa imong abilidad sa pag-ila sa tingog sa imong kaugalingong anak sa taliwala sa daghang mga tawo, makaila usab ka sa Balaang Espiritu ug sa iyang tingog kon siya mosulti. Apan niining kapituloha, gusto kong hisgutan ang usa ka matang sa tingog sa Dios nga kasagaran dili hunahunaon sa kadaghanan, apan nadungog sa tanan.

Samtang nag-eskwela ko sa Oral Roberts University, nakakuha ko og daghang kurso sa teyolohiya tungod kay ang akong major mao ang Daang Tugon. Daghang impormasyon nga wala pa nako natun-an kaniadto—sa tinuod lang, kasagaran niato bag-o gayud para kanako. Tungod sa akong kakulang sa maayong pamatasan sa pagtuon, kay akong gisalikway ang pag-eskwela sa high school, nakasinati ko og dako nga presyur aron makaapas ko labi na sa panahon sa final exams.

Sa usa sa among klase, gipasulat kami og usa ka pormal nga papel bahin sa usa ka hilisgutan sa Daang Tugon—nga karon, wala na gani ko makahinumdom kon unsa kini nga hilisgutan. Apan ang pagsulat og mga papel makapahadlok kanako. Sa akong unang tuig sa kolehiyo, nakasulat ako sa akong unang research paper, ug sa dihang gibalikan nako kini, aduna kini’y usa ka dako nga ‘F’ sa atubangan gamit ang pula nga tinta, uban sa mga pulong nga nag-ingon, “Posible ba nga nakahuman ka og high school?” Ang akong pag-Inglis ug grammar grabeng kaguba nga nakurat ang magtutudlo kon giunsa ko pagsulod sa ORU. Kinahanglan k’g tabang sa akong Inglis aron lang molampos sa akong unang tuig.

Karon, uban ang pressure sa finals week, aduna na usab koy laing papel nga kinahanglan ipasa. O, ako gyud gi-kahadlokana kana nga proyekto. Misulay ko og lingkod aron magsulat, apan wala gayud ko matudluan kon unsaon pagbuhat og usa ka maayong sulat. Busa ang ang akong buhaton mao ang pagpangita og mga gisulat nan ga kasayuran, unya akong kopyahon ang mga pulong ug akong usabon

gamay aron dili mailhan nga kasagaran sa akong sinulat gikan lang sa lainlaing basahon. Limpyo ang akong konsensya tungod kay wala man nako kini tan-awa isip sayop. Gisulat ko man pag-usab ang akong nabasahan aron mahimo kini nga mura na'g akong kaugalingong pulong. Apan ang tinuod nga kamatuoran mao nga dili gyud ko kabalo unsaon pagsulat og tarong nga mga istorya.

Karon, niining higayona, wala na gyud koy oras. Adunay usa ka higala nako sa pikas kwarto nga nagkuha usab sa maong klase, pero sa lain nga oras. Ang tanang estudyante sa klase gipasulat og papel bahin sa parehas nga hilisgutan. Busa akong gipangutana ang akong higala kon makatan-aw ba ko sa iyang papel aron makakita ko kon giunsa niya kini paghimo. Apan, sa dihang anaa na nako ang iyang papel, nasayod ko nga dili ko makahimo og parehas ka maayo nga sinulatan sama sa iyaha, busa nakahukom ko nga kopyahon kini. Kabalo ko, kabalo ko—nahingangha ka. Hinumdumi, bag-o pa lang gyud ko nga Kristohanon niadtong panahona. Wala man nako gikopya ang tibuok niyang papel, pero halos katunga sa iyang sinulat akong gisulat diretso sa akong papel. Sa kataposan sa finals week, akong gihatag ang maong papel sa akong propesor, ug nakaginhawa ko kay humana na ang kasamok sa pagsulat. Apan, adunay nahitabo nga nagtudlo kanako og bililhong leksyon mahitungod sa pagpaminaw sa tingog sa Dios.

Pagkatulog nako niadtong gabhiona, dili ko makatulog. Ang akong konsensya nagasinggit og kusog nga dili ko mahimutang. Nasabtan nako nga sayop ang akong nabuhat—nakapangawat ko ug nakapamakak. Wala usab nako girespeto ang akong higala ug napakaulawan ko siya. Grabe ang akong pagbati! Sa pagka alas 3:00 sa buntag, milakaw ko padulong sa kwarto sa akong higala, ako siyang gipukaw, ug gisulti ko kaniya ang akong nabuhat. Nangayo ko og pasaylo kaniya. Gitan-aw ko niya gamit ang iyang katulogon nga mga mata ug miingon lang, “Balik na sa imong higdaanan, Gary.” Dayon mitalikod siya ug nagpadayon og katulog.

Pagkasunod adlaw, miadto ko sa akong propesor ug mitug-an sa akong nabuhat. Siyempre, kinahanglan niya nga hatagan ko og F alang sa maong papel, apan mipahiyom siya ug miingon nga iyang gi-appreciate nga mitug-an ko kaniya. Unya miingon siya nga tungod kay miadto ko niya, ihatag gihapon niya kanako ang grado nga B alang sa tibuok tuig sa klase. Nakaginhawa ko, ug mas maayo ang akong gibati kay nahilom na ang tingog sa akong konsensya. Nakabaton ko og kagawasan ug kalinaw.

Busa, tugoti ko sa pagpangutana kanimo: “Ngano nga ang akong higala nakatulog lang balik samtang ako nag-antus sa emosyonal nga kasakit? Ngano nga dili siya parehas kanako nga nag-antos usab? Ngano nga dili ko makatulog ug nganong grabe ang akong gibati?” Adunay

**ANG KONSENSYA MAO  
ANG TINGOG SA DIOS  
SULOD SA MATAG LALAKI  
UG BABAYE—USA KA  
TIMAAN SA MAGBUBUHAT  
UG SA IYANG MGA SUGO  
ARON MABUHI KITA  
SUMALA SA KATUYUAN  
NGA IYANG GIHATAG  
KANATO.**

tingog nga nagsulti kanako matag higayon nga mosulay ko’g katulog. Kini mao ang nagbadlong kanako—kini mao ang akong konsensya! Ang kahulugan sa konsensya mao kini: usa ka natural nga kahibalo sa insakto ug sayop. Ang pulong mismo nagpasabot og “nakahibalo sa” o “adunay kahibalo mahitungod sa usa ka butang.”

Ang konsensya sama sa kandila nga nagadan-ag sa kangitngit. Kini nagtipig sa tanang hunahuna ug buhat

nga atong gihimo, sama sa usa ka testigo sa korte. Kini nagapahinumdom kanato sa pagbuhat sa hustong butang ug paglikay sa sayop. Ang konsensya mao ang tingog sa Dios sulod sa matag-usa. Ang konsensya nagatawag sa matag lalaki ug babaye sa paghatag ug husay sa ilang mga buhat. Sama sa korte, kini nagasugo sa matag-usa sa paghatag og kasayuran atubangan sa Dios. Sama sa usa ka testigo nga gitawag aron

maghatag og ebidensya, ang atong konsensya magapanalipod kanato (magadepensa) o magkondena kanato (magaakusa).

Usa ka pagtuon nga gibuhat sa Medical Xpress nagpamatuod niining mga kamatuoran:

“Ang kasagarang panglantaw sa kalamboan sa tawo mao nga nagsugod kita sa kinabuhi nga blanko pa moral nga kahimtang, apan ang bag-ong pagtuki mipakita nga kini dili tinuod. Nakaplagaan sa mga nagsuta nga bisan ang mga masuso nga anaa sa unom pa ka bulan ang edad makahimo na og moral nga paghukom. Naghunahuna sila nga posible nga natawo na kita nga adunay nakapahimutang nga moral nga kodigo sulod sa atong utok.”

*Sa ingon niini, mahibaloan nato nga anaa kita sa kamatuoran, ug takos na kita nga moatubang sa Dios nga walay kahadlok bisan kon sa atong hunahuna angayan gayod unta kita nga silotan. Kay nahibaloan nato nga ang Dios labaw pa sa atong hunahuna, ug nahibaloan niya ang tanan. Minahal nga mga higala, kon ang atong mga kasingkasing wala maghukom batok kanato, kita adunay kasaliganan sa atubangan sa Dios ug makadawat gikan kaniya sa bisan unsa nga atong pangayoon, tungod kay atong gituman ang iyang mga sugo ug gibuhat ang makapahimuot kaniya.*

—1 Juan 3:19-22

Ang konsensya mao ang tingog sa Dios sulod sa matag lalaki ug babaye—usa ka timaan sa Magbubuhat ug sa iyang mga sugo aron mabuhi kita sumala sa katuyuan nga iyang gihatag kanato. Walay bisan kinsa nga makalingkawas sa ilang konsensya. Sa una, nakapahibulong kanako nga adunay mga kriminal nga nakalikay sa balaod—sama sa mamumuno o tulisan—nga kalit lang nga modangop ug mosurender. Apan karon, nasayod ako nga walay mas bug-at nga silot kay sa usa

ka konsensya nga nagasilot ug nagasumbong sa usa ka tawo nga siya sad-an! Si Pablo miingon sa 2 Corinto 1:12 nga ang konsensya nagpamatuod, nagasulti.

*Mao kini ang among gipasigarbo: Ang among konsensya nagapamatuod nga nagkinabuhi kami nga matarong ug wala gayoy ikasaway dinhi sa kalibutan, ilabi na sa among pakigrelasyon kaninyo, sa pagkabalaan ug sa pagka sinsero nga nagagikan sa Dios. Wala namo kini buhata sumala sa kaalam sa kalibutan, apan sumala sa grasya sa Dios.*

—2 Corinto 1:12

Mahimong moingon ka, “Sa unsang awtoridad namulong ang konsensya? Ngano nga ang iyang pagpamatuod molampos sa espirituwal nga hukmanan?” Tungod kay kini mao ang tingog sa Dios. Si Pablo, sa Roma 2:14-15, nagasulti usab nga ang konsensya padayong nagapamulong kanato.

*(Tinuod, kon ang mga Gentil nga walay balaod magabuhay, sumala sa ilang kinaiya, sa mga butang nga gikinahanglan sa balaod, sila mao ang ilang kaugalingong balaod, bisan pa wala sila’y balaod, tungod kay ilang gipakita nga ang mga sugo sa balaod nahasulat sa ilang mga kasingkasing, ug ang ilang konsensya nagapamatuod, ug ang ilang mga hunahuna usahay nagaakusa kanila, ug usahay nagaprotekta kanila.)*

—Roma 2:14-15

Ang tanan adunay konsensya. Basin moingon ka nga wala. Aduna siguro kay nailhan nga mura’g wala nay pagbati. Apan nakasiguro ko nga wala sila nagsugod nga ing-ana. Kon ang usa ka tawo magpadayon sa pagsupak sa tingog sa ilang konsensya, kadugayan, kini magkahilom

ug magkahilom.

*“Ang maong mga pagtulon-an nagagikan sa mga tigpakaaron-ingnon nga bakakon, nga ang ilang konsensya nakaging na nga sama sa puthaw nga nagbaga.”* (1 Timoteo 4:2)

Si Pablo nag-ingon nga kining mga tawo nakaging na ang ilang konsensya, o nahimong dili na sila makabati o makapaminaw sa ilang konsensya tungod sa ilang pagpatig-a sa ilang mga kasingkasing batok niini. Sama sa imong panit. Kon mapaso kini, dili kini makabati hangtod nga motubo ang bag-ong panit ug mapaknit ang daan nga nagahi. Mao usab kini sa atong konsensya. Dili kini makapugos kanimo sa pagbuhat og bisan unsa—nagapamulong lang kini. Mahimo nimong balibaran o supakon kini. Apan nagpasidaan si Pablo nga kon pasagdan nimo ang imong konsensya, mahimo kini makadala og dako nga kadaot kanimo; o, sama sa giingon ni Pablo, mahimong makaguba sa imong kinabuhi sama sa barko nga nadisgrasya.

*Timoteo, anak ko, hatagan ko ikaw og tambag subay sa mga panagna nga gipanulti bahin kanimo, aron pinaagi niini, makig-away ka sa maayong panagsangka, magapadayon sa pagtuo ug maayong konsensya. Ang uban nagbiya niini, hinungdan nga naguba ang ilang pagtuo.*

—1 Timoteo 1:18-19

Ang mga tawo nga nakaging na ang ilang konsensya wala na makapadayon sa husto nga dalan sa ilang kinabuhi. Ang ilang kompas nadaot ug dili na molihok og tarong. Dili na sila makahibalo kon asa sila paingon. Si Pablo nag-ingon nga kinahanglan nga magapadayon kita sa maayong konsensya, nga limpyo, aron masiguro nga kita naglawig nga husto. Tungod kay mahimo natong pabugnawon ang

atong mga kasingkasing ug madaot ang atong pagbati sa kon unsay husto ug sayop. Giingon ni Pablo nga importante ang pagsunod sa balaod ug pagbuhat sa matarong.

*“Busa, kinahanglan nga mopailalom kamo sa mga awtoridad, dili lang tungod sa silot nga posibleng madawat, apan usab tungod sa konsensya”* (Roma 13:5).

Kon supakon nimo ang balaod, ang imong konsensya magakondena kanimo. Mao nga si Pablo nag-ingon nga kinahanglan magtuman sa balaod ug magbuhat sa husto aron ang imong konsensya magpabiling malumo ug mabination, ug magapadayon sa paglihok sumala sa gidisenyo sa Dios—aron mapanalipdan ka gikan sa kadaot.

Mahitungod sa konsensya, mahinumduman ko ang usa pa ka binuang nga butang nga akong nabuhat nga makapadayag niining maong prinsipyo. Nahitabo kini sa wala pa ko magpastor. Makasabut mo kon ngano nga wala pa ko gitugotan sa Dios nga magpastor human ninyo madungog ang istorya. Kini nga istorya naghisgot sa usa ka sakyanan nga akong gipanag-iya kaniadto. Usa kini ka Peugeot 505 coupe nga akong gihigugma pag-ayo. Usa ka adlaw, samtang naghunong ko sa stoplight, adunay lalaki nga nakabangga sa akong likod. Naguba ang akong trunk, nayupi ang frame, ug aduna pay laing kadaot sa lawas sa sakyanan tungod sa maong disgrasya. Miabut ang insurance agent sa maong lalaki nga nakabangga kanako aron susihon ang sakyanan ug hatagan ko og estimate. Apan sa dili pa ko mosulti kon unsa ang nahitabo sa iyang pag-abut, kinahanglan kong isulti nga pipila ka semana sa wala pa kini nga disgrasya, nahugno na ang akong muffler. Ang sunroof motor, nga anaa sa luyo sa sakyanan, mihunong usab sa paggana pipila ka semana sa wala pa moabut ang agent aron iproseso ang claim. Sa dihang miabut ang insurance agent aron mag-

inspeksyon sa sakyanan, nangutana siya kanako kon ang muffler—nga akong gibutang sa yuta tapad sa sakyanan aron makita niya—kabahin ba sa disgrasya. Nakabati ko og kagulkol sa akong konsensya apan miingon ko, “Oo, Sir.” Dayon, nangutana siya kanako kon ang sunroof motor nga wala na usab ninggana kabahin ba sa maong disgrasya. Pag-usab, miingon ko, “Oo.”

Sa akong espiritu, nabati nako nga ang akong konsensya nagasinggit, “Gary, unsa man ang imong gibuhat? Namakak ka!” Karon, paminawa kon giunsa nako paglimbong ang akong kaugalingon. Mahinumduman ko gayud nga naghunahuna ko nga pasagdan lang ang maong tingog, og nag-ingon sa akong kaugalingon nga mawala ra kini. Karon, dili ko makatuo nga naghunahuna ko og ingon ana kaniadto. Wow, dili ba ka malipay nga wala pa ko magpastor og iglesia nianang panahona? Sigurado ko nga nalipay gayud ang Dios!

Bisan pa niana, gidala ang sakyanan sa body shop, ug human sa usa ka semana o labaw pa, gitawagan ko aron kuhaon na kini. Sa dihang nakita nako ang akong sakyanan didto sa body shop, nalipay ko pag-ayo. Hingpit na gyud kini! Gidala ko kini pauli, malipayong nagpasalamat nga naayo na ang tanan. Paglabay og usa ka semana o labaw pa, nakahukom ko nga mopauli aron maniudto uban ni Drenda ug sa mga bata. Ang balay mga duha ra ka milya ang gilay-on gikan sa opisina nga akong giabangan para sa akong kompanya sa pinansyal. Pag-abot nako, miparada ko duol sa pultahan sa balay, misulod, ug nangaon kami og usa ka maayo nga paniudto.

Samtang ningbiya ko sa balay ug naglakaw padulong sa pultahan, napansin nako nga wala na didto ang akong sakyanan. Nabalaka ko. Asa man niadto ang akong sakyanan? Nanglingi-lingi ko ug dayon nakita nako kini. Ang among balay naa sa ibabaw sa usa ka bungtod, ug sa akong pagtan-aw, nalimtan nako pagbutang og brake. Bisan tuod wala pa ko nakahimo og ingon niana kaniadto, sigurado nga nabuhat ko kini karon kay ang sakyanan midagan paatras sa taas nga

driveway ug nabangga sa usa ka kahoy. Sa akong paglakaw padulong sa sakyanan, nabati nako ang kakurat. Naigo pag-usab ang trunk, ug ang kadaot eksaktong pareho sa nahitabo sa una nga bangga sa wala pa kini giayo. Ang frame napiko sama sa kaniadto, ang muffler nahulog, ug ang sunroof motor wala na usab nagaandar. Ang tanang kadaot sama ra gyud sa wala pa kini gipaayo sa repair shop!

Samtang nagbarog ko didto, kalit lang ko nakasabot ug misugod og katawa. Gitudloan ko sa Dios og usa ka leksyon—usa ka butang nga kinahanglan makat-onan niining batang magwawali sa dili pa siya mahimong mangulo sa mga katawhan. Wala na gayud nako giparepair pag-usab ang sakyanan. Gibaligya ko na lang kini ingon nga pangpiyesa. Mahinumduman ko nga kausa ra sa akong kinabuhi nga ang akong konsensya misinggit kanako sa ingon ka kusog aron pugngan ko sa akong gibuhay. Gitawag ko kana nga ‘ang istorya sa bisikleta.’

Nanghinaut ko nga makatabang kini kanimong. Nahibalo ko, basin wala ka nagdahom nga makahimo ako og ingon niini nga mga butang, apan nasayop ka kon naghunahuna ka niana. Nalipay lang gyud ko nga naluwas ko, kay nagtuo ko nga lahi ra gyud unta ang dagan sa akong kinabuhi kon wala.

Ang istorya sa bisikleta nahitabo pipila ka tuig human sa akong giistorya kanimong karon, ug oo, bag-o pa lang ko nagsugod sa pagpastor sa among bag-ong iglesia. Niadtong usa ka Sabado sa hapon, nagbiya ko sa balay sa akong amahan ug nagsugod og atras gamit among silver Dodge Caravan padulong sa duha-ka-lane nga dalan nga atbang sa iyang balay. Ang balay sa akong amahan anaa sa ubos sa usa ka dili kaayo taas nga bungtod nga anaa sa duha ka kilid sa iyang driveway. Sa wala damhang rason, wala ko makakita sa usa ka nagbisikleta nga nagpadulong gikan sa bungtod. Hinay akong pag-atras, ug wala siya sa akong luyo, apan tungod sa iyang kusog nga momentum paglusad sa bungtod, nakaapas siya kanako eksakto sa dihang gibalhin ko na kambyada sa pagpaabante.

Sa tibuok panahon, wala gayud ko makabantay kaniya, apan kalit lang nakong nadunggan ang kusog nga BAM, BAM, BAM sa kilid sa van. Mitan-aw ko sa rearview mirror, ug didto nako nakita ang nagbisikleta sa akong luyo—ang duha niya ka kamot nagguni sa ako handle bar ug gisinyasan ko og binastos sa iyang mga tudlo samtang iya kong gitunglo sa iyang mga pulong. Natingala ko ug nabati ko nga giinsulto ko pag-ayo—ngano man nga kini nga tawong nagbisikleta nagbinuang og ingon niana? Nahibalo ko nga sayon ra unta niya ang pagpahinay samtang nagpaubos siya sa bungtod ug nakita akong nag-atras. Nahibalo usab ko nga kon gusto lang niya, makalikay ra unta siya kanako ug magpadayon sa iyang sagad nga kakusog paubos. Apan imbis nga buhaton kana, gipili niya nga magpakita og kasuko.

Nahingangha gyud ko nga nagtuo siya nga makasukol siya sa usa ka sakyanan. Nahuna-hunaan ko nga kinahanglan matudluan ni nga hambugero og leksyon. Busa, naghinay ko og padagan ug nagpahulat nga makaduol siya sa van, unya kalit nako gitumban ang brake. Nakabati ko og gamayng katagbawan samtang nakita ko siyang nagdali og kumot sa iyang brake, nagpaningkamot nga dili mabangga sa likod sa akong van. Apan, maoy hinungdan nga misamot siya’g kasuko ug mibuto sa usa ka walay puwas nga pagpangyaw-yaw nga wala pa nako madungog sukad sa akong kinabuhi. Iya kining gipadayon.

Hinay-hinay akong nagpadagan sa dalan ug midiretso og atras sa usa ka driveway aron ang akong van mag-atubang sa karsada. Nahimutang kini sa usa ka anggulo, nga nag-atubang sa nagbisikleta nga nagpadulong kanako. Sa dihang nakita niya nga naghulat ko kaniya, nakaatubang siya sa akong van, kalit lang siya nahilom. Sa akong huna-huna, nakahinuklog na gyud tingali siya nga bisikleta lang iyang gisakyan ug ang sakyanan mas dako pa. Gipaubos nako ang bintana ug naghulat nga makaabot siya. Sa dihang hapit na siya, misinggit ko kaniya, “Kon makita pa taka niining dalana, ligsan taka!” Sa dihang nakasulti ko niana, gipalihok ko dayon ang van, nga direktso nga nag-

atubang kaniya sa mga 15 piye ang gilay-on. Nabati ko nga ang van nasanggid sa iyang bisikleta samtang hapit ko siyang banggaan. Nabati nako ang gamayng katagbawan. *natudluan ko gyud siya*, sa akong hunahuna, apan sa dili dugay.

Gikan gyud sa akong espiritu, nadunggan nako ang Balaang Espiritu nga misulti sa usa ka kusog ug may awtoridad nga tingog, “Gary, unsa may imong ginabuhay?” Ang pagpakita niini nga mga pulong dili makahatag og hustisya para kanako. Kalit lang ko nakamatngon—pwede unta nako siyang mapatay! Mitan-aw ko balik sa akong rearview mirror, ug didto siya, naglihok nga hinay kaayo, nakaduko, murag napangos o nakurat nga buhi pa siya. Wala ko kasiguro. Nagpadayon ko sa pagbiyahe, apan ang akong konsensya wala gayud mohunong sa pagpanghilabot kanako. Isip usa ka bag-ong pastor, nakamatikod ko sa posibleng mahitabo. Makita nako ang balita sa diyaryo: “Pastor sa Faith Life Church nakabangga og nagbisikleta tungod sa kasuko.” Gipahinumduman ko sa Balaang Espiritu nga para sa mga tawong sama kaniya ang hinungdan nganong gitawag ko sa Dios aron magsugod og iglesia niana nga komunidad. Nahingangha ko sa akong kaugalingong gibuhat, ug sa kasubo mipaubos ko sa akong kaugalingon, naghinulsol atubangan sa Ginoo uban sa mga luha.

Busa, mouyon na ta nga nakadungog ka na, sa tinuod lang, sa tingog sa Dios kaniadto. Apan gusto nimo nga magpabiling mahumok ang imong konsensya ug dili kini pagahi-on, aron kanunay ka makadungog sa Dios. Ang Bibliya nag-ingon nga gipatig-a sa mga Israelita ang ilang kasingkasing batok sa Dios, ug tungod niana wala gayud sila makaangkon sa Yutang Saad. Gipahimangnoan kita sa manunulat sa Hebreohanon, nga isip mga magtotoo sa Bag-ong Tugon, nga dili nato sundon ang ilang ehemplo.

*Busa, sumala sa gisulti sa Balaang Espiritu: “Karon, kon madungog ninyo ang Iyang tingog, ayaw pagpagahi sa inyong*

*kasingkasing, sama sa inyong gihimo sa panahon sa pagrebelyon, niadtong panahon sa pagsulay sa kamingawan.”*

—Hebreohanon 3:7-8a

Kini nga pahimangno gibalik-balik sulod sa kapitulo tres ug kwatro sa makatulo. Ngano man? Tungod kay gusto sa Dios nga panalanginan ka ug nga maangkon nimo ang tanan nga gibayran ni Jesus para kanimo.

Ang pagpagahi sa kasingkasing nakapahinumdom kanako sa akong kabayo nga akong gipadako gikan sa pagkabata. Siya ang pinakamaldito nga hayop nga akong nakita—ug tuso pa gyud. Ako ra ang nakasakay kaniya, o sa mas klaro, ako ra ang nakasulay sa pagsakay kaniya. Usa ka adlaw, anaa koy higala nga niingon nga hilig siya og kabayo ug kahibalo siya mudala sa bisan unsang kabayo. Namugos siya nga gusto niyang sakyan si Tony, ang akong kabayo (mao kana ang iyang ngalan). Pagkahuman sa dugay nga paghangyo, ako siyang gipa-uyonan. Gisal-otan ko og silya si Tony, ug si Jackie, mao ang ngalan sa akong higala, nga mosakay.

Dili gyud ko makalimot kon unsay nahitabo. Paglingkod pa lang ni Jackie sa silya, milayat dayon si Tony og dagan—diretso nga nagdagan padulong sa gamay nga lanaw nga mga 50 ka yarda ang gilay-on gikan sa among balay. Si Jackie nangusog og pugong sa pisi, nagsinggit aron mohunong si Tony, apan wala siya tagda sa kabayo. Kusog kayo ang iyang dagan, pag-abot sa daplin sa tubig, kalit lang si Tony mihunong, dinuko ang iyang ulo, ug si Jackie nalabay direktso sa lanaw. Si Tony

**BUSA, SUMALA SA  
GISULTI SA BALANG  
ESPIRITU: “KARON,  
KON MADUNGOG NINYO  
ANG IYANG TINGOG,  
AYAW PAGPAGAH SA  
INYONG KASINGKASING,  
SAMA SA INYONG  
GIHIMO SA PANAHON  
SA PAGREBELYON,  
NIADTONG PANAHON  
SA PAGSULAY SA  
KAMINGAWAN.”**

—HEBREOHANON 3:7-8A

milingi lang, dayon mipadayon og pangibot og sagbot, mura'g wala ra gyuy nahitabo.

Kita ninyo, si Tony gikawhayan na og pisi sa kadugayng pagpugong kaniya, nga wala na siya makasabot sa kasakit niini. Napanglugos na ang iyang baba, busa dili na siya maminaw kon hatakan siya sa pisi. Ingon nga gamayng kabayo, wala gyud siyay kapuslanan alang sa uban gawas lang kanako. Nganong ako ra? Kay tuso man siya! Ako ma'y nagpakaon kaniya, ug nakakat-on siya nga ang bugtong paagi aron makagawas siya sa kural—aron makaginhawa og preskong hangin ug makakaon og lab-as nga sagbot—mao ang pagtugot kanako nga mosakay kaniya. Apan kinahanglang bantayan ko siya kanunay. Nagalakaw siya nga nakiling ang ulo sa usa ka kilid, aron makakita siya nako samtang nagsakay ko kaniya. Naghulat siya nga ibali nako ang akong ulo sa pikas direksyon. Kon mahitabo na kana, dali dayon kab-uton ang akong tiil ug ingkibon. Ug ingnan ta mo nga sakit pod, busa kanunay ko siyang bantay-bantayan. Apan kon hisgotan ang kapuslanan? Wala gyud siyay gamit.

Ug kon atong tugotan nga pagahion ang atong kasingkasing, mahimo kitang walay kapuslanan sa Dios, sama ni Tony. Usa ka higayon, gihigot namo si Tony sa gawas gamit ang usa ka kadena. Ang akong papa nagbubo ug tubig para kang Tony. Apan sa naglakaw na palayo ang akong papa, si Tony kalit lang mikamang ug gitukob ang lubot sa akong papa! Kabalo mo sa resulta, akong papa wala pa maluwas atong panahona—ug init siya og dugo. Adunay dakong bloke sa asin nga anaa sa tupad sa balde sa tubig, ug gihapak niya kini og kusog ngadto kang Tony! Apan si Tony buhi gihapon! Nagsalig ba ko kang Tony? Dili na gyud!

Mao kana ang mahitabo sa kinabuhi sa mga tawo. Naghunahuna sila nga sa makausa lang sila mosupak, mosupak sila sa ilang konsensya sa makausa, apan wala sila makamatikod nga sa matag higayon nga

ilang buhaton kana, manubo ang kubal. Ug sa paglabay sa panahon, mahimo silang sama kang Tony—dili na makabati og kasakit o pagbasol, bisan pa kon ilang supakon ang Dios o dili buhaton ang Iyang gisugo. Ang solusyon mao ang hinanaling paghinulsol sa higayon nga imong masabtan nga mibabag ka batok sa imong konsensya!

Ang Salmo 51 gisulat ni Haring David human siya nagpakasala uban kang Bathsheba. Kini usa ka salmo sa paghinulsol.

*Magmaluloy-on ka, O Dios, sumala sa Imong walay puas nga gugma; sumala sa Imong dakong kaluoy, tangtanga ang mga sala nga akong nabuhat. Hugasi ang tanan kong dautang binuhatan ug limpyohi ako gikan sa akong mga sala. Kay nasayud ako sa akong mga salang nabuhat, ug ang akong sala anaa sa akong atubangan. Batok Kanimo, Kanimo ra, nakasala ako ug nagbuhat sa malimbungon nga butang sa Imong pananaw, busa husto Ka sa Imong pagsulti ug matarung Ka sa Imong paghukom. Sigurado nga nagpakasala ako sukad sa akong pagkatawo, makasasala gikan sa dihang ang akong inahan nagmabdos kanako. Sigurado nga gusto Ka og kamatuoran sa sulod nga bahin sa akong kasingkasing; nagtudlo Ka kanako og kaalam sa pinakasilong nga dapit. Limpyohi ako gamit ang hisopo, ug ako mahimong malimpyo; hugasi ako, ug ako mahimong puti kaysa niyebe. Tugoti nga madungog nako ang kalipay ug kalinaw; magmalipayon ang mga bukog nga Imong gidugmok. Itago ang Imong nawong gikan sa akong mga sala ug tangtanga ang tanan kong mga dautang binuhatan. Himuang putli ang akong kasingkasing. O Dios, ug ibalik ang maligon nga espiritu sa sulod nako. Ayaw ako isalikway gikan sa Imong presensya o kuhaon Mo ang Imong Balaang Espiritu gikan kanako. Ibalik kanako ang kalipay sa Imong kaluwasan ug hatagi ako og andam nga Espiritu, aron magpabilin ako.*

—Salmo 51:1-12

*Wala ka malipay sa sakripisyo, kay ako magahatag unta niini; wala ka malipay sa mga halad nga sunog. Ang mga halad sa Dios mao ang usa ka mapainubsanon nga espiritu; usa ka mapainubsanon ug mahinulsolon nga kasingkasing, O Dios, dili Ka mosalikway.*

—Salmo 51:16-17

Si David nagapanawag sa Dios aron maghimo og usa ka malimpyo nga kasingkasing, usa ka mapainubsanon nga espiritu, usa ka nagbasol nga kasingkasing. Sa simpleng pagsulti, si David nagpasabot nga gusto siya og kasingkasing nga makabati pa. Apan si David dili unta makasulod sa kasamok nga iyang naagian kon siya naminaw sa iyang konsensya. Busa hinumdumi, kon imong supakon ang imong konsensya, imong ginapagahi ang imong kasingkasing, ug mahimong sayon na ang pagbuhat niini sa sunod, ug sa sunod, ug sa sunod ug hangtod nga dili na nimo madungog ang tingog sa Dios.

Ang konsensya usa ra sa mga paagi nga madungog nato ang Dios. Siyempre, ang Balaang Espiritu nagapanulti diretso sa atong kinabuhi pinaagi sa mando ug direksyon. Ug sama sa akong gisulti, nadungog nako ang Balaang Espiritu nga nagatul-id kanako gamit ang usa ka kusog ug tingog nga adunay awtoridad ingon man usab ang hilum ug gamay nga tingog. Nadungog usab nako Siya nga nagapanulti pinaagi sa mga damgo ug mga panan-awon, nga akong hisgutan sa sunod nga kapitulo. Apan niini nga kapitulo, atong nahibal-an nga kon gusto nato madungog ang Dios, kinahanglang magpabiling limpyo ang atong konsensya gikan sa mga pagsaway ug magdali ta sa paghinulsol aron mapabilin kini nga malumo ug humok aron madungog nato ang iyang tingog!

## KAPITULO 10

# MGA PANAN-AWON UG MGA DAMGO

Kalit kong mibangon sa higdaanan ug akong giingnan si Drenda, “Buntis ka ug babayeng bata!”

Sa among lima ka mga anak, usa ra gyud ka beses nga gisulti sa Dios kanamo ang kasarian sa bata—si Polly, among ikaupat nga anak. Nagtuo ko nga gisulti kini sa Dios aron mapalig-on ang among pagtuo tungod kay ang among pamilya nadisgrasya sa sakyanan samtang nagburos si Drenda kang Polly sulod sa unom ka bulan. Nagbiyahe mi sa usa ka duha-ka-linya nga dalan sa tulin nga 55 ka milya matag oras, dihang kalit nga may usa ka sakyanan sa usa ka batan-ong lalaki ang mipara og pinakalit sa among dalan. Wala nay panahon aron mohunong, ug nabangga namo ang iyang sakyanan. Wala may grabeng naangol, apan gidala kaming tanan sa ospital. Si Drenda, nga buros, nakasinati og hubag sa seatbelt ug naapektohan ang iyang tiyan. Nagkabalaka siya mahitungod kang Polly. Apan tungod kay gisulti na sa Dios kanamo ang mahitungod kang Polly, nakabati kami og kalinaw ug nasayod nga luwas siya—ug tinuod, luwas gayud siya.

Mahitungod pod kang Polly, nahinumdom ko sa dihang siya, isip usa ka asawa, nga buntis sa ilang unang anak. Si Drenda ug ako kinahanglang mogawas sa nasod para sa usa ka business trip. Apan, ang

petsa sa pagpanganak ni Polly natungnan sa among pagbiyahe. Kon kaila ka ni Drenda, nasayod ka nga dili gayud siya gustong mopakyas sa pagpanganak sa usa sa iyang mga anak nga babaye. Busa, naghunahuna mi kon kanselahon ba namo ang biyahe. Nag-ampo ko mahitungod niini, ug misulti kanako ang Balaang Espiritu nga sayop ang gi-estimang petsa sa pagpanganak—matawo ang bata pagkasunod adlaw human namo mopauli. Gisultihan ko si Drenda sa giingon sa Ginoo, ug nagpadayon kami sa among biyahe. Pabalik namo sa balay, nisugod sa pagpanganak si Polly eksakto sa petsa nga giingon sa Ginoo. Natawo si Ivory, among bag-ong apo, sa husto gyud nga panahon.

Kini nga mga panghitabo maoy mga pananglitan sa pagpamulong sa Balaang Espiritu kanamo mahitungod sa mga isyu sa kinabuhi, diin ang mga pulong sa Balaang Espiritu motungha gikan mismo sa atong espiritu. Apan, aduna pay ubang paagi nga gigamit sa Balaang Espiritu sa pagsulti kanamo, ug angay natong mahibal-an kini.

*Ug pagkahuman, ibubo Ko ang Akong Espiritu sa tanang katawhan. Ang inyong mga anak nga lalake ug babaye magapanagna, ang inyong mga tigulang magadamgo ug mga damgo, ug ang inyong mga batan-on makakita ug mga pananawon. Bisan sa Akong mga ulipon, nga lalake ug babaye, ibubo Ko ang Akong Espiritu niadtong mga adlaw.*

—Joel 2:28–29

Si propeta Joel miingon nga moabut ang adlaw nga ibubo sa Dios ang Iyang Espiritu sa tanang katawhan. Nabuhi kita karon niining panahona. Sa Adlaw sa Pentecostes, ang Balaang Espiritu miabot sa mga nagpaabot sa ibabaw nga lawak. Sa dihang nakita sa katawhan ang mga nagpaabot didto nga nagasulti og laing mga pinulongan ug nagadayeg sa Dios, nagtuo sila nga nahubog sila ug nangutana, “Unsay pasabaot niini?” Si Pedro mitindog aron pasabton ang mga katawhan.

*Unya mitindog si Pedro uban sa Napulo’g Usa, mipataas sa iyang tingog ug misulti sa katawhan: “Mga kaigsoonan nga Judio ug kamong tanan nga nagpuyo sa Jerusalem, paminawa ninyo kini pag-ayo, akong ipasabut kaninyo. Kining mga tawhana dili hubog, sama sa inyong gihunahuna. Alas nuwebe pa lang sa buntag! Dili, kini mao ang gitagna ni propeta Joel: ‘Sa kataposang mga adlaw, nag-ingon ang Dios, ibubo ko ang akong Espiritu sa tanang katawhan. Ang inyong mga anak nga lalake ug babaye magapanagna, ang inyong mga batanong lalaki makakita ug mga panan-awon, ug ang inyong mga tigulang nga mga kalalakin-an magadamgo ug mga damgo. Bisan sa akong mga ulipon, nga lalake ug babaye, ibubo ko ang akong Espiritu niadtong mga adlaw, ug sila magapanagna.”*

—Mga Buhat 2:14-18

Ang mga damgo ug panan-awon usa ka dakong paagi nga gigamit sa Balaang Espiritu sa pagpahibalo kanato. Wala ko masayod ngano nga usahay ang Balaang Espiritu mosulti pinaagi sa hilom, gamay nga tingog, samtang sa uban nga panahon mosulti Siya pinaagi sa usa ka damgo. Sa akong hunahuna, siguro tungod sa kadaghan natong ginabuhat. Kon hilom kita, mas sayon alang sa Espiritu sa pagpukaw sa atong atensyon. O basin tungod kay kita anaa sa kalibog o sa lisod nga kahimtang nga naglisod ta sa pagpaminaw sa hilom ug gamay nga tingog. Ang Balaang Espiritu buot lang nga makasiguro nga atong madawat ang mensahe. Total, ang usa ka larawan adunay lino ka mga pulong. Bisan unsa pa ang hinungdan, nagpasalamat ko sa Dios alang sa mga damgo ug panan-awon. Ang mga damgo ug panan-awon halos susama. Pareho kini nga hulagway nga atong makita, ang kalahian lang kay makakita kita ug panan-awon samtang nagmata pa kita, apan ang damgo atong makita diha sa atong pagkatulog.

Mahitungod sa mga panan-awon, pipila ra ang akong nasinati nga

akong matawag nga tinuod nga panan-awon, diin buhi ug mata pa ako apan makita kini nga murag tinood. Ang labing makahuluganon nga panan-awon nga akong nasinati mao kadtong dihang gitawag ako sa pagpamuhat sa pagpamulong sa nagedad pa ako og 19. Bag-o lang ako nabautismohan sa Balaang Espiritu, mga usa ka bulan kapin sa wala pa kini mahitabo. Siyempre, bag-o pa kining tanan kanako kay ang denominasyonal nga simbahan nga akong giapilan wala kaayo magatudlo mahitungod sa Balaang Espiritu.

Apan, adlaw kadto sa akong pagkatawo, ug giimbitar ako sa akong mga higala aron magkaon og lami nga panihapon. Sa among paglingkod aron mokaon, nagpasalamat kami sa pagkaon, ug kalit lang nga nabati nako ang kusog nga presensya sa Balaang Espiritu nga miabut kanako. Usbon ko, bag-o pa ko niining mga butanga, apan tungod sa akong kasinatian sa bautismo sa Balaang Espiritu, nahibal-an ko kon unsa ang pagbati sa dihang moabut Siya. Wala ko masayod kon unsa ang akong buhaton nianang higayona, busa nangutana ako kon makabiya ba ako sa lamesa aron mogawas kay aduna may pultahan sa akong likod.

Sa dihang migawas ako, misamot gibati ko nga presensya sa Dios, ug nakita nako ang usa ka tin-aw nga panan-awon. Kini usa ka “open vision,” nga nagpasabot nga nakita ko kini sama sa pagtan-aw sa usa ka butang sa natural nga paagi. Nakita ko ang akong kaugalingon nga nagatindog luyo sa usa ka gamay nga pulpito sa tigpamulong, samtang nagasulti ako sa usa ka lawak nga adunay mga 35 hangtod 40 ka mga tawo nga naglingkod sa mga matiklop nga bangko. Nakita ko nga gabii kadto kay itom ang gawas sa bintana. Unya, usa ka tingog misulti ug miingon, “Gitawag ko ikaw aron iwali ang Akong Pulong.” Gisulti sa katulo ka balik kini, unya nawala ang panan-awon ug mibiya ang pagdihog. Sa akong pagbalik sa sulod sa balay, nangutana ang akong mga higala kon unsa ang nahitabo, ug akong gitubag, “Mura’g gitawag ako sa pagsangyaw!”

Nahinumdom ko sa pagpauli nianang gabhiona ug pagsulti sa

akong amahan mahitungod sa nahitabo. Miingon siya nga ang mga magwawali dili makaangkon og dako nga salapi. Mao ra to ang iyang giingon. Dili pa siya Kristohanon nianang panahona, apan, himaya sa Dios, iyang gidawat si Jesus sa edad nga 80 anyos ug karon anaa na siya sa langit.

Sa maong panghitabo, nagtuo ko nga ang Balaang Espiritu misulti kanako pinaagi sa usa ka tin-aw nga panan-awon tungod kay, una sa tanan, batan-on pa ako. Nahibal-an sa Dios nga moagi ako og daghang paglutos sa akong pamilya tungod sa pag-alagad Kaniya, ug kinahanglan ko og usa ka lig-on nga panghawiran alang sa akong panaw. Ug sa tinuod, ang maong panan-awon nagapadayon sa pagsulti kanako hangtod karon.

Usa pa ka tin-aw nga panan-awon ang akong nasinati didto sa among daang farmhouse nga among gipuy-an. Kapin sa siyam ka tuig kami nagpuyo sa maong daan ug naguba-guba nga balay, ug kadaghanan sa maong panahon, nag-antos kami sa grabe nga kakabus. Apan sa dihang nagsugod kami sa pagkat-on kon giunsa paglihok sa Gingharian sa Dios, nagsugod usab kami sa pag-uswag ug nakagawas kami sa tanang utang.

Niadlong panahona, gituman gayud sa Dios ang panan-awon nga akong nakita sa dihang 19 anyos pa ako, sa dihang gitawag Niya ako sa pagwali. Nianang higayona, human sa 21 ka tuig sukad sa maong tawag, gisugo ako sa Dios nga magsugod og iglesia. Niadtong panahona, nageskwela pa ako sa kolehiyo ug nagtrabaho sa natad sa pinansyal sulod sa maong 21 ka tuig. Apan sa dihang naabot na ako sa edad nga 40, misulti ang Dios kanako nga sugdan na ang maong iglesia.

Among gisugdan ang maong iglesia sa silong sa usa ka Kristohanong estasyon sa radyo, ug sa unang gabii nga nagkatigom kami didto, eksakto kini sa panan-awon nga gihatag sa Dios kanako 21 ka tuig ang milabay. Didto sa maong unang panagtigom, nakita ko ang samang mga tawo nga naglingkod sa mga tiklop nga bangko, ang samang mga

bintana nga ngitngit tungod kay gabii na, ug bisan ang gamay nga pulpito nga akong nakita sa panan-awon.

Gisugdan namo ni Drenda ang among iglesia nga puno sa kalipay alang sa Ginghamian sa Dios, ug wala gayud kami magtagad kon asa kami nagpuyo. Nahibal-an namo nga kinahanglan namong biyaan ang daang balay sa umahan kay nidaghan na ang among pamilya ug nahimong lima na ka anak, ug wala na kamiy igong luna. Apan tungod kay busy kami sa among nagauswag nga negosyo ug sa simbahan, nalipay gihapon kami.

Apan usa ka adlaw, sa dihang nagpauli ko gikan sa simbahan, misulod ako sa sala ug milingkod sa sofa. Sa akong paglingkod, kalit lang nga nawala ang tibuok palibot sa akong panan-awon, ug nakita ko ang maong lawak nga akong gilingkoran apan wala nay bisan usa ka galamiton sulod niini. Ang pultahan nga akong gisudlan naablihan padulong sa kan-anan, ug ang sofa nga akong gilingkoran nag-atubang sa maong pultahan. Makita nako ang sulod sa kan-anan gikan sa akong gilingkoran sa sala. Dili lang kay ang sala walay nay sulod, apan bisan ang kan-anan wala poy sulod. Ang panan-awon milungtad lang og lima ka segundo, apan samtang nagtan-aw ako niini, nasayod ko nga panahon na aron mobiya sa farmhouse. Sa dihang natapos ang panan-awon, akong gisulti dayon kang Drenda ang nahitabo ug miingon nga panahon na alang sa among pagbalhin.

Sa makausa, nagtuo ko nga gigamit ang usa ka panan-awon aron ipadayag ang plano sa Dios sa usa ka tin-aw ug klaro nga paagi. Nagkapuliki kami, ug sayon ra unta alang kanamo ang paglangan. Apan ang maong panan-awon adunay kaseryoso nga mensahe, “Panahon na sa pagbiya!!!” Sa ulahi na namo nasabtan ang hinungdan sa maong pagka-dinalian. Sulod sa siyam ka tuig, nag-abang ra kami sa balay sa umahan, ug nahibalo kami nga kinahanglan namong mobiya kon magsugod na ang giplanong housing development sa maong lugar, apan walay nakahibalo kon kanus-a gayud kini mahitabo.

Busa, aron mapamubo ang istorya, gigiyahan kami sa Dios sa usa ka matahum nga yuta diin gitukod namo ang among bag-ong balay. Ang among plano mao nga hinay-hinayon lang ang pagtukod niini, nga tingali molungtad og usa o duha ka tuig depende sa among oras. Apan, human sa unom ka bulan nga pagpangtrabaho sa among balay, nakadawat kami og tawag gikan sa tag-iya sa giabangan namo nga balay, nga nagsulti nga kinahanglan na kaming mobiya sulod sa usa ka bulan. Gisultihan namo siya nga nagatukod kami og bag-ong balay ug nangayo og dugang pa nga duha o tulo ka bulan, nga ilang giuyonan, apan human niana, wala na silay ikahatag nga dugang nga extension.

Busa, among gipadali ang tanang butang ug nakasulod gayud kami sa among bag-ong balay sa kataposang adlaw sa ilang gihatag nga extension. Kon wala kami pahibalo sa Dios nga panahon na sa pagbalhin, tingali napugos pa kami nga mobalhin pa og makadaghan nianang panahona. Ug tungod sa among pagka-busy, kini unta nahimong usa ka dakong problema.

Siyempre, ang sugilanon mahitungod sa asul nga aso nga akong gisulti sa sinugdanan niini nga basahon—nga usa ka panghitabo nga nakapausab sa akong kinabuhi—usa usab kini ka tin-aw nga panan-awon. Medyo lahi lang kini kay dili kini usa ka hulagway sa akong umaabot, apan samtang naglingkod ako diha sa maong asul nga aso, klaro nakong nadungog ang mga pulong sa Balaang Espiritu nga nagtawag kanako alang sa mga nasud.

Sigurado ko nga aduna pa koy pipila ka tin-aw nga panan-awon nga nasinati, apan ang mga damgo maoy mas kanunay mahitabo kanako. Sa dihang nag-andam ako sa pag-adto sa Albania, mga usa ka semana sa wala pa ako mibiyahe, nakadamgo ako mahitungod sa maong biyahe. Niadtong panahona sa akong kinabuhi, wala pa gayud ko makabiyahе og ingon kadaghan sama sa akong ginahimo karon; ug sa wala pa mosulti ang Dios kanako niadtong adlaw, wala gayud koy interes sa pagbiyahe.

Apan sa semana sa dili pa ako molarga, nakadamgo ako. Sa akong damgo, anaa ako sa usa ka opisina sa doktor, nagahigda sa lamesa sa eksaminasyon. Usa ka nars misulod sa kwarto ug miingon kanako nga kinahanglan niya kuhaan ako og dugo. Gikuha niya ang akong kamot ug gigunitan ang akong tungang tudlo ug gitusok kini alang sa dugo, nga akong nahunahunaan nga medyo katingad-an. Apan, kabalo na kamo kon unsa ang mga damgo—adunay mga butang nga imong nga imong masayran pinaagi sa damgo.

Ug sa maong damgo, nasayod lang ko nga sa dili pa ako mobiya ning kalibutana, matag usa sa akong mga tudlo pagatuslok aron makakuha og dugo. Kini nakapahinumdom kanako sa usa ka pagtulonan nga akong nahibaloan sa Bible school, nga ang kamot mahimong simbolo sa lima ka opisina sa simbahan: ang kumagko nagrepresentar sa apostol, ang tudlo nagrepresentar sa propeta, ang tungang tudlo nagrepresentar sa ebanghelist, ang singsingang tudlo nagrepresentar sa pastor, ug ang kumingking nagrepresentar sa magtutudlo nga nag-alagad kauban ang pastor.

Busa, nasabtan ko ang gustong ipasabot sa nars. Nahibalo ko nga sa akong kinabuhi, sa pipila ka higayon, magapamuhat ako sa matag opisina sa iglesia. Usa ako ka pastor ug magtutudlo, apan nahibalo usab ako nga nagdala ako og pagpanagna nga mensahe alang sa iglesia, ilabina mahitungod sa Gingharian ug panalapi. Kini ang tahas nga gitagana kanako ni Jesus samtang atua ako sa Albania. Sa damgo, ang nars nagtuslok sa akong tungang tudlo, nga nagpasabot nga gipadala ako ingon nga ebanghelist sa nasod sa Albania aron ipadayag ang Maayong Balita sa Ebanghelyo. Ug karon pa lang ako nagsugod sa pagpamuhat ug paglakang sa apostolikong aspeto sa akong kinabuhi.

Bisan pa, sa maong damgo, human niya gitusok ang akong tungang tudlo, gikuha niya ang iyang mga kamot ug gipahimutang kini sama usa ka bata nga nag-ampo. Dayon, mitan-aw siya kanako ug militok sa pulong nga “pag-ampo.” Wala niya gisulti sa makusog, iya gilitok sa

iyang baba ang pulong nga “pag-ampo,” sama sa usa ka lugar diin dili ka makapamulong. Gikan sa maong damgo, nasabtan ko nga gipadala ako ingon nga ebanghelista sa nasod sa Albania, ug kinahanglan nga akong i-ampo ang maong biyahe.

Nakadamgo na ako og daghang mga damgo—daghan kaayo nga dili na maihap o maapil dinhi—apan ang mga damgo mao ang tingog sa Balaang Espiritu. Karun, nakaila ako og mga tawo nga mura’g matag gabii makadamgo ug tanang butang nga ilang gihimo “espirituhanon” kaayo. Nagatuo ako nga kinahanglan nato mailhan ug sabton ang tinuod nga mensahe sa damgo, kay aduna usab uban nga gusto lang ilhon nga espirituhanon ug nagapalabi sa ilang espirituhang garbo, nga makita nila ang mga butang nga dili man tinuod nga gikan sa Dios. Apan, dili pod kaayo ko gadamgo kanunay. Sulod sa usa ka tuig, tingali makadawat ako og upat hangtod dose ka damgo nga nahibalo ko nga gikan gayud sa Dios ug adunay dakong kahulogan. Kana nga ihap mahimong mag-usab, mahimo nga mas daghan o mas gamay depende sa panahon. Dili importante kon pila ang madawat nimong damgo, apan nga makat-on ka gikan kanila mao ang labing mahinungdanon. Usa sa mga damgo nga nagbag-o sa akong kinabuhi mao kadtong gisulti sa Dios kanako nga biyaan ang akong kompanya sa pinansyal nga akong gitrabahoan sulod sa walo ka tuig ug sugdan ang akong kaugalingong kompanya aron matabangan ang mga tawo nga makagawas sa utang. Kana usa ka damgo nga tinud-anay nga may dakong kahulogan.

Aduna usab mga damgo nga nagdala og pasidaan. Mahinumduman ko ang usa ka talagsaon nga damgo nga usa ka pahimangno. Kini nahitabo sa panahon nga ang among ministryo nakasinati og kakulang sa pondo ug gibug-atan sa pinansyal nga hagit. Sa maong damgo, nagahigda ako sa akong higdaanan, hapit na matulog. Ang pultahan sa akong kwarto abli, ug nakadungog ako’g hinay nga tingog sa hawanan (sa akong damgo) ug milingi ko padulong sa pultahan. Didto, nakita

ko ang usa ka gamay nga demonyo, mga tulo ug tunga ka piye ang gitas-on, nga nagadala og usa ka sako nga puno sa kuwarta. Ang maong sako murag sama sa gigamit ni Santa Claus. Ang sako bug-at ug gikarga niya kini samtang nagadagan. Apan dili siya padulong sa gawas sa balay; nakadungog ko nga siya miliko padulong sa among ikatulong andana. Sa dihang nakamata ako ug naghunahuna sa damgo, nasabtan ko nga gipakita sa Ginoo kanako nga adunay kuwarta nga gikawat o nawala.

Ang katingalahan nga sa maong damgo, adunay koy ideya sa kantidad sa kuwarta nga anaa sa sako. Nahinumdom ko nga naghunahuna ko nga mga \$25,000 kini. Gibati usab nako nga tungod kay ang demonyo wala mobiya sa balay apan gidala lang ang kuwarta ngadto sa taas, ang tawo o mga tawo nga nagakuha o nag-usik sa kuwarta kabahin sa balay—ug nasabtan nako nga kini ang ministeryo. Busa, pagkabuntag sa sunod nga adlaw, akong gitawagan ang akong senior nga elder ug gihangyo siya nga susihon ang among mga rekord sa pinansyal nga departamento. Sa among pagsusi, nakakaplag kami og daghang mga gasto nga wala na gyud gikinahanglan apan nalimtan lang. Sa dihang

## **ANG MGA DAMGO MAHIMONG GAMITON SA DIOS ARON HATAGAN KA OG ESTRATEHIYA.**

among gitan-aw ang kinatibuk-ang kantidad sa maong mga gasto matag bulan, halos mikabat og \$25,000. Nakahukom kami nga walay tinuod nga nangawat, apan tungod sa kakulang sa pagmatngon, adunay kuwarta nga nausik, ug adunay mga pag-usab nga mahimo aron mahipos

ang pondo. Gikinahanglan gayud namo ang maong kuwarta niadtong panahona tungod kay grabe ang among pinansyal nga kakulang.

Ang mga damgo mahimong gamiton sa Dios aron hatagan ka og estratehiya. Niadtong miaging tuig 2018 adunay usa ka yano nga damgo nga akong nadunggan nga nag-ingon, “Tawga ang mga barko.” Gisulat ko kana apan wala ko gayud masabtan kon unsa ang kahulugan niini. Padayon akong nangutana sa Ginoo bahin niini, ug wala ko magsulti

kang bisan kinsa gawas kang Drenda. Sa among miting sa kalalakin-an niadtong Enero, akong gipresentar ang akong mga plano alang sa tuig. Usa niini mao ang usa ka nasyunal nga programa sa gagmayng mga grupo nga dugay ko nang gihunahuna, apan nabati nako nga kini na ang insaktong panahon aron kini buhaton. Human sa miting, adunay usa ka lalaki nga miduol ug miingon nga murag naulaw siya sa iyang isulti kanako, apan nag-ingon lang siya, “Miingon ang Ginoo mura ka ug si Helen of Troy.” Wala ko kasabot kon unsa ang iyang buot ipasabot, busa iyang gipatin-aw kanako kon unsa ang iyang gipasabot. Gipangayo ko kaniya nga ipadala kini sa email aron mahinumduman nako ang iyang gisulti. Ania ang iyang email.

*Ang hari sa Sparta, si Menelaus, nagmando sa 1,000 ka mga barko aron ilunsad ug iluwas ang iyang asawa, si Helen, gikan sa mga Trojan. Ang pulong nga “Ang dagway nga nakapalunsad sa libo ka mga barko” kay usa ka nailhan nga panultihon nga nagtumong kang Helen of Troy.*

*Niadtong Miyerkules, Enero 30, 2019, samtang si Pastor nagwali sa panagtigom sa mga kalalakin-an sa Apex, ang Ginoo miingon nga siya sama ni Helen of Troy, usa ka hari nga naglunsad og 1,000 ka mga barko aron pagluwas sa mga nangawala—nawala sa pagtuo, nawala sa pamilya, ug nawala sa pinansyal.*

*Iyang Sulugoon,*

*Aaron*

Nagpadala siya og laing email sa akua pagkasunod adlaw.

*Pastor,*

*Gusto kong ipakita ang panglantaw sa militar bahin kang Helen of Troy. Para sa kadaghanan, kini mao ang sugilanon sa usa ka hari nga naglunsad og 1,000 ka barko aron luwason ang iyang nawalang asawa gikan sa mga Trojan. Apan alang sa usa ka tawo nga naghunahuna sa pang-militar, kini usa ka operasyon sa militar nga ginganlan og Operation Helen of Troy. Ang matag deployment sa militar ilang ginanganlan alang sa operasyon. Pananglitan, ang pag-atake sa SEAL Team Six sa compound ni Osama Bin Laden gitawag og Operation Neptune Spear. Ako mismo napadala sa mga misyon nga may daghang makaiikag nga mga ngalan sama sa Operation Forward Mike, Elvis Marshall, ug Santa Claus.*

*Gihatagan sila og mga pangalan sa operasyon sa militar aron kini mahimong mas mailhan o aron mapasabut kon unsa nga klase nga operasyon kini ug kinsa ang nagpatuman niini. Sa dihang miingon ang Ginoo nga ikaw sama kang Helen of Troy, ang akong panghunahuna sa militar naghubad niini nga si Pastor Gary naglunsad sa Operation Helen of Troy, usa ka misyon aron magpadala og 1,000 ka barko aron sa pagluwas sa mga nawala—nawala sa pagtuo, nawala sa pamilya, ug nawala sa pinansyal.*

*Dugang pa, sa dihang makadungog ko sa pagpadala og 1,000 ka barko, nagahunahuna usab ako bahin sa gidaghanon sa mga manggugubat, mga kawani sa pagsuporta, pagbansay, lohistika, ug mga proseso sa administrasyon nga gikinahanglan aron mapalarga ang matag barko. Wala nay laing mas angayan sa pagmando niining pwersa ug pagpakatag niining*

*kasundalohan alang sa Gingharian sa Dios kay kanimo. Ikaw naggahin og daghang mga tuig sa pagbansay kanamo alang niining higayona. Ang akong pamilya, ug sigurado ko nga ang uban pang lawas sa Kristohanong katawhan, malipayong mokuyog sa misyon.*

*IYANG sulugoon,*

*Aaron*

Si Aaron usa ka Navy Seal ug nakahuman ug 9 ka deployment samtang nagserbisyo sulod sa 21 ka tuig sa militar. Siya adunay dakong istorya sa usa ka radikal nga kausaban pinaagi sa gahum sa Krus. Wala siyay nahibal-an bahin sa gisulti sa Ginoo kanako sa damgo, ang pagpatawag sa mga barko. Apan ang iyang “pulong sa kahibalo” nagpamatuod kanako nga nakadungog ako sa hustong mensahe ug nakatabang sa pagpahimutang kanako sa dalan nga giandam sa Dios alang kanako. Ang among tumong mao ang pagpatunhay sa 1,000 ka gagmay nga grupo sa tibuok nasud aron isangyaw ang maayong balita sa Gingharian. Kon gusto ka mahimong kabahin niana nga kasundalohan, kontaka ako pinaagi sa akong website, Garykeesee.com.

Sa akong hunahuna, nasabtan na nimo ang punto. Ang mga damgo usa ka gamhanang paagi nga gigamit sa Dios sa pagsulti sa Iyang katawhan, aron paghatag og direksyon, estratehiya, pahimangno, ug pagdasig.

Sa dili pa matapos kini nga kapitulo, gusto ko nga idugang ang usa pa ka paagi nga gigamit sa Dios sa paggiya sa estratehiya, ug kini mao ang gasa sa pagpanagna. Si Aaron nakadawat sa gitawag nga pulong sa kahibalo mahitungod sa akong plano sa paglunsad og bag-ong inisyatibo. Ang pulong sa kahibalo mao na mismo ang kahulogan—usa ka pulong sa kahibalo. Kini usa ka kahibalo nga gihatag kanimo

sa Espiritu sa Dios, usa ka butang nga dili nimo mahibal-an sa imong kaugalingon. Ang pulong sa kahibalo nalista sa 1 Corinto 12 isip usa sa siyam ka mga gasa sa Balaang Espiritu. Karun, wala koy intensyon nga magtudlo mahitungod sa maong espirituhanong mga gasa niining basahona, apan gusto ko nga hisgutan ang usa niini—ang pulong sa pagpanagna.

Daghang mga tawo ang nagubot ang ilang kinabuhi tungod sa sayop nga pagsabot niining maong gasaha, busa nagtuo ko nga angay kining hisgutan. Kon ang mga tawo maghunahuna bahin sa pagpanagna, ilang mahunahuna-an ang usa ka propeta nga nagpakita kanila, nagtudlo sa ilang nawong, ug nag-ingon og butang nga sama

**“ANG TANANG  
MAGAPANAGNA  
NAMULONG SA  
MGA TAWO ALANG  
SA ILANG KALIG-  
ON, KADASIG, UG  
KALIPAY”**

**—1 CORINTO 14:3**

sa, “Ikaw kinahanglan moadto sa Africa” o “Ikaw gitawag nga mahimong pastor.” Ang duha niini nga mga pamahayag mahimong saktong representasyon sa tinuod nga pagpanagna, apan mahimo usab nga dakong sayop. Nagdipende kini kon giunsa mo kini sa pagsabot. Kon kini nga mga pamahayag basahon isip direksyon, sila mahimong sayop. Apan kon kini basahon isip pagpamatood o pagpanghimatuud sa usa ka butang nga gilihok na sa Dios sa sulod sa usa ka tawo, mahimo silang husto. Si Pablo nagpahayag sa katuyoan sa pagpanagna.

*“Ang tanang magapanagna namulong sa mga tawo alang sa ilang kalig-on, kadasig, ug kalipay” (1 Corinto 14:3).*

Mao kana! Walay pulong diha nga nag-ingon nga ang pagpanagna mao ang gigamit aron makakaplag og direksyon, apan, kadaghanan sa mga tawo nagtuo nga ang pagpanagna nagahatag og direksyon. Apan, sumala ni Pablo, ang pagpanagna mao lang ang nagakumpirma sa

direksyon, dili kini nagahatag og direksyon. Sa diha nga natawo ka pag-usab, ang Espiritu Santo nga anaa sulod nimo mao ang magatudlo kanimo kon unsa ang angay mong buhaton. Wala ka magkinahanglan og lalaki o babaye nga mosulti kanimo kon unsa ang imong buhaton alang kang Jesus. Apan, ang usa ka pulong sa pagpanagna makakumpirma sa usa ka butang nga imong nasayran na.

Pananglitan, sa akong gihisgutan nga ehemplo, “Kinahanglan kang moadto sa Africa,” kini mahimong tinuod nga ehemplo sa usa ka pulong sa pagpanagna kon ang Espiritu Santo daan nang nagsulti kanimo niana ug kini usa lang ka kumpirmasyon pinaagi sa maong pulong. Apan, kon ang pag-adto sa Africa wala gayud sa imong hunahuna ug kadto mao ang unang higayon nga nakadungog ka niana, nan, dili kini tinuod nga pananglitan sa pulong sa pagpanagna sa iglesia sa Bag-ong Tugon.

Grabe kon paminawon ang mga istorya sa mga tawo. Adunay mga Kristohanon nga moanha kanako ug moingon, “Giingnan ko sa Dios sa usa ka panagtigom nga kinahanglan kong molampas.” Aw, oo, dili na nimo kinahanglan nga adunay usa ka tawo nga maghatag kanimo og pulong nga maglampas ka; ang Biblia na mismo nagsulti niana. Akong Nakita nga adunay mga Kristohanon nga magpangutana sa uban kon adunay pulong para kanila. Dili nimo kinahanglan nga adunay usa nga maghatag kanimo og pulong! Ang Espiritu Santo nga anaa sa sulod nimo mao ang mosulti kanimo, ug oo, mahimo nga magpadala ang Dios og usa ka pulong sa pagpanagna aron sa pagpadasig kanimo, apan dili aron sa pagpanguna kanimo.

Ang pinakakatingalahan nga pananglitan nga nahitabo sa akong kinabuhi mao katong nag-uyab pa mi ni Drenda. Moadto unta ko sa ilang pamilya sa Georgia aron pangyuon ang iyang kamot sa kaminyoon. Samtang didto ko, mobisita usab ako sa ilang gisimbahan uban kaniya. Niadtong panahona, bag-o lang ko gitanyagan og trabaho sa industriya sa pinansyal nga serbisyo, ug naglisud ko og desisyon kon dawaton ko

ba kini. Gitawag ko sa Dios sa pagwali sa edad nga 19, ug bag-o lang ko nakahuman sa kolehiyo nga adunay degree sa Old Testament, apan nakabati ko og kusog nga pagpangimbitar sa pagdawat sa trabaho sa pinansyal. Naglibog gayud ako kon unsay angay buhaton.

Pagkahuman sa serbisyo sa Domingo sa gisimbahan nilang Drenda, may usa ka babaye nga dili nako kaila, apan kaila kayo ni Drenda, nga miduol kanako ug miingon nga siya adunay pulong alang kanako. Miingon siya, “Nangita ka og trabaho. Ang maong trabaho adunay napulo ka mga aspeto,” ug iyang gihisgotan ang matag usa nga buluhaton nga akong buhaton sa bag-ong trabaho nga hingpit nga sakto. Miingon siya, “Dawata kini nga trabaho, ug anaa ang Ginoo niini.”

Sa maong kahimtang, nabati na nako ang pagpangimbitar sa pagdawat sa trabaho, apan naglibog lang ko ngano nga nabati ko kana. Ang iyang pulong nga nagpanagna nagdala kanako og kasigurohan ug kadasig, ug nakapamatuod nga kini ang angay nakong buhaton. Usab, ang Balaang Espiritu nga anaa kanimo mao ang magtultol kanimo ug mahimong imong Tigtambag.

## KAPITULO 11

# ANG BALAANG ESPIRITU, MURAG AKONG AMO

Adunay usa ka pamilya sa among iglesia sa dihang gamay pa kini, nga nanginahanglan og trabaho. Maayo sila nga pamilya ug kanunay gustong motabang sa iglesia. Apan kanunay silang naglisod sa ilang pinansyal nga kahimtang. Sa dihang nawagtangan na usab og trabaho ang amahan, nakahukom ko nga tabangan sila. Niadtong panahona, nagpatukod ko sa among balay ug ako mismo ang nagtrabaho sa elektrikal nga bahin. Nasayran nako nga kabalo siya gamay bahin sa elektrikal nga trabaho, busa akong gitanyagan siya og part-time nga trabaho ug bayran siya, kay hapit na mahutdan og pagkaon ang ilang pamilya. Miadto siya ug nagtrabaho, ug nabuhat pud niya og tarong ang wiring nga akong gipabuhat kaniya.

Wala ra ko naghunahuna og dako bahin niini, apan mga usa ka bulan ang milabay, nakadawat ko og tawag gikan atong tawhana. Miingon siya nga adunay pipila ka mga tawo nga nagkatapok aron mag-ampo alang kanako. Nangutana ko, “Unsa man ang giampo ninyo?” Miingon siya nga adunay pipila ka butang nga kinahanglan usbon sa simbahan, ug mipadayon siya sa pagsulti nga aduna siyay listahan sa napulo ka butang nga ilang gihisgotan. Ang una sa listahan mao nga dako ra daw kaayo ang akong balay. Direktang nangutana siya kanako kon pila

ba ang sweldo nga gihatag sa iglesia kanako aron makabayad ko og ingon ana nga balay. Dayon, klaro nako siyang gisultihan nga wala ko'y ginadawat nga sweldo gikan sa iglesia, nga wala gani ko makadawat og bisan usa ka sentimo gikan kanila. Human nako masulti kana, nahilom siya sulod sa pipila ka gutlo. Unya, nangutana siya, “Wala diay ka ginasweldohan sa iglesia?” “Sakto,” tubag nako. Naghilom na usab siya sulod sa pipila ka segundo hangtod nga miingon na lang siya, “Aw, tingali kinahanglan na gyud sila maghatag og sweldo nimo.” Ug mao ra to ang kataposang bahin sa among panag-istorya.

Mga usa ka semana ang milabay, nakadungog ko og job opening sa usa ka kompanya nga nagtuo ko nga tingali mohaom sa iyang interes. Mao nga gisulti nako kini kaniya. Niadto siya, nag-apply, ug nadawat sa trabaho. Hinumdumi, anaa na sa puntong hapit na sila mapahawa sa ilang balay. Busa sa sunod nga semana human siya madawat sa trabaho, miadto siya sa simbahan ug gisulti kanako nga siya mihawa na. Nakurat ko. “Mibiya ka? Ngano man?” Nangutana ko. Miingon siya nga sa Biyernes sa hapon, human na sila sa ilang buluhaton sa usa ka sa semana, ug ang ilang boss mihangayo kaniya nga manilhig sa salog. Ana siya nga wala siya ningsulod sa trabaho aron manilhig. Ug mao to, niresign siya. Dili ko katuo sa akong nadungog. Nasayod ko nga kining batan-ona anaa sa usa ka mahinungdanong nga pagbansay sa kinabuhi kon gusto niya magmalampuson. Nalouy ko sa iyang asawa. Sa wala madugay, mibiya sila sa iglesia, ug sukad niadto, wala na ko kahibalo unsa na ang nahitabo kanila. Apan nakatag-an ko. Base sa iyang garboso nga kinaiya ug dili gustong mogahin og panahon sa pagpaningkamot, siguro daghang trabaho na ang iyang nasudlan, apan sa mubo lang nga panahon. Ang iyang panginabuhi, kasagaran pang survival lang. Ayaw ko saypa og sabot. Adunay mga tawo nga nagabag-o, ug naglaum ko nga nagbag-o nasiya alang sa iyang kaugalingon. Apan usa ra ang akong nasayran—sa dihang nakaila ko siya, naglakaw siya sa sayop nga direksyon. Nakita ko nga iyang ginabalewala ang tingog sa Dios.

Tingali mangutana ka, “Unsa nga tingog sa Dios ang imong gipasabot?” Sigurado ko nga kon pangutan-on siya, moingon siya nga wala siyay ideya. Kay niadtong panahona, wala gyud siyay kasayuran bahin niini. Apan iyang gitalikdan ang usa sa nag-unang pamaagi sa Dios sa pagbansay ug pagpangandam sa mga tawo alang sa ilang katuyuan sa kinabuhi: ang pagkat-on sa pagpailalom. Nasayod ko nga ang titulo niini nga kapitulo tingali nakalibog nimo. “Unsa may kalabotan sa akong amo sa Balaang Espiritu?” Apan sa pagbasa nimo niining kapituloha, imong masabtan nga ang imong amo adunay dakong kalambigitan sa imong abilidad sa pagpaminaw sa Balaang Espiritu!

Gusto ko magsugod sa atong pagtuon niining mahinungdanong hilisgutan pinaagi sa Mateo 8:5-10.

*Sa dihang misulod si Jesus sa Capernaum, usa ka kapitan sa kasundalohan ang miduol Kaniya ug nangayo og tabang. Miingon siya, “Ginoo, ang akong sulugoon nagahigda sa balay, usa ka paralitiko, ug nag-antos og grabe nga kasakit.”*

*Si Jesus mitubag, “Moadto ako ug ayuhon siya.”*

*Apan miingon ang kapitan, “Ginoo, dili ako takus nga ikaw moanha sa akong balay. Isulti lang ang usa ka pulong, ug mamaayo ang akong sulugoon. Kay ako mismo usa ka tawo nga anaa sa ilawom sa awtoridad, ug aduna koy mga sundalo nga anaa sa akong ilawom. Kon akong sultihan ang usa, ‘Lakaw,’ molakaw siya. Kon sultihan nako ang usa, ‘Anhi,’ moanha siya. Kon sugoon ko ang akong sulugoon, ‘Buhata kini,’ buhaton niya kini.”*

*Sa pagkadungog ni Jesus niini, nahingangha Siya ug miingon*

*sa mga nagsunod Kaniya, “Sa tinuod lang, sultihan ko kamo, wa pa koy nakaplagaan nga ingon ana kadako nga pagtuo bisan sa Israel.”*

—Mateo 8:5-10

Ngano nga dali ra man mituo kining tawhana nga makaayo si Jesus sa iyang sulugoon? Siya mismo ang mitubag sa maong pangutana: *“Kay ako usa ka tawo nga anaa sa ilawom sa awtoridad, ug adunay mga sundalo nga anaa sa akong ilawom. Moingon ako niining usa, ‘Lakaw,’ ug siya molakaw; ug niadtong usa, ‘Anhi,’ ug siya moanhi. Moingon ako sa akong sulugoon, ‘Buhata kini,’ ug siya mobuhat niini.”* Nakasabot siya kon giunsa paglihok sa awtoridad. Sama nga siya anaa sa ilawom sa awtoridad, ang iyang mga sundalo anaa usab sa ilawom sa iyang mando. Ang iyang pagkasabot mao nga ang tingog sa iyang labaw sama ra sa tingog ni Cesar. Sa tinuod lang, ang mando sa iyang labaw mao usab ang mando ni Cesar. Sa samang paagi, ang iyang tingog sa iyang mga sulugoon parehas ra sa mando ni Cesar alang kanila. Mao kini ang paagi sa paglihok sa awtoridad. Tungod kay nakasabot siya kon unsa ang buot ipasabot sa pagpailawom sa awtoridad, dali ra niya nasabtan nga si Jesus adunay gahum sa maong sitwasyon pinaagi lang sa pagpamulong niini. Mao ra usab kana ang iyang gibuhat—kon siya moingon sa usa ka sulugoon nga buhaton ang usa ka butang, buhaton niya kini. Ingon ana lang kasayon. Ani-a ang kamatuoran nga kinahanglan nimong hinumduman:

### **MAKAPAMUHAT KA LANG NGA MAY AWTORIDAD KON NAGPAILAWOM KA SA AWTORIDAD!**

Kon matangtang ni Satanas ang tanang pagtahod sa awtoridad ug makombinse ang tanan nga buhaton lang nila ang ilang gusto, bisan kanus-a nila gusto, maguba ug mahugno ang kalibutan sa kagubot og pagkagun-ob. Mao kini ang iyang gihagit kang Eva didto sa tanaman sa Eden, “Tinuod ba gayud nga miingon ang Dios...?” Paminawa, ang

matag usa ka tawo niining kalibutana anaa sa ilawom sa awtoridad o nagpailawom sa lain-laing mga awtoridad. Ang pag-ila nimo kon kinsang awtoridad ka nasakop makatabang kanimo sa pagkahibalo kon kinsa ang angay nimong paminawon ug kinsa ang dili. Apan sa karong panahona, daghan ang gusto magbaton og awtoridad apan dili gusto magpailawom sa awtoridad, ug kana imposible.

Bag-ohay lang, nakighinabi ko sa usa ka kontraktor nga nagsulti nga nagbayad siya sa iyang mga trabahante pinaagi sa salapi aron malikayan ang buhis sa empleyado ug bayronon sa Workers' Compensation. Apan kabalo na ko kon unsa ang mahimong resulta niini. Moabot ang panahon nga ang usa sa iyang trabahante maaksidente ug mag-file og Workers' Compensation, apan makaplagan niya nga wala gayud gabayad ang iyang amo sa maong programa nga gikinahanglan sa balaod. Tungod niini, iyang kasohan ang kontraktor kay mandato sa balaod nga bayran kini. Nakasinati na ako og susama nga sitwasyon sa among iglesia mismo nga nalambigit ang pipila ka mga kontraktor.

Niaging semana, nakighinabi ko sa usa ka babaye nga miingon nga wala siya nangingahanglan og pastor; igo na daw nga siya ug ang Balaang Espiritu.

Tinuod ka? Kon mao kana, mas maayong makighisgot siya kang Jesus bahin niini, kay Siya mismo ang nagbutang og mga pastor ug nagtukod sa lokal nga iglesia, sumala sa Efeso kapitulo 4. Kon tinuod siyang nagpasakop kang Jesus, mosunod siya sa awtoridad nga gitukod ni Jesus. Ang kamatuoran mao kini, wala siya magpasakop kang Jesus kay gusto lang niya magbuhat sa iyang kaugalingong gusto. Tungod niini, dako ang posibilidad nga mahisalaag siya ug makaagi og lisod nga kahimtang.

**ANG PAG-ILA NIMO KON  
KINSANG AWTORIDAD  
KA NASAKOP  
MAKATABANG KANIMO  
SA PAGKAHIBALO KON  
KINSA ANG ANGAY  
NIMONG PAMINAWON  
UG KINSA ANG DILI.**

Sa dili pa dugay, nakighinabi ako sa usa ka salesperson nga nagsugod sa ilang kaugalingong sales company ug gidala ang tanang kliyente gikan sa ilang daan nga kompanya, bisan pa nga sila mipirma og kasabutan nga nagdili kanila sa pagbuhat niana. Nagtuo ba sila nga mulampos sila pinaagi sa pagbuhat niana? Kana klaro nga pagpangawat!

Nahibalo ko nga dili ka siguro ganahan niani nga kapitulo sama sa uban nga naghisgot sa mga milagro ug makapahibulong nga buhat sa Balaang Espiritu. Apan kon dili nimo masabtan ug masubay kini nga kapitulo, kalimti na lang pod siguro ang uban kay ang Dios may mopauswag.

Nahinumdom ko sa usa ka higayon nga may usa ka babaye nga miduol kanako sa usa ka tigom sa pag-ampo, naghilak, ug nangutana ngano wala ko siya gitawag aron sa pag-ampo. Natingala ko! Nganong important kaniya nga imnahanglang tawgon man gyud aron ampoan, siyempre, kay ang iyang pagkatawo gibase sa kon unsay makita sa tawo knaiya.

Ug siyempre, dali ra unta nako matubag ang iyang pangutana kon siya andam lang maminaw. Kini nga babaye wala nagpakita og respeto sa iyang bana ug kanunay niyang ginapakita ang kakulang sa ispirituhanon sa iyang bana pinaagi sa mga pagtabi-tabi nga iyang gisalmotan. Mao kana ang hinungdan nga wala ko siya gitawag. Ang kamatuoran, ang hinungdan nga miduol siya kanako nga naghilak tungod kay wala siya makita nga daw usa ka espirituhanong babaye sa atubangan sa grupo nga nagpakita nga wala siya nagtahod sa awtoridad—ug tungod niana, siya usa ka delikadong babaye.

Mangutana ko nimo. Angayan ba kang moadto sa gusto nimong adtoan, sa dapit diin padulong ang imong mga damgo? Kon pangutan-on nako ang imong pastor o boss kon unsa ang ilang tinuod nga opinyon kanimo, unsa kaha ang ilang isulti? Nakita nimo, dili ka makabaton og awtoridad hangtod nga makapasar ka sa pagsulay sa pagpailalom. Dili ako ang nag-ingon niini—si Jesus mismo.

*Si bisan kinsa nga kasaligan sa gamay nga butang, kasaligan usab sa dagkong butang; ug ang dili matinud-anon sa gamay, dili usab matinud-anon sa daghan. Busa, kon dili kamo masaligan sa pagdumala sa bahandi sa kalibutan, kinsa may mosalig kaninyo sa tinuod nga bahandi? Ug kon dili kamo masaligan sa butang nga dili inyo, kinsa may maghatag kaninyo og inyoha gayud nga bahandi?”*

—Lucas 16:10-12

**Masaligan ba ka sa pagbaton sa awtoridad? Ang ebidensya makita sa imong pagpailalom.**

Tan-awon nato ang usa ka istorya sa Bibliya nga mahimong adunay dakong epekto sa imong kalampusan sa kinabuhi.

*Nagtigom ang mga Filistihanon aron sa pagpakiggubat sa mga Israelinhon. May 3,000 sila ka mga karwahe, 6,000 ka mga tigkabayo, ug labihan kadaghang mga sundalo, nga daw balas sa baybayon. Nangadto sila sa Mikmas, sa sidlakan sa Bet Aven, ug didto nagkampo. Sa dihang nakita sa mga Israelinhon nga morag makuyaw ang ilang kahimtang, nanago sila sa mga langub, sa mga kalibonan, sa mga kabatoan, sa mga bangag, ug sa mga bangag nga pundohanan ug tubig. Ang uban kanila mitabok sa Suba sa Jordan ug miikyas didto paingon sa Gad ug sa Gilead.*

*Si Saul nagpabilin sa Gilgal, ug ang tanan niyang gikauban nga mga sundalo nagkurog sa kahadlok. Naghulat si Saul kang Samuel didto sa Gilgal sulod sa pito ka adlaw sumala sa giingon ni Samuel kaniya, apan wala moabot si Samuel. Sa dihang nakita ni Saul nga naghinay-hinay na ug katibulaag*

*ang iyang mga kauban, miingon siya, “Dad-a ninyo dinhi kanako ang halad nga sinunog ug ang halad alang sa pakigda-it.” Ug gihalad ni Saul ang halad nga sinunog.*

—1 Samuel 13:5-9

*Miingon si Samuel, “Binuang ang imong gihimo. Wala mo tumana ang gisugo sa Ginoo nga imong Dios kanimo. Kon gituman mo lang kini, magahari unta ang imong mga kaliwat sa Israel hangtod sa kahangtoran. Apan dili na kana mahitabo, kay may gipili na ang Ginoo nga usa ka tawo nga matinumanon ug kasing-kasing sa Ginoo. Ug gihimo sa Ginoo kini nga tawo nga pangulo sa Iyang katawhan, tungod kay wala ka motuman sa Iyang sugo.*

—1 Samuel 13:13-14

Si Saul napakyas tungod kay wala siya mosubmitar sa maong awtoridad. Makita nato usab nga kon dili ka mosunod sa tawo nga anaa sa awtoridad, dili usab ka makaangkon ug awtoridad. Gusto nakong ipasabot ang usa ka mahinungdanong punto dinhi. Ang Ginoo magapangita ug tawo nga “matinumanon sa iyang kasingkasing.” Apan unsa ang buot ipasabot sa “matinumanon sa iyang kasingkasing”?

*Pagkahuman sa pagpahawa kang Saul, gibutang sa Dios si David isip ilang hari. Siya mismo mipamatuod bahin kaniya: “Nakaplagan ko si David, anak ni Jesse, usa ka tawo nga matinumanon sa Akong kasingkasing; bubaton niya ang tanang gusto Nako nga iyang buhaton.”*

—Buhat 13:22

Unsaon sa Dios paghulagway sa usa ka tawo nga matinumanon sa iyang kasingkasing? Sa sayun nga pagsabot, kini mao ang usa ka tawo

nga nagadumot sa ginadumtan sa Dios ug nagahigugma sa ginahigugma sa Dios—usa ka tawo nga buhaton sa buhaton unta sa Dios kon Siya anaa didto. Sa laing pagkasulti, kon nagadumot ang Dios sa sala, nagadumot usab siya sa sala. Kon gusto sa Dios nga buhaton ang usa ka butang, gusto usab niya kining buhaton. Sa atong kalibutan, nagtuo kita nga ang usa ka tawo nga masinugtanan sa kasingkasing sa Dios mao kadtong adunay daghang espirituhanong gasa. Nagtuo kita nga ang pagka-espirituhanon bahin kini sa mahitungod sa mahinay nga musika sa pagsimba. Apan klaro nga giingon sa Dios nga ang pagka-masinugtanan mao ang tinuod nga espirituhanong pagsimba.

*Apan si Samuel miingon: “Ang Ginoo malipay ba sa sinunog nga mga halad ug mga sakripisyo sama sa Iyang kalipay sa pagtuman sa Iyang tingog? Ang pagkamasinugtanan mas maayo kay sa sakripisyo, ug ang pagpatalinghug mas labaw pa kay sa tambok sa mga karnero. Kay ang pagsupak sama sa sala sa pagpamarang, ug ang pagkamapahitas-on sama sa kadautan sa pagsimba sa mga dios-dios. Tungod kay imong gisalikway ang pulong sa Ginoo, gisalikway usab ikaw sa Ginoo ingon nga hari.”*

—1 Samuel 15:22–23

Busa usab, tugoti ako nga isulti nga ang tingog sa Diyos mura’g tingog sa imong amo! Gigamit sa Dios ang imong reaksyon sa awtoridad aron masulayan ka sa panahon nga wala pay nakaila nimo. Kadaghanan sa mga tawo wala gyud makasabot kon giunsa kini paglihok. Wala nila isipa ang ilang gamay nga part-time nga trabaho isip usa ka butang nga mahinungdanon; mura’g wala kini bili. Apan ang ilang wala masabti kay nagbansay sila sa pinili nga pagpailawom—sila ang magbuot kon angay ba o dili nga mosunod binase sa ilang gusto ug personal nga katuyuan. Wala nila nasabtan nga sa adlaw nga ilang gidawat ang usa

ka trabaho, maski part-time lang, sila miuyon nga buhaton kini sama nga ilang kaugalingong negosyo. Pero kasagaran sa mga tawo lahi ang panglantaw. Mas nagpunting sila sa mas dagkong pangandoy. Part-time job ra man ni, dugang lang nga kwarta, walay dakong epekto. Kana maoy sayop!!!

Walay trabaho nga yano o walay bili. Walay gamay nga buluhaton. Si David gihatagan og gamay, yano nga trabaho nga pag-atiman sa

**BUSA USAB, TUGOTI  
AKO NGA ISULTI NGA  
ANG TINGOG SA DIYOS  
MURA'G TINGOG SA  
IMONG AMO!**

mga karnero. Pero alang kaniya, dili kini yano; giseryoso niya ang gisalig nga katungdanan, gani, duha ka beses niyang girisgo ang iyang kinabuhi aron mapanalipdan ang mga karnero. Sa laing pagkasulti, iyang gihuptan nga daw bug-at nga responsibilidad ang gisalig kaniya.

Wala siyay daghang kaila niadtong panahona, apan nakaila ang Dios kaniya! Ug ang Dios nasayod kon asa siya sa tanang higayon.

Nasayod ang Dios kon asa ka karon, ug nasayod Siya sa imong kasingkasing batok sa awtoridad. Ang punto dinhi, kon dili ka makapailalom sa usa ka tawo nga imong makita, dili pud ka makapailalom sa Dios nga dili nimo makita. Daghang mga tao karon ang nag hawid sa adunay “katungod” nga mentalidad, “biktima lang ako” nga mentalidad—kanunay nga ang laing tawo ang sad-an: ang boss, ang gobyerno, sila nagtrabaho lang aron makasagubang, maglihok lang kon pugson. Kasagaran, sila adunay “pagproseso” nga mentalidad—maghulat ug sugo imbis nga maghunahuna ug mga inisyatibo sa ilang buluhaton. Mao kini ang kaso sa mga Israelita. Human sila nahimong gawasnon gikan sa pagkaulipon, nagpadayon gihapon sila sa panghunahuna nga ulipon sila, bisan pa nga sila gawasnon na. Pero dili nila mahimong madaug ang yuta nga gisaad sa Dios kanila kon magpabilin sila sa panghunahuna nga ulipon. Kinahanglan silang

bansayon sa Dios para sa kalampusan aron sila maka-abot sa maong yuta. Ug karon, mao ra usab kanimo. Kinahanglan ka bansayon sa Dios aron maandam ka sa yuta nga iyang gitagana para nimo—ang imong kapalaran ug katumanan sa iyang kabubut-on. Gi-andam ba sila sa Dios?

*Gipaubos kamo Niya, gipagutoman kamo, ug unya gipakaon kamo og mana, usa ka pagkaon nga wala mailhi sa inyong mga katigulangan, aron sa pagtudlo kaninyo nga ang tawo dili mabuhi sa tinapay lang, kondili sa matag pulong nga mogula sa baba sa Ginoo.*

—Deuteronomio 8:3

*Gihatagan kamo Niya og mana aron inyong kaunon didto sa kamingawan—usa ka pagkaon nga wala mailhi sa inyong mga katigulangan—aron kamo **ipaubos ug pagasulayan**, aron sa **kataposan**, magmaayuhon ang inyong kahintang.*

—Deuteronomio 8:16

Gipaubos sila sa Dios, nga nagpasabot nga gihimo Niya silang mahuyang ug nagkinahanglan og tabang. Kinahanglan nilang makat-onan ang pagsalig sa Dios, dili sa ilang kaugalingon. Sa unahan, mas dagkong mga hagit ang ilang atubangon kaysa pagpangita lang og pagkaon. May mga higitang kaaway ug mga lungsod nga gilibutan og dagko nga mga pader—mga butang nga sayon ra unta nga makapahadlok kanila gawas kon ilang makita nga ang Dios nga mas dako pa kay sa ilang mga problema.

Ikaduha, kinahanglan nilang makakat-on sa paghimo og husto nga mga desisyon sa ilang kaugalingon nga dili na kinahanglang pugson. Karong panahona, daghang ginikanan ang nasayop sa pagdisiplina sa ilang mga anak, ila lang gibansay ang ilang kahimoan ug dili ang

kasingkasing. Pananglitan, giingnan ang usa ka bata nga limpyohan ang ilang kwarto, apan nagpakita siya og bati nga batasan—gibundak ang pultahan, nagpasagad sa iyang lihok, ug nagbuhat lang aron matuman ang sugo apan walay tinuod nga pagpailalom. Ang ginikanang gusto lang mahimong suod nga higala sa ilang anak kasagaran magpasalamat lang sa maayong trabaho nga ilang nakita, ug wala magtagad kinaiya nga nag-uban niini. Sayop kana. Ang bata mituman lang sa panggawas, apan wala sa sulod. Ang tinuod nga pagpailawom usa ka binuhatan nga kinasingkasing. Sa umaabot, ang mga ginikanan dili na makabantay sa ilang anak sa tanang panahon. Kon mahanaw na ang ilang paggiya, buhaton sa bata ang iyang tinuod nga gusto. Unsa ang anaa sa iyang kasingkasing madayag na. Daghan kaayong mga ginikanan ang maabtan ang ilang anak nga nahisalaag na, ug sila nalibog nga mag-ingon nga kining gamay nga Johnny buotan man unta kaniadto, pero nausab pag-adto sa kolehiyo o pagpuyo sa kaugalingon niyang balay. Ang Bibliya nag-ingon nga gisulayan sa Dios ang Israel aron sa kataposan, maymaayuhon ang ilang padulngan. Mao kini ang atong gihisgotan. Dili sama sa ginikanan nga mas nagtinguha nga ganahan ang ilang anak kanila, ang Dios mas nabalaka sa maayong kaugmaon sa bata. Iyang pangkoreksyonan ang gagmay nga kinaiya sa kasingkasing sa dili pa kini mahimong permanente nga kinaiya. Mao kini ang kahulogan sa dihang giingon nga ang Dios magsulay kanila—aron matul-id ang ilang kasingkasing sa dihang sila pagasulayan sa pagpailalom.

Ang tanang tao kinahanglan makapasar sa pagsulay sa pagpailalom! Apan, asa man kita matudloan sa Dios karon nga wala namay disyerto nga atong tabukon? Asa man nato madungog ang Iyang tingog aron makat-on kita sa tinuod nga pagpailawom ug mahimong andam alang sa sunod nga promosyon sa atong kinabuhi? Hinumdumi ang gisulti sa Dios mahitungod kang Saul—ang pagkamasinugtanon labaw pa sa sakripisyo. Ang atong mga buhat sa pagsimba sa simbahan dili maoy

sukdanan sa atong sunod nga promosyon. Masaligan ba kita sa Dios nga tagaan og awtoridad? Asa kini magsugod? Sa balay.

*“Mga anak, sunda ang inyong mga ginikanan diha sa Ginoo, kay kini mao ang husto. Tahura ang inyong amahan ug inahan—mao kini ang unang sugo nga may saad—aron magmaayuhon ang dagan sa inyong kinabuhi ug motaas ang inyong kinabuhi dinhi sa kalibotan.”*

—Efeso 6:1–3

Ngano nga ang pagtuman sa imong mga ginikanan makahatag kanimo ug taas nga kinabuhi ug kalampusan? Nagahatag ba ang Dios og puntos alang sa pagtuman? Dili, apan kon makakat-on ka sa pagtahod ug pagpasidungog sa imong mga ginikanan—ang awtoridad sa imong kinabuhi—makakat-on usab ka sa pagtahod ug pagpasidungog sa Dios. Kon imong tahoron ang awtoridad sa Dios sa imong kinabuhi, magmatinumanon ka Kaniya, ug mamaayohon ang dagan sa imong kinabuhi. Busa, mahimo kong isulti nga ang tingog sa Dios murag tingog sa imong mga ginikanan samtang bata pa ka ug anaa pa sa ilang pag-atiman.

Ang ikaduhang dapit nga gamiton sa Dios aron matudloan ka sa pagtugyan sa awtoridad mao ang pagpailawom sa tawhanong awtoridad. Ang imong amo, ang imong pastor, ang mga pulis, ug ang gobyerno—kini silang tanan mga pananglitan sa mga awtoridad nga gisugo sa Dios nga atong sundon.

Nahinumdom ko sa usa ka pamilya sa among simbahan nga permi lang magreklamo ug maghigot sa ilang mga problema. Hapitan na sila mapahawa sa ilang balay ug nanginahanglan og \$10,000 aron ma-update ang ilang bayad ug malikayan ang foreclosure. Daghang mga tao sa simbahan ang ilang gisultian bahin sa ilang sitwasyon. Sa kadugayan, adunay usa ka pamilya nga nagdesisyon nga motabang

kanila ug mihatag og \$10,000. Apan human lang sa pipila ka bulan, nibalik na pud sila sa ilang daang kahimtang ug nawad-an gihapon sa ilang balay. Akong gikastorya ang maong magtiayon, nga parehong walay trabaho, ug akong giingnan nga unta mangita sila’g mga pamaagi samtang nagpaabot sa insaktong trabaho nga ilang gitinguha. Pwede sila magtrabaho sa bisan unsang kan-anan sa syudad, apan ilang giingon nga dili para kanila ang ingon ana nga mga trabaho. Klaro nga ang ilang problema dili lang sa kwarta kon dili sa pagsabot sa awtoridad ug responsibilidad. Wala nila nakita nga sila mismo ang responsable sa ilang kinabuhi ug kinahanglan nilang buhaton ang angay buhaton aron masulbad ang ilang sitwasyon.

Si Rick Renner, usa ka higala nako, nag-ingon nga sa dili pa siya mokuha og empleyado, iyang tan-awon ang ilang sakyanan, o usahay, mosulod siya sa ilang balay bisa’g walay pahibalo. Nasabtan niya nga kon ang usa ka tawo dili kabalo moatiman sa ilang kaugalingong sakyanan, dili usab sila makaatiman sa iyang mga butang. Sa dili madugay, ang iyang opisina mahimong maguba sama sa iyang sakyanan.

Nakaagi ko sa panahaon nga ako gibansay sa kamingawan. Ug malipayon ako nga wala tugoti sa Dios nga magpabilin ako sa akong way pagtagad nga pamatasan batok sa awtoridad. Gipakaubos ug gisulayan niya ako aron andamon ko para sa akong buluhaton.

Nahinumdom ko sa panahon nga grabe ka lisod ang kwarta sa among pagpuyo didto sa uma. Maayo na lang, nakaangkon ko og dako nga investment deal nga nakatabang kanako makabayad sa akong mga utang, nga kanunay gayud malangan. Apan wala miabot ang tseke sa hustong oras, busa nakahuna-huna ko og maayong plano—mag-abli og bag-ong checking account sa usa ka bangko nga dili akong primary bank, unya mosulat og tseke nga walay pondo padulong sa akong primary account. Ang akong plano, pag-abot sa tseke pagkasunod adlaw, ipasulod dayon nako sa bangko aron mabutangan ang walay pondo nga tseke. Apan wala gayud miabot ang tseke sulod sa duha ka

semana! Kada adlaw, nagpadayon ko sa pagsulat og walay pondo nga tseke aron matabunan ang nauna, hangtod nga naabot sa kapin \$2,000 ang akong utang tungod kay nanginahanglan usab ko og pang-grocery. Sa maong panahona, nagkadako ang kantidad sa akong utang.

Pero natapos ang tanan sa dihang gitawagan ko sa manager sa bangko sa sayo sa buntag. Ang unang mga pulong nga iyang gisulti, “Mr. Keesee, kabalo ko sa imong gibuhad, ug akong sirad-an ang imong account. Kinahanglan nimo dalhon ang kuwarta aron mabayaran kini, ug dili na ka makapa-abli og account sa among bangko.” Nasakpan gyud ko! Ang mas grabi pa sa maong sitwasyon kay ang mga tseke nga akong gigamit adunay mga bersikulo sa Bibliya, ug nagsangyaw pa ko sa manager sa bangko kon unsa kamaayo ang Dios. Salamat sa Dios, miabot gyud ang tseke niadtong adlaw, ug akong nadala sa bangko aron mabayran ang utang. Apan kinahanglang moadto ko sa opisina sa bank manager, magbasol diha kaniya, ug ipasabut kaniya nga dili ang Dios ang angay basulon, kay ako ra gyud ang nagbuhad sa maong binuang.

Adunay usa ka higayon sa akong unang mga tuig sa negosyo nga gibansay ko sa among regional vice-president. Samtang iyang gitan-aw ang akong mga sales, napansin niya nga wala koy nakuha nga pirma sa usa ka parte sa porma. Miingon siya, “Walay problema, ipaduol lang sa suga ug sundoga ang ilang pirma sa nahabilin nga blangko. Kay sa tinuod lang, gusto man gyud nila ang produkto ug napirmahan na nila ang ubang bahin.” Busa mao to akong gibuhad. Mga usa ka bulan ang milabay, nakadawat ko og tawag gikan sa abogado sa akong kliyente, nga nagsulti nga ila akong gisang-atan og kaso og \$100,000 tungod sa pagpiki sa iyang pirma sa bank withdrawal form. Apan ang kantidad nausab ug nahimong \$5,000 tungod kay adunay bahin sa responsibilidad ang akong regional vice-president nga sa kataposan, napahawa sa iyang posisyon.

Apan kinahanglang makat-on ko! Usa sa akong bag-ong mga

representante kinahanglan moagi og insurance test apan wala siyay kwarta para mopalit og study material, mao nga ako kining gikopya para iyang magamit. Apan iyang nabiyaan kini sa testing site, ug nakadawat na pud ko og tawag gikan sa usa ka abogado nga nagsang-at og kaso batok kanako tungod sa paglapas sa copyright. Niadtong mga panahona, kabisado na nako ang dalan padulong sa opisina sa IRS, kay kanunay kong nag-atubang og dugay nga bayranan sa buhis ug mga multa. Karon, kon akong balikan ang tanan, magsagol ang akong pagbati. Gipaatabang ako sa Dios sa akong tulubagon ug gibansay ko niya. Nahibalo Siya nga sa umaabot, ako mopadagan og minilyon nga dolyar, ug wala gyud Niya ako tugoti nga makalusot sa bisan unsang binuang. Salamat sa Dios niana!

Kinahanglan nakong makat-onan nga ang Dios mao ang akong tigpalambo, ug dili lang kini base sa akong mga buhat. Kinahanglan usab nga masulayan ang akong integridad. Mao nga akong masulti nga ang Dios mura'g imong boss. Ang imong boss usa ka instrumento nga gigamit sa Dios aron mabansay ka para sa imong sunod nga buluhaton ug aron matudloan ka sa pagka-mapainubsanon. Makapasar ba kaha ka sa pagsulay?

*Walay bisan kinsa nga gikan sa silangan, kasadpan, o sa kamingawan nga makabayaw sa usa ka tawo. Apan ang Dios mao ang maghuhukom: Iyang ibaba ang usa, ug iyang ipataas ang uban.”*

—Salmo 75:6-7

*Walay kastigo nga dili sakit ug dili gayod kini makalipay. Apan sa kaulahian kadtong nakadawat sa maong pagpanton makaani sa kinabuhing matarong ug malinawon.*

—Hebreo 12:11

*Mga ulipon, tumana ang inyong mga agalon dinhi sa yuta uban sa pagtahod ug pagkahadlok, uban sa pagkamatinuoron sa inyong kasingkasing, ingon sa pagtuman ninyo kang Cristo. Himoa kini dili lang kon magtan-aw sila kaninyo aron daygon kamo nila kondili buhata ang kabubut-on sa Dios, sa kinasingkasing gayod ingon nga mga ulipon ni Cristo. Busa tumana nga malipayon ang inyong buhat sama nga ang Ginoo maoy inyong gialagaran ug dili ang mga tawo lang. Hinumdomi nga gantihan sa Ginoo ang magbuhat ug maayo, ulipon man siya o dili. Kamong mga agalon, buhata usab ninyo kini sa inyong mga ulipon ug ayaw na kamo panghulga kanila. Hinumdomi nga kamo ug sila pulos ulipon sa Ginoo ug wala siyay pinalabi.*

—Efeso 6:5-9

Pagmasinugtanon uban sa pagtahud ug kahadlok! Mao kini ang kinaiya nga angay nimong ipakita sa imong boss. Ang imong pagkamasinugtanon sa imong boss gihubit ni Pablo isip pagbuhat sa kabubut-on sa Dios. Natingala ba ka? Ako pud!

Busa, unsay sama sa tingog sa Dios? Murag tingog sa imong boss!

## **PAGSULAY KINI!**

Samtang matapos kini nga pagtuon, naglaum ako nga ikaw napukaw ug nadasig. Ang Balaang Espiritu usa gayud ka katingalahang Kauban sa kinabuhi—Siya nga nagsaad nga dili gayud mobiya o mohikalimot kanimo. Dako kini nga dungog nga makaambit kanimo niining bililhon nga mga kamatuoran.

—Gary Keese

Alang sa dugang kasayuran kabahin sa paglingkawas sa utang ug luwas nga pagpamuhunan, makontak nimo ang akong kompanya, Forward Financial Group, sa 1-(800)-815-0818.

Alang sa dugang kasayuran mahitungod sa Ginghamarian sa Dios, bisitaha ang [FaithLifeNow.com](http://FaithLifeNow.com).

Ug para sa impormasyon kabahin sa Faith Life Church, adto sa [FaithLifeChurch.org](http://FaithLifeChurch.org).

## KAPITULO 12

# UNSAON PAG-AMPO UG PAGDAWAT SA BAUTISMO SA ESPIRITU SANTO

Ang tanan natong madawat gikan sa Dios, atong madawat pinaagi sa pagtuo sa Iyang gisulti. Ug ang pagdawat niining gasa gikan sa Dios walay kalainan. Sa dili pa ka mag-ampo aron madawat kini, siguroha nga imong gitun-an ang mga Kasulatan nga gilista niining basahon hangtod nga mosalig ka na nga kini mao ang kabubut-on sa Dios para kanimo ug ang imong mga pangutana natubag na. Kon mosalig ka na nga ang Bautismo sa Espiritu Santo alang kanimo, pag-ampo lang niini nga pag-ampo:

**“Amahan, naghangyo ako sa Bautismo sa Imong gamhanang Espiritu karon. Akong dawaton kini KARON, sumala sa Imong Pulong, uban sa abilidad sa pag-ampo diha sa Espiritu. Naghangyo ako niini sa ngalan ni Jesus ug alang sa Imong himaya! Amen.”**

Wala ka nangita og kasinatian o espesyal nga pagbati, apan nagabarog ka sa Pulong sa Dios, nagtuo nga imong nadawat kini sa

dihang ikaw nag-ampo. Human ka mangayo ug midawat, sugdi ang pagdayeg sa Dios ug pagpasalamat Kaniya sa pagdihog Kanimong sa Iyang Espiritu, sumala sa Iyang saad.

Kon mag-ampo ka, siguroha nga kasabot ka nga *imo nang nadawat sa dihang nangayo ka*, dili kon aduna na kay nakitang ebidensiya sa imong nadawat. Ang imong ebidensiya mao ang Pulong sa Dios.

***“Bisag unsa ang inyong pangayoon diha sa pag-ampo, tuohi nga madawat ninyo kini ug mainyo gayod kini”*** (Marcos 11:24b).

Siguroha nga mogahin ka og panahon sa pagsimba sa Ginoo human ka mag-ampo, aron ang Espiritu sa Dios adunay kagawasan sa pagpahayag sa Iyahang kaugalingon sa imong pinulongan sa pag-ampo. Dili pagapugson sa Dios ang imong baba sa paglihok! Kinahanglan nga andam ka sa pag-ampo sa mga pinulongan. Kasagaran, ang mga tawo makasinati og kalagsik o pagkapuno sa ilang sulod samtang nag-ampo o nakabati sa Espiritu sa Dios.

Samtang nagapadayon ka sa pagsimba, itugyan ang imong kaugalingon sa Espiritu sa Dios. Masugdan nimo nga mabati ang lain-lain mga tingog o mga pantig nga mogula gikan sa imong espiritu. Kinahanglan nga motugyan ka niana pinaagi sa pagtuo. Sa dihang buhaton nimo kini, magkadako ang pag-agay ug pagpagawas sa Espiritu sa Dios.

Kon sa bisan unsang rason dili ka makaampo dayon sa lahi nga pinulongan, ayaw kabalaka. Imo na kining nadawat pinaagi sa *pagtuo*, busa padayon lang sa pagpasalamat sa Dios alang sa Iyang pagpahid kanimo. Nakakita na ako og mga tawo nga human mag-ampo aron madawat ang Bautismo sa Espiritu Santo sa simbahan, misugod lang og pag-ampo sa Espiritu samtang pauli, samtang naligo sa sunod buntag, o samtang nagputol og sagbot pipila ka adlaw ang milabay.

Ang hinungdanon mao ang pagdawat pinaagi sa pagtuo, dili pinaagi sa pagbati.

Himuang kabahin sa imong adlaw-adlaw nga kinabuhi ang pag-ampo diha sa Espiritu ug palig-ona ang imong kinabuhi sa pag-ampo. Ang Dios magapamulong kanimo ug magamando kanimo uban sa mga tubag mahitungod sa tanang butang! Nagsalig ako nga mogahin ka og panahon sa pag-ampo diha sa Espiritu ug maglipay sa tanang mga kaayohan sa Gingharian sa Dios nga imo nang nadawat!



# MGA TALA

1. Jared Dublin, "Jailed fan suing NFL for \$88 billion over Dez Bryant non-catch vs. Packers," January 23, 2015, <https://www.cbssports.com/nfl/news/jailed-fan-suing-nfl-for-88-billion-over-dez-bryant-non-catch-vs-packers/>.
2. <http://www.dictionary.reference.com/browse/Edified?s=t>.
3. Lin Edwards, "Psychologists say babies know right from wrong even at six months," May 10, 2010, <https://medicalxpress.com/news/2010-05-psychologists-babies-wrong-months.html>.

Nagsalig ako nga kini nga libro nahimong usa ka panalangin kanimo ug sa imong paglakaw kauban ang Ginoong Jesu-Cristo. Sama sa akong giingon sa libro, kini ang ikaduha sa “Imong Pinansyal nga Kausaban” nga serye. Adunay katibuk-an nga lima, busa ipadayon ang pagsusi sa sunod nga libro sa among website. Ikonsiderar usab nga mahimong usa ka miyembro sa Team Revolution, ang among programa sa pagtudlo. Makita nimo ang dugang nga impormasyon bahin sa Team Revolution sa among mga website usab.

Si Gary ug Drenda Keesee nanag-iya ug nagpadagan sa Forward Financial Group sa New Albany, Ohio, 1-(800)-815-0818.

Si Gary ug Drenda Keesee pastor sa Faith Life Church sa New Albany, Ohio.

Alang sa dugang nga mga kapanguhaan ni Gary ug Drenda Keesee, adto sa [FaithLifeNow.com](http://FaithLifeNow.com), [GaryKeesee.com](http://GaryKeesee.com), o [Drenda.com](http://Drenda.com).



Adto sa [FLNFree.com](http://FLNFree.com)  
aron sa pagdownload  
sa libreng pagpanudlo  
nga gihuban sa imong  
lingguwaher

Gusto pa nimo og mga **LIBRENG** pagpanuldo nga gihubad sa imong lingguwah?  
Adtoa ang **FLNFree.com**

# IMONG PINANSYAL NG KAUSABAN

## Ang Gahom sa Estratehiya

Ang kinabuhi adunay daghang mga dagkong desisyon.

*Unsaon mo paghibalo kon unsay balay ang imong paliton, kinsay imong minyoan, o unsang trabaho ang imong dawaton?*

Kon buot ka mahimong malampuson, nagkinahanglan ka og estratehiya. Apan unsaon mo paghimo og estratehiya kon wala kay kasayuran?

Ang mga sekreto sa Dios gitagoan tungod og alang kanimo, ug dili batok nimo.

**Buot sa Dios nga maangkon mo ang mga tubag nga imong gikinahanglan—ug mao kana ang hinungdan nga tagaan ka Niya sa usa ka sekretong hinagiban!**

Niining ika tulong bahin sa *Ang Imong Pinansyal nga Kausaban* nga serye, si Gary Keesee nagbutay sa pinaka mahinungdanon nga elemento sa kadaugan ug usa ka KRITIKAL nga sekreto sa Gingharian sa Dios: *Ang Gahom sa Estratehiya!* Bisan kinsa makadakop og isda kon nasayud sila kon asa itaktak ang ilang pukot. Anaa sa Dios ang mga tubag nga imong gikinahanglan, apan kinahanglan mong sabton kon unsaon mo pagdungog sa maong mga tubag ug iaplikar kini sa imong kinabuhi—og mao kana ang hinungdan niini nga libro.

Ubani si Gary niining makaabli'g mata nga kasinatian, ug imong madiskobrihan unsaon sa pagimplenetar sa *Ang Gahom sa Estratehiya* sa imong kinabuhi!



Si Gary Keesee manunulat, mamumulong, negosyanti, eksperto sa butang pinanasyal, ug usa ka pastor nga adunay kasingkasing sa pagtabang sa mga tawo nga magmalampuson sa kinabuhi, labi na sa pagtuo, pamilya, ug pinansyal. Si Gary ug ang iyang asawa nga si Drenda, nakatukod ug daghang mga malampusong negosyo, ug maoy nagtukod sa Faith Life Now, nga nagpasundayag ug duha ka programa sa telebisyon—*Fixing the Money Thing* ug *Drenda*, mga kompiresya nga gihimo sa tibuok kalibutan, ug mga praktikal nga kakuhaan. Ang mga Keesee nagpastor sa Faith Life Church duol sa Clumbus, Ohio.

